

MATEO NAAJIOTASANO JESUCRISTOJINIJI

*Jesucristo supuetanaajiniji pohuatasano
(Lc 3.23-38)*

¹ Jesucristoori supuetana Abraham jiuhuacuajinio supueno quiquiaari, supuetana David niquiohuacuajinonio. Nioori Jesucristo supuetanaa sesaca. Naa quiquiaariti:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niquiocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jeconías que quiquiaari, tapueyocuaca quejuhuaj. Jiyacariti, Israel pueyapueeri

quioosaaquiaari Babilonia jiyajiniara. ¹² Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanuuri quiquiaari Cristo. Nioori pueyano rupaajinia sequeya “Pueyaso jiyarosano Jiyaniijiarano”.

¹⁷ Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce supuetanaari quiquiaari. Jiyacaritij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pohuatasano
(Lc 2.1-7)

¹⁸ Naa quiquiaariti Jesucristo rasacari: na nucuarano Maríari tari Joseeta camiriquiano quiquiaari. José nu-muetuqueyaquishacarijia María, Maríari tariucua man-ajaraca quiriquiaa. Pueyaso Sohuanucuaajaari na manajetequiaari. ¹⁹ Neyacarano José jaara niishiquiaari nec-orano tariucua manajaraca quiya, nojuajaari jiyano-hua niishiriojori-quiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niquiara. ²⁰ Naa José niishiriojosacari na cartenura juucuatej, Pueyaso seruuri nocua muetaquiaari na maquenujinia. José sequereeri:

—Supuetana jiyaniijia David niqiuohuacuajinio supueno Joseenaa, María quia camiri naajaa. Maja quia puerenu. Pueyaso Sohuanucuajaari na manajorucuaa. ²¹ Maríari neyanu ranutaniya. Quiocua na sesojore “Jesu”. Sesa na pueya miijosano tuujunutaniya nojori jiuujiajinijiiri. Naaratej, na sesaari quiniutianiya “Jesu”.

²² Jesu rasaanuuri naa quiquiaaritij, tariucuacaanu pueyara Pueyaso sequesano caminiujiunia pohuatasano tohuateenura. Pueyasoori naa na pohuataniquiaari jiyanohua tarijiatej:

²³ “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’ ”.

Nioori pueyano rupaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaaritij taa Pueyaso seru sequequiaari nojuacuajani. María riquiaari-iri na tiajiniara necocuara. ²⁵ Nojoriiri maja na quiniu quiquiaari juhua seetanujuanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

2

Niishijiaca tiuquiiijosacari conaajaacua

¹ Jesuuri rasaaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquiiioquiaari Jerusalén tiacajinia. Nojoriiri Jesu niquniuria tiuquiiioquiaari jiya pajamaji. ² Nojori tiuquiiijosacari, nojoriiri pueya nequesoreetaquiaari:

—¿Tee Judiocuaca jiyaniijiarano rasaanucuaani? Canaari niishiyani nojuajaari tari rasaanucuaa. Canaari na rijia niqiquianu jiya pajamajini, canaa jiyajinia canaa quishacarijia. Canaari nocua niyareeni canaa shuquiritianura nojuaja, jiyaniijiarano na quiniuucua.

³ Jiyaniijia Herodes tojishacari naa niishijiaca sequesantej, jiyano hua tacaquiaariiri. Puetunu Jerusalén tiacajinia quiniaajanaari tacaquiaarijuhuaj.

⁴ Nocuaji, Herodesri Judiocuacaacuara secojonaa sequequiaari nocua nojori nijionura, Moisés Rootasanojiniji niishitiojonaanio. Nojori tiuquijiosacari nocua, Herodesri naa nequesoreetaquiaari nojori:

—¿Tee Cristo rasaanutaniyani, Judiocuaca jiyaniijiaranotej?

⁵ Nojoriiri na riucuaciaari:

—Belén tiacajinia rasaanutaniyano, niya Judea jiyajini-ani. Naa naajiotasano quiyacuajaari Pueyaso sequesano caminiujiunia sequesano. Cuno tariucuacaanu naajiotasanocuajaari naa sequeyatej:

⁶ “Belén tiacajinia quiniaanaa, nia tiacaari maja najuhuana shiitianiyojua tiaca Judea jiyajinia. Cuno nia tiacajiniani, Jiyaniijajanaa cutaraari supenutaniya. Nojuajaari socua cutara Jiyaniijajanaa quiniutianiya tamasaca jiyaniijiacajiniji Judea jiyajinijinio. Cunoori maninia jiitianutaniya cua pueya, Israel pueya”.

⁷ Naa pueya sequesano na tojiniu nuhuajitij, Herodesri cuno jiya pajamaji nijiono niishijiaca nequesoreetaquiaari jiyasohuaja:

—¿Taacari rijia niqishaacanu seetanujuanaani?

⁸ Nojori riucuanu nuhuaji, Herodesri na sapojonuta nojori sequequiaari:

—Nia quiaare Belén tiacajinia. Niocua jacaria nequesoreetasee cuno mueyajiniji. Niaa jaara na riuriatate, niocua cua numootecuhuaja. Janiyacua nocua quiaarejaanihuaj cua shuquiritianura nojuaja.

⁹ Niishijiaca tojiniu nuhuaji naa jiyaniijia Herodes sequesantej, nojoriiri quiojiyareecuahuaj. Jiya pajamaji na niqitiushano rijia niqitiuriiri nojori puetaano. Rijiaari

pootia tiuushii tia caco, tee mueya quiriquiaacuajani. ¹⁰Nojori niquishacari rijia, niishijiacaari jiyanoehua timi-tiuquiaari. ¹¹Tiaco tiuquitiaseeri. Conaaja niquitiushii na nucua Maríataari. Conaajaacuara mojuquetacoquiaari-iri. Na shuquiritiatureeri. Na nuhuaji, niishijiacaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanohua jaanutaja catijasocoriquianojuhuaj, tamaatiuucua shanohua jaanutajanio. Na sesaari tahue rupaa-jinia “mirra”. ¹²Na nuhuaji, Pueyasoori cuno niishijiaca sequequiaari na maquenujinia, maja Herodescua nojori tacatenuhuara Herodes nojori pohuatanuhuara conaajajiniji. Naacuajitij, niishijiacaari tamonu nucuacohua tacatequiaariuhua na jiyajiniohuara.

Egipto jiyajiniara Jesu mashitiasaanujiniji pohuatasano

¹³Niishijiaca jaara quiaquiaariuhua, Pueyaso seruuri Josecua muetaquiaari na maquenujinia. José sequereeri:

—¡Quia sanere! ¡Conaaja quia mashitiare na nucua Egipto jiyajiniara! Quiniqui nia quishii, janiya cuaara sequerohua quiajanijajaatijia. Herodesri Belén tiacajinia na pueya pajetenutaniya conaaja, na motesocoriquiano.

¹⁴Joseeri sanequiaari. Cuno niucuaja, conaaja mashitiaree na nucuaatajaari Egipto jiyajiniara. ¹⁵Nojori tiuquishacari Egipto jiyajinia, tii quishiiquiaariiri, Herodes cuaara cusooraajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piirinijia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishiquiaari cuno niishi-jiacaari na ruuretaquiaari saaja, Herodesri jiyanohua juaaquiaari. Na pueya jiyaroquiaari puetunu naatu-joori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuaara puecoosaaria puetunu shusha roosanojuanaa, mariyata canapuate caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijaari tarijia niquishaaquiaari. Juhuanujuajaari maja caapiqui marijia shocojonu quiquiaari rija niquishaanujiniji. ¹⁷ Naacuajitij, tariucuacaanu Pueyaso sequesano caminiujiunia Jeremías sequesanoori tohuateequiaari. Jeremías sequesanoori naa naajiotasaaquiaaritij:

¹⁸ “Sapuenuri tojishiya Ramá tiacajinia. Jiyanohua taraatia. Raquelri necohuacua sariyacojiya. Majaari na paniniu na cumanijiasaanura. Necohuari tari puecoosaarucuaa”.

¹⁹ Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujiniya, Egipto jiyajinia nojori quishacarijia. ²⁰ Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiaaari tari cusuuruucuaa.

²¹ Joseeri sanequiaari. Mueya tacaretaquiaariuhua Israel jiyajiniohuara na nucuatajaari. ²² Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriquiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijuhuaj, Pueyasoori na niishitioquiaari na maquenujiniya, tamocora na quianura. Naaratej, Joseeri mueya nucua pacuquiaari Galilea jiyajiniara.

²³ Galilea jiyajinia nojori tiuquiiijosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujiuniaa sequesanoori tohuateequiaari nojori jaara naa naajioaquiaaritij:

“Jiyaniquishaanutaniyari Nazaret tiacajinijinio pueyano”.

3

Tiuquinijiona Juan pohuatasacari cariiquia jiyajinia
(Mr 1.1-8; Lc 3.1-9, 15-17; Jn 1.19-28)

¹ Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. ² Naa pohuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooni paniya, na muerasu nia quiniuria seetanujuanaa.

³ Jiyanohua tarijia, Pueyasoori na pueyano Isaías pohuataniquiaari miriqui na sequenu panishano pueyara. Isaíasri naa na pohuataquiaaritij:

“Pueyano rupaari tojishaaree cariiquia jiyajinia. Naa nacajoriquiaari: ‘Nia jeeccanamitiri Jiyaniijia nuu, maja mojoquetunu na quiniuria’ ”.

Tiuquinijiona Juanjanaacuajaari nio tariucuacaanu pohuatasano tohuateequiaari, pueya na niishitiojosacari nojori jeenucuanura nojori jiuujía Jesuucujaji.

⁴ Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuratasano sequeru, samiyatunio. ⁵ Pueyari Juancua quiojoquiaari na tojitianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuj, puetunu Jordán moo shocuaqueyajinijiojuanaano. ⁶ Pueya jaara pohuataquiaari Juan niquiara

sesa nojori miijosano, Juanri nojori tiuquinijioquiaari Jordán moojinia, Pueyaso tojjiara nojori quiniu panishacari.

⁷ Na tiuquinijosacari pueya, Juanri queraatia Fariseocuaca niquiquiaari nocua nijiyano, Saduceocuacanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia numooteree nia mashiniuria Pueyaso saniitionuucujaji niajaniani? Nio pa quishacarini, quera Pueyaso sanitiosacari jiyanohua na ruuretajaca pueya. ⁸ Niaa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jiyaniniu niaari Pueyaso muerasu, Abraham niquiohuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiohuara shipininiu nio saijinijijiuhuaj. ¹⁰ Nio miriqui sequesano nia tojirijiuhuaj pueyanaa. Naana jaara maninia jajau muetuyaquiri, na camaruuri na nuya na catijasocoriquiano. Naa-juhuaj, Pueyasoori quera saniitionutaniya niajaninya, na tojijashijiaca nia quiniuucua.

Tiuquinijiona Juanri pueya sequequiaari socua:

¹¹ —Janijari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanohua socua jiyaniijajanaa janiyajiniji. Janiya maara jiyanohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniji. ¹² Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua,

jiyocuaaanuji na totinijasocoriquiano. Naa miiquiaari paratu cuaara paara na cocua, na sucuanio, na jajau na racatanura tijiniaaco. Naajuhuj, cua nuhuaji niniaari tariucua pueca, na tojitianaa na rijionura na quiquio-jiniara, saniniuujia na tojiyashijiaca na quejoonura manijinia na saniitionura, tee mani maquesaaquiyacuajani.

Jesu tiuquinishacari moojinia
(Mr 1.9-11; Lc 3.21-22)

¹³ Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeseeri:

—Cua tiuquinirijia.

¹⁴ Juanri saaja na sequeree:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequerejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacujitij, Juanri na tiuquiquiaari. ¹⁶ Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mocoonu niquishano. Nocua tiuushiiri. ¹⁷ Jiyacaritij, jiyocuaaanuji Pueyaso rupaari tojishaaree naa sequeyano:

—Niiori cua Niyanuniyojua. ¡Na shuquiritiaa jiyanohuanijia!

4

Samaruhua jiyaniijia saniniujiushacari Jesu
(Mr 1.12-13; Lc 4.1-13)

¹ Na nuhuaji, Pueyaso Sohuanuuri Jesu jiyataquiaari cariiquia jiyajiniara, Sesaaca saniniujiushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³ Sesaacaari jiyacari nocua niquiaari na saniniujiuniuria. Jesu sequeseeri:

—Quiaa jaara seetanjuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riucuaaree:

—Maja. Pueyaso Rupaajiniacujaari naa naajiotasano quiyatej:

“Pueyanoori maja na naatanu saa miaquesanoocuja. Seetanjuanaa saminio quiya cutaraari na fojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuaaanuuri, Pueyaso Secojoua tia cacojiria. ⁶ Na sequereeri:

—Quiaa jaara seetanjuanaa Pueyaso Niyanu quiri, ni-iquiji quia jaataare jiyocua. Pueyaso Rupaajiniacujaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniucujaji”.

⁷ Jesuuri na riucuaaree:

—¡Maja! Pueyaso Rupaajinia, naa naajiotasanoori quiyajuhujaj:

“Maja quia saniniujiuniu quia Jiyaniijia Pueyaso”.

⁸ Na nuhuaji, Sesaacaari Jesu tacaniquiaari socua jiyanohua jiyaconaja tuhananuucua. Cuniqiji na niqitirii puetunu jiya jiyaniijiacajanaari. Jiyanohua cumaacaraca quijiaca. Jiyanohua queraatia casamiriaca quijiacajuhujaj. Jiyanohua maninia niquishano. ⁹ Jesu sequereeri:

—Janiyacua quia jiyatere jiyaniijiajanaara nojori nitini, quiaa jaara cua cariquimiaji mojoquetare quia shuquiri-tianura janiya, quia jiyaniijia cua quiniuria.

¹⁰ Jesuuri na sequeree:

—¡Niiquiji quia quiaare Satanásnaa! Naa naajiotasano quiyacujaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niqiaari na mianuutenura.

Jesu coteesacari poonijionu Galilea jiyajinia

(Mr 1.14-15; Lc 4.14-15)

¹² Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaariuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquiohuacuajinio supueno pueya jiya, Neftalí niquiohuacuajinio supueno pueya jiyanio. Zabulón, Neftalínio, nojoriiri supuetana Jacobo niquiohua quiquiaari. ¹⁴ Jesu quishacari cuno jiyajinia, naa tohuateequiaariiri taa tariucuacaanu Pueyaso sequesano caminiujiunia Isafas pohuataquiaari cuno jiyajinijicujani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohateenutaniyani:

¹⁵ “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacujani. ¹⁶ Cuno jiyajinia quiniaari ninishiqui quijiaca quiquiaari. Quiarjia saniniuujia, nojoriiri jiuujia Cuhuatana niquiriucuaa. Nojoriiri cusonu pueretujuaca

quiquiaari tarijia. Quiarjia cutara nojoriiri cuhu-
atasaaree nojori puereyaquiniuucujaji”.

¹⁷ Jiyacaritij, Jesuuri Pueyaso rupaa pohuatano cotee-
quiaari. Naa sequequiaariiri:

—Nioojia nia tacatore sesa nia miiniujiniji. Pueyasoori
nia paniya na pueya nia quiniuria.

Jesu saquiriojosacari sapitiaaja ritianaa

(Mr 1.16-20; Lc 5.1-11)

¹⁸ Jesuuri Galilea caminia shuriuquioco
rucuanejoriquiaa. Jiyacaritij, Pedro niqiriiri, tarajanu
Andrésnio. Pedro sesa quiquiaarijuhuaj Simón. Nojoriiri
sapitiaaja ritianaa quiquiaari shiyaruta. Nojoriiri jiyacari
shiyaru jaquerooriquiaa. ¹⁹ Jesuuri nojori sequeree:

—¡Miji! Cua tarajare. Cua pueyara nia quiri. Janiyacua
nia jiyatere pueya quioojuara saniniunijia, juhua sapiti-
aaja quioonaa.

²⁰ Nojoriiri na shiyaru tiujiaquiaari ritia. Jesuta quioji-
yareeri.

²¹ Jesuuri shiitianiyojua socua rucuanequiaari na tacoji.
Socua caapiqui pueya riuriataseeri. Nojoriiri quiquiaari
Santiago, tarajanu Juannio. Cuno pojori queeri quiquiaari
Zebedeo. Nojoriiri na queta quiriquiaa botejinia. Na shi-
yaru cushipirijionuuriquiaari. Jesuuri Santiago sequeree
Juannio, na pueyara nojori quiniuriajuhuaj. ²² Nojoriiri
ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya

(Lc 6.17-19)

²³ Jesuuri puetunu Galilea jiyajiniajanaa
rucuanejoquiaari na saquiriojosano pueyata. Pueyaso
secojojua tiacajiniaqueya niishitiojoriquiaari. Pueyaso
rupaa pohuatariquiaari taa Pueyaso jiitianu paniya
maninia na pueyani. Puetunu tamaatia cusonuunu
jiiticojuajanaa naatanijioquiaariiri. Puetunu
nootunejaca pueyajanaa shaataquiaarijiaarijuhuaj.

²⁴ Naa maninia na miishanoori poojotasaaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhujanaa, puetunu tamaatia cusonu jiitiajacajanaanio, cumatacuruhuana cusosuhujuhuj, nootunejacanio. Nocua jiyatasaaquiaarijuhuaj samarhuaraca quijiaca, canashiyaquiji cusojonuujuacanio. Jesuuri nojori naatanijioquiaari puetunujuanaa. ²⁵ Jiyanoehua queraatia pueyari Jesu nuhuajiquiaari Galilea jiyajiniji, Decápolis tiacajinijinio. Na nuhuajiquiaarijuhua Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijinionio.

5

Jesu pohuatasacari Pueyaso rupaa tuhuananujiniji (Lc 6.20-23)

¹ Jesu niquishacari jiyanoehua queraatia pueya nocua niyano, nojuajaari tuhuananuucua tacaquiaari tiji na cajiniuria. Na saquirojosano pueyari nocua catecanoquiaari. ² Jesuuri nojori niishitiojonu coteequiaari. Naa na pueya sequereeri:

³ —Shuquiriaatia quijiaca cutaraari noo pojori, canapete niishiyani noojia sesa quiya. Nojoriiri Pueyaso pueyara quiriqiano, pueyaracaanu na jiitianura nojori.

⁴ Shuquiriaatia quijiaca cutaraari noo pojori canapete taraatia quiyani sesa na miiniuucua. Pueyasoori nojori cumanijianutaniya.

⁵ Shuquiriaatia quijiaca cutaraari noo pojori, canapete maja tama nerajaaja niishiriojuacani. Nojoriiri nio jiya camaruhua quiniutianiya, taa Pueyaso sequeriquiaaricujani.

⁶ Shuquiriaatia quijiaca cutaraari noo pojori, canapete maninia quiniuucua jiaatiaa jiyanoehuanii, taa pa jiaatiaacuaa miaquenuucuanii. Pueyasoori maninia quijiacara nojori jiyatenutaniya.

⁷ 'Shuquiriaatia quijiaca cutaraari noo pojori, canapueete naquiya miishanoocua taraajejani. Pueyasoori nojoriicua taraajenutaniyajaacuhuj.

⁸ 'Shuquiriaatia quijiaca cutaraari noo pojori canapueete maninia jiuujiaracani. Nojoriiri Pueyaso niquniutianiya cutara.

⁹ 'Shuquiriaatia quijiaca cutaraari noo pojori, canapueete pueya jiyanootejani. Nojoricuajaari Pueyaso muerasu quiniutianiya.

¹⁰ 'Shuquiriaatia quijiaca cutaraari noo pojori, canapueete naquiya miishanoni, Pueyaso panishano nojori miiniucua. Pueyasoori nojori jiitianutaniya pueyaracaanu shuquiriaatia, na muerasu nojori quishacari.

¹¹ 'Shuquiriaatia quijiaca niajaniya, tamasaca jaara nia macaatiri cua tojtiajaca nia quishacari, naajuhuj, nojori jaara miya naquiya niajaniya. Naajuhuj, niaari shuquiriaatia quijiaca, nojori jaara saquiriojotare niaacuara na sapojonuta, maninia nia tojiniuucua janiya. ¹² Naa jaara naa miishaaretej, jyanohua nia timiquiore. ¡Shuquiriaatia nia quirijuhuj! Pueyasoori cunora jyanohua maninia nia miiniutianiya jiyocuacaanu nia quishacari nata. Tariucuacaanu Pueyaso sequesano caminiujuniaacuajaari naa naquiya miishaaquiaarijihuj, nia supueyaquishaacarijijojua.

Pueyaso muerasuuri juhua shoni quiya mijiria, juhua ninishiqui cuhuatanaajuhuj

(Mr 9.50; Lc 14.34-35)

¹³ 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriiquia jatama, ¿maatucua taa tiquiriiquiara quiriohuani? Maja na naata. Shoni jaara naa quiriritij, najuhuana quiyari, shaaca. Jiyano shoni cuaara jataaaria nuujinia, pueya rapijosocoriquiano.

¹⁴ 'Naajuhuaaj, niaari juhua ninishiqui cuhuatana mijiria quiniaara. Tiaca jaara tuhananuucua quiri, majaari na naata na jamaaniu. ¹⁵ Naajuhuaaj, pueya jaara samaritiu noshitiri, jiyocuacaanu morotashiyari, tiaco na cuhuatanura maninia, pueya niquiniuria maninia nocuaji. Majaari samaritiu niatasaanu conatu cariquiaco. ¹⁶ Naajuhuaaj, niajaniya cuaara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari Jiyocuacaanu Quijia nia Que Pueyaso maniniuhuaqueetanuniya.

Jesu niishitiojosanoori tariucuacaanu Moisés Rootasanojiniji

¹⁷ 'Majaari nia jiyaniniu janiyari niquiaarini Moisés Rootasano cua tarinitiniuria niajaniya, Pueyaso sequesano caminiujiuniaa rootasanoñio. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuaaj. ¹⁸ Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari quenaaja niquiriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajiotesanajuanaa cuaara tohuateerejaatijia. ¹⁹ Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuaana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuaaj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijijianaa. Saniniuujia, cante tariucuacaanu Pueyaso rootasano tojiquiaanijia, na niishitiojoquiaa tamasacajaariuhuaaj, cuno pueyanoori

socua tojishano pueyano quiniutianiya Pueyaso shuriucua jiyocuacaanu. ²⁰ Nia numooteyanijia, niaa jaara quiyaquiri socua maninia quijiaca Fariseocuacajiniji, Moisés Rootasano niishitiojonaajinijinio, majaari Pueyaso muerasu nia quiniu quiniutianiya.

*Jesu niishitiojosano maja pa juaaniuria
(Lc 12.57-59)*

²¹ 'Niaacujaari tojiqiaari taa pa supuetanaa seque-saaquiaaricujani: "Maja monu. Cante pueyano monani, nojuajaari nequesoreesaanutaniya". ²² Janiyari saniniu-ujia nia niishitiojiyani, cante narta pueyanota juaajiani, cunoori nequesoreesaanutaniya. Naajuhuj, cante narta pueyano saarijiojuani, cunoori nequesoreesaanutaniya jiyaniijianucua niquiara. Naajuhuj, cante narta pueyano sesacareeni, cunoori quera jatashiya mani quiquiojinia, pueyaracaanu saniitiosocoriquiano.

²³ 'Naacuajitij, nia niquitionu panishacari Pueyasora nia casaa, niaa jaara jiyacari niishiquii, quiaari quiarta pueyano juaatiriucuaa quiocuara, ritia quia tiujiare cuniqui quia niquitiosocoriquiano Pueyasora, catijiaja shuriucuanii. ²⁴ Quiarta pueyanota quia jiyanootiocoocuara coteenu. Na nuhuaji cutara quia naata niquitionu quia casaa Pueyasora.

²⁵ 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohutare ritia nojuaja, taa quia miiniutianiyani na jiyanooniuria quia-janiya. Ritia nia jecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejojua camarnu saniniuujia. Nojuajaari quia nujuatenutaniya nujuatejojuaajinia. ²⁶ Seetanujuanaa nia sequeyanijia, majaari quia tohuatanu quiniutianiya, quiaa cuaara niquitiojeaatijia puetunu na sequesano cumaneecajanaa quia cumaneecajiniji.

Jesu niishitiojosano, maja pa camishoo maajiicua pa jiaati-aquiniuria

²⁷ 'Niaacuajaari tari tojiquiaari nio tariucuacaanu rootasano: “Maja tamonu niquiocua numuetucunu”.

²⁸ Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹ Na nuhuaji, Jesuuri nio miriqui sequesano sequequiaari pueyara, jiyanohua na niishitiojonura nojori:

—Naaratej, quia miaquetajara quia namijia jaara sesa miitiri quiajaniya, quia namijia quia jiatere. Tamocora quia jatare. Quiajanियara socua maninia cutaraari namijijiu quia quiniuria, maja quia jatasaanura mani quiquiojinia puetunu quia cuaqueyatajanaa. ³⁰ Naajuhuj, quia miaquetajara quia numatu jaara quia miitiri sesa, quia jiyatarenj. Tucuacaanu quia jatare. Socua maninia cutaraari quiara quia jiyatanura quia numatu, maja puetunu quia cuaqueyatajanaa quia jatasaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

*Jesu niishitiojosano maja pueya cartenura necocua
(Mt 19.9; Mr 10.11-12; Lc 16.18)*

³¹ Jesuuri naa niishitiojoquiaarijuhuaj:

—Pa supuetanaari naa rootasaaquiaarijuhuaj: “Pueyano jaara necocua cartere, maaji cuara niquitiosaaria naajionee, pueya niishiniuria neyacaqui na carteree”. ³² Janiyari saniniuujia nia sequeyanijia, pueyano jaara necocua cartere, sesa miya Pueyaso niquiaraari. Naacujitij, na cartesano maajiiri tamonuta quiniutianiya na nuhuaji. Cunoori sesa Pueyaso niquiara. Pueyano jaara niishiri necocuaari tamonu caya numuetucujutequiaa, saa cunoraja cutara na naata

na cartenu. Pueyanoori sesa miyajuhuaj, jaara cartesano maaji camiri.

Jesu niishitiojosano maja pa sapojonura

³³ 'Niaari tarijia tojitiaquiaari taa pa supuetanaa rootasaaquiaarini. Naa rootasaaquiaariiri: "Majaari nia jatanu nia sequesano, niaa jaara sequere: 'Seetanujuanaari cua sequesano. Pueyasocujaari niishiya majaari cua sapojonu' ". ³⁴ Janiya cutaraari nia sequeyani, nia sequesano jaara seetanujuanaa sequesano quiri, saaja nia sequere "jaa". Jaara seetanujuanaa quiyaquiri nia sequesano, saaja nia sequere "maja". Majaari nia sequesano nia maatenu najuhuaana naatej: "¿Janiyate sapojuani? Cua rupaari juhua jiya cajiniocua. Maja na jatanu quiniutianiya". Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? ³⁵ Naajuhuaj, ¿casaara nia sequequiaa najuhuanani: "Cua sequesanoori juhua pa jiya? Majaari na shaajenu quiniutianiya". Maja naa sequenutej. Pa jiya, cunoori Pueyaso niaja na niohuaca. Naajuhuaj, ¿casaara nia sequequiaani: "Cua sequesanoori juhua Jerusalén tiaca? Pueyaracaanu quiniutianiyari". Maja naa sequenutej. Jerusalén tiacaari pa Jiyaniijia Pueyaso tiaca. ³⁶ Naajuhuaj, ¿casaara nia sequequiaa naa najuhuanani: "Quia naataari cua sequesanoocua tiuuniu, cua naca quishacarijia"? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumuecaranio. ³⁷ Naaratej, pueyaracaanu saaja seetanujuanaa nia sequere "jaa", "maja". Cante na sequesano maatejani, cunoori Sesaaca niishitiojosano nijaniya.

*Jesu niishitiojosano maja pa naminiuria
(Lc 6.29-30)*

³⁸ 'Niaacujaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuartasaariajuhuaj, pueya nequesoreenaa niquiara. Naajuhuj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaj”. ³⁹ Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacujitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. ⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niqutiore nareja. Majaari jamueja quia quiniu. ⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijonu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. ⁴² Tamonu pueyano jaara quia casami masenu paniya nera, quia niqutiore nareja. Naajuhuj, tamonu pueyano jaara quia casaa panu paniya nareja rupaquijjara, quia niqutiore. Majaari na ruuretanu. Capora quia quiri.

Jesu niishitiojosano pa paraca pa paniniuria

(Lc 6.27-28, 32-36)

⁴³ 'Niaacujaari nio tariucuacaanu sequesano tojiti-aquiaarijuhuaj: “Quia shuriucua quinia quia paniri. Saniniuujia, majaari quia paraca quia niqiniu”. ⁴⁴ Janiya cutaraari nia sequeyani, nia paraa nia paniri. Nia sesacaja pueya nia maninihuaqueetare pueya niquiara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaj. ⁴⁵ Naa maninia nia miishacaritij, niaari seetanujuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara

na janurajuhuj. Pueyasoori maru nitiquiaa maninia miijiaca pueyara, sesa miijiacarajuhuj, maninia nojori nataacuaca moritianura. ⁴⁶ Niaa jaara saaja nia panijaca pueya panijia quiriqia, ¿Pueyasoteeri cunora nia shuquiritianutaniya, socua na casaajiniji na niqutionura nijaniya? Maja. Sesa miijiaca pueyani, noo pojori canapue te cumaneeca masejoquiaa na sajonutani, nojoriiri maninia miiquiaa na panishano pueyajuhuj. ⁴⁷ Niaa jaara saaja nia panishano pueya saruhuataquiaa, ¿niaateeri cunora maninia miijiaca quiya Pueyaso niqiara? Maja. Pueyaso niishiyashijaca pueyari naa maninia miiquiaa na panishano pueyajuhuj. ⁴⁸ Naaratej, maninia miijiaca nia qiri juhua jiyocuacaanu Quijia nia Que Pueyaso. Nojua-jaari seetanujuanaa maninia miijia. Rimiajata miyashijia cutara.

6

Jesu niishitiojosano saaja maninia pa miiniuria Pueyaso niqiara

¹ Tama nia cuaqueyajaaja nia cojuare maja maninia nia miiniuria saaja pueya niqiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniuucua, nia Que Pueyasoori maja na niqutionu quiniutianiya nijaniya socua, maninia nia miiniuucua. ² Naaratej, niaa jaara casamijiuniucua pueya niqutionu paniri nareja nia casamijiniji, majaari juhua sesa jiuujaraca pueya nia miiniu. Cuno pojoriiri pueya numootequiaa na niqutionu panishacari na casaa, puetunu pueyajanaa shootianura nojori. Cuno pojoriiri naa miiquiaaqui Pueyaso secojojua tiacajinia, tiacaacacajuhuj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya

maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. ³ Saniniuujia, niaa jaara nia casaajiniji casamiji-uniucua niqutionu paniri nareja, quia mueneca cuaara niishiyaquiiria quia niquticosano quia miaquetajata. ⁴ Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacuajitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niqutionutaniya na casamijiniji, na shuquiritiasacari nijaniya.

*Jesu niishitiojosano naa pa secojonura Pueyaso
(Lc 11.2-4)*

⁵ Nia secojosacari Pueyaso, majaari juhua sesa jiuujaraca pueya nia miiniu. Cuno pojoriiri Pueyaso secojonu maniniucuaquiaa na njuanuta pueya niqiuara, saaja pueya shootianura nojori. Nojoriiri naa secojonuuquiaa Pueyaso secojojua tiacajinatej, tiaca nuucuajiniajuhuaj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasareecuaja. Jiyano pueyatej, majaari nojori masenu quiniutianiya socua Pueyasojiniji. ⁶ Nijaniya saniniuujia, nia secojosacari Pueyaso, nia sohuacamara nia tiuquiri. Nia tiootiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niquishacari naa jiyasohuaja nia miishanotej, nojuaja cutaraari nia niqutionutaniya na casamijiniji, na shuquiritiasacari nijaniya.

⁷ Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijia. Cuno pojoriiri jiyaniya Pueyasoori nojori tojiniutianiya pueyaracaanu na pacutejosacari tariucua na sequesano. ⁸ Majaari juhua nojori nia miiniu. Pa seco-

jijaquishaacarijiyojua, pa Que Pueyasocujaari tari niishiya casaa pa paniyani. ⁹ Naaratej, naate nia secojore:

“Canaa Quenaa, quiaa cutaraari jiyocuacaanu Quijia. Pueya cuaara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jiitiana. Quia panishano cuaara miishaaria mijiria, taa jiyocuacaanu na miishaaquiaacuaani. ¹¹ Canaa quia niqutiore canaa miaquesocoriquiano quiarijiani. ¹² Canaa quia jiyanoori sesa canaa miishanojiniji, taa canaa jiyanooquiaa tamasacuaani, sesa nojori miishacari canaa. ¹³ Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaacacuaji. Saaja quiajaniya cutaraari seetanujuanaa Jiyaniijiajanaa. Quiaa cutaraari puetunu cumaacaracajanaa. Quiaari shanohua shacantuca quijia cutara. Quiaari naa quijia pueyaraanutej. Tariucuaja”.

¹⁴ Naatej, niaa jaara jiyanoori tamasaca, sesa na miishacari niajaniya, nia Que Pueyasoori nia jiyanooniu-tianiyajuhuj. ¹⁵ Saniniuuja, niaa jaara tamasaca jiyanooyaquri, nia Que Pueyasoori maja na jiyanooniu quiniutianiya niajaniyajuhuj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa secojonura

¹⁶ Naa jaara miaqueyaquiya Pueyaso nia secojonura, majaari macuhuajeconu pueya niqiara, taa sesa jiuujaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutaranijia, narta pueyari tari nojori maniniuhuaqueeta-reecuaja. Majaari Pueyasojiniji nojori masenu quiniutianiya socua. ¹⁷ Niajaniya saniniuuja, nia miaqueyaquishacari Pueyaso nia secojonura, nia jiquioco nia jee-

quere. Nia canuure nia muesu, taa nia miiquiaa pueyara-caanucuajani. ¹⁸ Naa nia miiri Pueyaso nia secojosacari, maja pueya niishiniuria cunoqui miaajeya. Saaja pa Que Pueyaso cutara cuaara niishiiria nia miishano. Naacua-jitij, nojuajaari nia niqutionutaniya na casamijiniji na shuqiritianuucua nijaniya.

*Pa casami pa racatare jiyocuacaanu Pueyaso shuriucua
(Lc 12.33-34)*

¹⁹ 'Pueyanaa, maja mijiria nia racatanu nia casami najuhuanaj. Saaja capora nia quiri cutara. Mijiria pa racatasacari pa casami, surequeyari na miaquenu-taniya. Tiyarashiniutianiyajaariuhuj. Nohuasenuujua-caari nocua tiuquiniutianiya na nohuasenura. ²⁰ Nia racatare cutara nia casami Pueyaso shuriucua jiyocua-caanu. Tii cutaraari shaaqui surequeya, shaaqui ti-yara. Naajuhuj, nohuasejojuuari maja na naata nocua tiuquiniu tii, jiyocuacaanuji nia casami na nohuasenura. ²¹ Niaa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasocua niishiriojonutaniya. Majaari nia tacaaniu quiniutianiya mijiria casaacua tari.

*Pa cuaqueyajinia cuhuatanajiniji pohuatasano
(Lc 11.34-36)*

²² 'Pa namijiaari juhua poojia cuhuatana. Naacua-jitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. ²³ Niaa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaati-aja quiri, nioojiaari socua ninishiqui quiya cariojuaru pueyanojiniji.

*Pueyaso panijia pa quiri, maja cumaneeca panijia
(Lc 16.13)*

²⁴ 'Maja nia naata poonijionu maninia caapiqui camar-nura. Níaa jaara caapiqui camarnuraca quiri, níaari tamonu paniniutianiya, níaari saniniuujia tamonu niqiniu paniyaquiniutianiyacujua. Naacuajitij, níaari shuquiri-aatia poonijionutaniya nia panishano camarnura. Ní-aari tamonu soojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuaj.

Pueyaso na muerasu cojuaja

(Lc 12.22-31)

²⁵ 'Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutaniyani. Pueyaso jaara pa shipiniquiaari pueyano pa quiniuria, ¿majateeri na niqitionu quiniutianiya pa miaquenu panishano, pa cushiniu panishanonio, maninia pa rishiniuria? Taaquiririnij. ²⁶ Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na mijajaura. Naajaa, pa Que Pueyasoori nojori niqutioquiaa na panishano. Nia niishiri. Níaa cutaraari socua Pueyaso panishano cuno jiyocuacaanu jaacuatujuacajiniji. ²⁷ ¿Nia naatate socua jiyaconajara maashiniu, jiyanhua nia tacaaniutia? Maja.

²⁸ 'Naajuhuj, ¿casaara nia tacaquiaarini nia niishiri-ojosacari casaa nia cushiniutaniyani? Naana shuucua nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitajara shitianujuhuaj. ²⁹ Seetanujuanaa nia sequeyanijia, pa supuetanaa jiyaniijia Salomónri jiyanhua shanhua toqueya cushijia quiquiaari. Naajaa, na toqueeri maja socua shanhua niqishano quiquiaari cuno naana shuucua-jiniji. ³⁰ Naana shuuri saaja rupaquijia shanhua niquis-

hano. Jaara sorere, namitiashiyari catijiasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijiasocoriquianonio. Nojuaja jaara naa shanohua naana shuucuaaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasooaarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenu-taniyani?, ¿casaa pa ratunutaniyani?, ¿casaa pa cushiniutaniyani? ³² Pueyaso niishiyashijiaaari naa sequejatej, puera nojori tacaashacari puetunu na panishano casaacuajanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³ Naaratej, coteenu nia niishiriojore Pueyaso tojijia nia quiniuria cutara. Pueyasocua nia niquitiofe puetunu nia panishanojuanaa. ³⁴ Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucuaaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasooaarini nia tiuuri, juhuajaniya nia quiniuria.

7

*Majaari quiarta pueyanoocuara soqueto nia quiniu
(Lc 6.37-38, 41-42)*

¹ 'Maja niarta pueyano nia soquenu najuhuanaj, Pueyaso mariqui nia jiyanoyaquirijiaariuhuj.
² Taa nia sesacaquiaa tamasacacuaani, niaari naa sesacaanutaniyajuhuj. Naatej, taa nia miiquiaa tamasacacuaani, Pueyasoori mariyata naa miiniutianiya nijaniyajuhuj. ³ Nio miriqui cua sequesano nia tojiri. ¿Casaara nia niqiuia rucucua nia tarajanu namijajiniani, niaa jaara puereetuuca maca jiiitaa tama

nia namijiajiniajaaja cutara? ⁴ Maca nia jiihiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”?

⁵ Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jecare coteenu, na nuhuaji cutara niocua maninia nacasure niarta pueyano.

⁶ 'Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa nijaniyacuaani. Majaari Pueyaso soojeaca nia pohuatanu Pueyaso miishano shanohua nijaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej

(Lc 11.9-13; 6.31)

⁷ Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuriatanutaniya. Tohuateyaji nia piquiri, niaacuajiiri ri-atasaanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuj, cante pajejani, na panishano riuriatanutaniyari. Cante tohuateyaji piquijiani, nocuajiiri riatasaanutaniyajuhuj.

⁹ 'Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰ Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹ Nijaniyari sesa miiniu niishijia. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyanoohua socua maninia niqutionu niishijia, na muerasu secojosacari nojuaja.

¹² Pueyaracaanu maninia nia miiri tamasaca, taa nia paniquiaa pueya miiniuria nijaniyacujani. Niaa jaara maninia miiriquia nio cua sequesano, niaari tari tojitiaa maninia puetunu tariucuacaanu Moisés Rootasanojuanaa, tariucuacaanu Pueyaso sequesano caminiujiuniaa rootasanonio.

Pueyasooeua nuuri secanuniyojua
(Lc 13.24)

¹³ Pueyasooeua neteja nuu nia pajere, shiitianiyojua nuuri tuneja. Saniniuujia, puereetuuca nuuri neteya mani quiquiojiniara. Puereetuuca na tuneja. Puereetuucari neteya, carianujuhuj. Naaratej, queraatia pueyari juhuajaniya cuno nucuaco quiojiya saniitiosocoriquiano.

¹⁴ Saniniuujia, shiitianiyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanoehua shiitianiyojuaari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujiniji
(Lc 6.43-44)

¹⁵ Tama nia cuaqueyajaaja nia cojuare sapojonuujua-caacuaji, noo pojoriicuaji canapuate najuhuaana sequesacuajani: “Pueyaso Rupaa pohuatananijia”. Nojoriiri sapuenu juhua maninia pueya niquishano, nojori sapojonura nijaniya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶ Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohuajaru? Maja. Naajuhuj, cuno sesa jiuujiaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhuj, sesa naanaari maja na

naata maninia jajau muetunu. ¹⁹ Naana jaara sesa jajau muetujua quiri, nushiyari, manijinia catijiasocoriquiano. ²⁰ Naacuajitij, niocua cuno sapojonuujuaca pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya

(Lc 13.25-27)

²¹ 'Cuno pojori canapujete cua sequejacani: "Cua Jiyaniijanaa, cua Jiyaniijanaa", noojiaqueya nojorijini-jinioori maja nojori tiuquitianu quiniutianiya cua Que Pueyaso quiqiojina. Saaja seetanujuanaa cua Que tojitiajaca cutaraari nocua tiuquitianutaniya. ²² Cua nequesoreesacari pueya nio jiya puequesacari, queraatia pueyari cua sequenutaniya: "Cua Jiyaniijanaa, cua Jiyaniijanaa, canaacuajaari quia rupaa pohuataquiaari pueya niqiarani. Canaa sequesacari quia sesa, canaari samaruhua tohuatanijioquiaari quia cumaacatani. Naajuhuaaj, canaari cusosuhua naatanijioquiaarini quia sesa canaa jiyaniquishacari". ²³ Janiyari saniniuujia naa sequejaca riucuanutaniyani: "Maja cua niishiniu nijaniya. ¡Nia quiojorohua! Niaari saaja sesa miijiaca quiquiaari".

Jesu tojitiajaca miishanoori pueyaracaanu rishiniutianiya cutara

(Mr 1.22; Lc 6.47-49)

²⁴ 'Naacuajitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵ Na nuhuaji, maruuri jyanohua niqiaari. Moori pajaashiquiaari. Paratuuri jyanohua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶ Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquijajinia

tiaquiaari. ²⁷ Maruuri jiyanoḥua niqiaari. Moori pa-
jaashiquiaari. Paratuuri jiyanoḥua piyarojoquiaari cuno
tiaacuara. Cuno pueyano tiaari pojotaquiaari. Na ca-
maruuri jiyanoḥua taraatia quiquiaari na tia pojotasacari.

²⁸ Jesu jaara niishitiojonu puecaquiaari, pueyari
jiyanoḥua jiuujiateriquiaa na niishitiojosano
nojori tojishacari. ²⁹ Pueyari naa jiuujiatequiaari
seetanu cumaacatajanaa Jesu niishitiojosacari juhua
jiyaniijijajanaa, maja juhua Moisés Rootasanojiniji
niishitiojonaa. Cuno pojoriiri nareja tariucuacaanu
rootasano caminiujuquiaari pueyaracaanu.

8

Jesu naatanishacari sesa cusonu jiitiaja

(Mr 1.40-45; Lc 5.12-16)

¹ Jesu jaara tuhuananujiniji rosequiaariuhua na co-
jiniiaata, jiyanoḥua queraatia pueyari na nuhuajiriqiaa.

² Tamonu pueyano cusosuuri jiyacari Jesuucua cate-
canoquiaari. Jiyanoḥua sesa cusonu jiitiaquiaariiri.
Tahue rupaajinia, cuno cusonu sesaari quiquiaari “lepra”.
Pueyano shuuri juhua miaquesano quijia na cuaque-
yajinia cuno cusonu na jiitiasacari. Cusosuuri Jesu
cariquimiaji mojoquetaquiaari Jesu na sequenura na pan-
ishano. Naa na sequereeri:

—Jiyaniijijanaa, quia jaara paniri, niishiyacuajanijia
quia naata cua cusonu cushiritiniu.

³ Jesuuri nocua taraajequiaari. Nocua niaree na
juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

Jiyacaritij, ritia cushiriiquiiri! Jeequerohuari. ⁴ Na
nuhuaji, Jesuuri naa na rootaquiaari:

—Cua tojiri. Maja tamasaca niqiara quia pohuatanu
cua miishano quiajaniya. Saaja Pueyaso secojonaa jiyani-
ijia quia cuaqueya quia niqitiri, na cartenura quiajaniya,

pueya tajinia quia rucuanefonuhua juhujaniya. Na nuhuaji, ritia quia niquitioe quia seru Pueyasooacara catijiasocoriquiano. Naa quia miiritij taa Moisés niishitio-joquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequerohua quia cusonujiniji.

*Jesu naatanishacari Romano capitán seru
(Lc 7.1-10)*

⁵ Jesu jaara tiuquiquiaariuhua na pueyata Capernaum tiacajiniohua, Romano soldadohua jiyaniijiaari Jesuucua niquiaari na secojonura Jesu. ⁶ Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyanohua naquiya miya na noonutaari.

⁷ Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

⁸ Soldadohua jiyaniijiaari na riucuaaree:

—¡Maja jiyaniijianaa! Janiyari maja pueyano manini-uni, cua tiajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiy-acuajanijia, quiaari na shaatanutaniya saa quia rupaataja. ⁹ Janiyari jiyaniijiaracajaniuhuj. Na tojiquiaanijia. Naa-juhuaj, cua soldadohuari cua tojitiaquiaajuhuj cua sequesacari nojori. Naacuajitij, janiya jaara tamonu sequereni: “Quia quiaare”, cunoori ritia quiaquiaa. Naa-juhuaj, janiya jaara tamonu sequereni cuaara niiria, cunoori ritia niya cucua. Janiya jaara cua pataco seru sequereni cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequesantej, jiuujiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niquiniu quiquiaa Pueyasooocua tiuujia cutara, juhua nio tahue! ¹¹ Seetanujuanaa nia sequeyanijia, queraatia taucuacaari Pueyasooocua tiuujiaa quiniutianiya juhua nio tahue. Nojoriiri tu-cuacaanuji nijionutaniya pananu muetasamaji, pananu tiuquishocojijiuhuj. Nojoriiri pa supuetanaata cajitiu-niutianiya na miaquenuunura Pueyaso shuriucua. Tii quiniutianiya shuquiriaatiaari pa supuetanaata: Abrahamta, Isaactajuhuj, Jacobotanio. ¹² Parta Israel pueya, canapuete Abraham jiniuanuucujinino supuenoni, nojori-iri saniniuujia tamocora quejoosaanutaniya ninishiqui, nojori tojtiaaquiniuucua Pueyaso. Nojoriiri tii sariyocuatunutaniya naquiya na miishacari. Na quiaa miaquenuunutaniyari na noonuta. Nojoriiri juucua saquirio-josaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiniuanuucujinino nojori quishacari.

¹³ Na nuhuaji, Jesuuri cuno soldadohua camarnu sequequiaari:

—Quia tiajinia quia quiaarohuaqui. Cuaara quiiriaqui taa quia sequereecuajani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua

(Mr 1.29-31; Lc 4.38-39)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵ Jesuuri na juaashiquia quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya

(Mr 1.32-34; Lc 4.40-41)

¹⁶ Shusha ninishacari cuno juucaja, cuno tiacajini-jinio pueyari queraatia samaruhuaraca pueya jaatucunuuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhua-janaa naatanijioreejaariuhuj. ¹⁷ Naa tohuateequiaariti supuetana Isafás naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujuanaa na jatanura”.

*Tamasaca pueya quiniu panishacari Jesu pueyara juucua
(Lc 9.57-62)*

¹⁸ Jesu jaara jiyanoehua queraatia pueya niquiquiaari na shocua maano, na pueya sequereeri:

—Caminia taquijiria pa niuutiaare.

¹⁹ Jiyacaritij, Moisés Rootasanojiniji niishitiojona pueyanoori Jesu sequeree:

—Niishitiojonanaa, janiyari quiata quianu paniyani. Janiyacua quia tarajareni puetunu tiquiyocuajanaa quia rucuanajosacari.

²⁰ Jesuuri na riucuaree:

—Quioojuapue cutaraari na raa jiitiaa. Shuhuari na jeshuhua jiitiaajuhuj. Saniniuujia, pueyano cua quishacari mijiria, majaari cua maquejara cua jiiitianu quenaaja, taa cuno casami jiitiaacuaa na maquetujuarani.

²¹ Tamonu Jesu pueyajininioori Jesu sequeree:

—Cua jiyaniijanaa, cua tarinitiare, cua que niquirijiaara. Janiya jaara na shaajareni, janiyacua quia tarajare cutarani.

²² Jesuuri na riucuaree:

—Naajaa, cuata quia quiaare cutara. Quia tarinitiare nojuaja. Macunucua cuara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio
(Mr 4.35-41; Lc 8.22-25)

²³ Na nuhuaji, Jesuuri botejinia tacaquiaari. Na saquiri-ojosano pueyari nata quiojoquiaari. ²⁴ Paratuuri senota piyarojonu coteequiaari nojori niutiasacari. Jiyanohua piyarojoriquiaari. Caminiaari jiyanohua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucuajasee. Jesu sequetureeri:

—¡Jiyaniijianaa, canaa quia naacutare! ¡Paa tari tiuquitiaareeni!

²⁶ Nojori riucuaareeri:

—¿Casaara nia pueretiuyani? ¿Majateeri nia niishiniu Pueyasooqua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷ Jesu pueyari jiuujiatequee. Tama nojorijaarijia sequequiaari:

—¡Juhuej! ¿Taamueca pueyanotucuaanojoni? ¡Paraturi na tojiya, mohuacajuhuaaj!

Jesu tohuatanishacari samaruhua, caapiqui pueyajiniji
Gadara jiyajinia

(Mr 5.1-20; Lc 8.26-39)

²⁸ Jesuuri na saquiriojosano pueyata tiuquijioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohuareetaquiaari raacajiniji, macunucua nucuhua paaquiosajuiji. Nojoriiri samaruhuaraca quiquiaari. ¡Jiyanohua pueya pueresano! Cuno nucuaco, majaari pueya rucuanenu quijia, cuno pojori na puerenuucua. ²⁹ Samaruhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa?
¿Quiaate juhuacarijia niyaree canaa quia saniitionura Je-
sunaa?

³⁰ Jiyacaritij, cushiyari cateca naataja miaquenu-
uriquiaa. Jiyanohua queraatia cushiyari quiquiaari.

³¹ Samaruhuari cuno caapiqui pueya pocuatequiaari. Naa
Jesu secojoreeri:

—¡Quiaa jaara canaa tohuatanijiore nio caapiqui
pueyanojiniji, canaa quia jiyarore cuno cushiyacua canaa
tiuquitianura!

³² Jesuuri cuno samaruhua sequeree:

—¡Nia quiaare!

Samaruhuari cuno caapiqui pueyajiniji tohuaree-
taquiaari. Cushiyacua tiuquitiaseeri. ¡Cushiyari
cocuatequee! Saaja caminiajinia totesee tacobinijiiri.
Cushiyari tii shushiniuushii.

³³ Cushiya cojuanaari netecuatiquiaariuhua na
shiriiquiniutia na tiacajiniara. Nojori tiuquiiijosacari-
uhua, pueya niqiara pohuatatuquiaari cushiyajinijiiri,
samaruhuaraca pueyajinijinio. ³⁴ Naaratej puetunu
pueyajanaari cuno tiacajiniji nijioquiaari Jesuucua.
Nojori niquishacari Jesu, na sequetureeri nojori jiyajiniji
na quianura tamaqui.

9

Jesu naatanishacari cumatacuruhuana cusosu

(Mr 2.1-12; Lc 5.17-26)

¹ Na nuhuaji, Jesuuri botejinia rosetaquiaari
na saquiriojosano pueyata. Caminia taquijiria
niuutiaquiaariuhuari tama na tiacajinarajaaja. ² Tii
nojori tiuquiiijosacari, Jesuucua patasaaquiaariiri
cumatacuruhuana cusosu pueyano. Patasaaquiaariiri na
matujinia. Jesu niquishacari taa na patanaa tiuuquiaari
jiyanohua nocuani, cusosu sequereeri:

—¡Quia shuquiriri sanajanaa! Quiaacujaari tari jiyanooshaaree sesa quia miishanojiniji.

³ Noojiaqueya Moisés Rootasanojiniji niishitiojonaari Jesu sequesano tojitiariquiaa. Nojoriiri tama noojiajiniajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanoohua sacuraatia!”.

⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojiyani? ⁵ Seetanujuanaa, pueyano maja na naata jiyanooni pueya miishano sesa. Naajuhuj, majaari na naata tamajaaja pueya na naataniniu. ⁶ Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niquiara:

—¡Quia sanere! Quia matu quia patarohua quia tiajinia.

⁷ Cusosuuri sanequiaari. Na tiajinia quiaarohuari.

⁸ Na niquitiushacari Jesu miishano, puetunu pueyajanaari shiriiquitiuquiaari. Nojoriiri Pueyaso maniniuhuaqueetaquiaari pueya na niquitionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria

(Mr 2.13-17; Lc 5.27-32)

⁹ Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijiara. Na sesa quiquiaari Mateo. Nojuacujaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuuquiaarini cua tiajinia na miaquenura, na pueyajuhuj. Naacujitij Jesuuri cua tiajinia tiuquitiaquiaari miaquenura. Queraatia cuarta

cumaneeca masejonaari canaa cojiriquiaajuhuaaj, quer-
aatia noo pojorijihuaaj, Fariseocuaca jiyaniquitiushano
sesoriquia pueyatatej. Puetunu canaajanaari Jesuta mi-
aquenuuriquiaani. ¹¹Fariseocuaca jaara Jesu niquiquiaari
miaqueyano canaata, nojori soosano pueyani, nojoriiri
naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuraatia
cumaneeca masejonaatani, sesoriquia pueyatatio?

¹²Jesuuri naa nojori sequesano tojirii. Nojori sequeree
miriquiiri:

—Cante na cuaqueya jiyaniyani maja cusosu na quiniu,
nojuajaari maja naarajona na paniniu. Cusosuhua cu-
taraari naarajona panijia. Naajuhuaaj, sesa miijiaca
pueyari cua paniya nojori cua jiyanooniuria sesa nojori
mijiosanojiniji. ¹³Niaa cuaara niishitiojosuhuaara socua,
maninia nia niishiniuria casaa tariucuacaanu Pueyaso
sequesano niishitiojiyani naa na sequesaciritij:

“Niaacuajaari nia seya catijiaquiaa cucuara. Maninia
juhuari nia taraajenura tamasaacua. Cuno cu-
taraari cua shuquiritiasano”.

Naara niquiaarinijia nia sequesano sesa miijiaca cua
jiyanooniuria sesa nojori miishanojiniji. Maja cutaraari
mijiria cua ninu quiquiaari maninia pueyacua.

*Pueya nequesotasano casaara Jesu pueya tariniti-
aaquiquiaa quenaaja miaquenuni*

(Mr 2.18-22; Lc 5.33-39)

¹⁴Tiuquinijiona Juan pueyari Jesuucua niquiaari naa na
nequesotanura:

—¿Casaara quia pueya tarinitiaaquiquiaa quenaaja mi-
aquenuni, nojori secojonura Pueyasoni? Canaacuajaari
miaquenu cartequiaani Pueyaso canaa secojonura taa
Fariseocuaca miiquiaacuaani.

¹⁵Jesuuri nojori riucuaaree miriqui:

—Pueyano camishacari, ¿na masuusano pueyatucua taraatia quiriiri, camiriquiano pueyano jaara nojoritia quiyajaa? Maja. Tamacari cutara, camiriquiano pueyanoori nojori tajiniji rishaanutaniya. Jiyacari cutara maja cua pueya miaquenu quiniutianiya, janiya jaara nojori tajiniji rishaareni.

¹⁶ Socua cua tojitiare pueyanaa. Pueyano jaara cushipirijionu paniri na toque mocua, maja na naata quiarinio toquerau ruposaanu toque mocua cuhuocojinia, jeequesoojua na quishacari. Quiarinio toquerau jaara ruposaae toque mocua cuhuocojinia, na jeequesacari, posequenutaniyari. Cunota, toque mocua cuhuocoori socua sutenutaniya. ¹⁷ Naajuhuj, majaari pa naata uva caaca racatanu shoque tariucuacojinia. Uva quiariniacu jaara racatasaare juucua shoque tariucuacojinia, jaara jerema vinora na quiniuria, shoque tariucuaco surtanutaniyari. Vinoori niitiasaanutaniya najuhuanaj. Shoque tariucuacoori maja na naata tooni, uva caaca jaara jerema. Naaratej, uva caaca nia shuujiore shoque quiariquiojinia, maja najuhuana nia niitianura uva caaca. Naajuhuj, majaari na naata cua niishitiojosano cojishaanu tariucuacaanu niishitiojosanota. Cua niishitiojosano nia tojitiare cutara.

Caapiqui maajipohua naatanijiosacari

(Mr 5.21-43; Lc 8.40-56)

¹⁸ Jesu pocuasacarijia, nocua niqiaariiri Pueyaso secojojua tia camarnu. Jesu cariquimiaji mojoquetaquiaariiri. Na sequereeri:

—¡Quiyatuuri shusha cusoquee! Naajaa, miji, cuata quia quiaare. Niishiyanijia quiaa jaara niare nocua quia juaashiquia, samiitianutaniuhuari.

¹⁹ Jesuuri saneree. Nata quiaareeri. Canaa, Jesu saquiriojosano pueyani, canaari nata quiaareejuhuj.

²⁰⁻²¹ Canaa quiasacari, tamonu maaji cusosuuri Jesuucua catecanoquiaari jiyasohuaja na paramaji. Cuno maaji-iri pueyaracaanu naatequiaari. Doce marijiaari tari na shoconujuquiaari pueyaracaanu na naatesacari. Tama ni-ishiriojoriquiaajaarijia: “Janiya jaara Jesu toque quiareni, cua nanacaari curetanutaniya”. Cunora, maajiiri Jesu toque casaca quiasee jiyasohuaja. ²² Jesuuri na nijiniara tacatequee. Cuno maaji niquiriiri. Na sequereeri:

—Shuquiriaatia quia quiri, sanaunaa. Cucua quia tiu-ushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuyano taraatia, sapiyoniuyanonio. ²⁴ Jesuuri cuno pojori sequeree:

—¡Niiquiji nia tohuareetare! Nio maaji samiriuuri maja macu. Nareja maqueyano.

Pueyari Jesu saroojotaree saaja, naa na sequesacaritij.

²⁵ Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquia-jiniji na quiaseeri. ¡Maaji samiriuuri sanemaa! ²⁶ Naa Jesu miishanojinijiiri pohuatasaaquiaari puetunu cuno jiyajiniajanaa.

Jesu jecasacari caapiqui cariyjuaru namijiaa

²⁷ Canaa jaara tohuareetaquiaari cuno tiajinijini, caapiqui cariyjuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuanaa Pueyaso Jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canacua quia taraajere quenaaja!

²⁸ Canaa tiuquishacariuhua canaa quijia tiajinia, cariy-juarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucuaturreeri:

—Jaa, jiyaniijiana. ¡Quia naatacuaaquinatejaj!

²⁹ Jesuuri na juaashiquia niaree nojori namijiaacua. Jesuuri cariojuarujuri sequeree:

—Cucua nia tiuuniucua, cuaara quiiria taa nia sequereecuajani,

³⁰ Cuno pojori namijiaari maniniuujiaacara quiquiaari-uhua. Jesuuri jiyanoehua nojori rootaree:

—¡Majaari tamasaca niquiara nia pohuatanu cua miishano!

³¹ Na tohuareetasacari, cuno cariojuarujuriiri ritia pohuatanu coteequiaari Jesu miishanojiniji. Naacujitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³² Cariojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj. ³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanoehua jiuujiatequiaari. Sequeturreeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuacaari saaja Jesu macaatiquiaari pueya niquiara. Naa sequeturreeri:

—Cuno Jesuni, nojuajaari samaruhua jiyaniijia cumaacaraca. Naacujitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajiniajanaa rucuanejoquiaari Pueyaso rupaa na pohuatanura, puereetuuca tiacajinia, shiitianiyojua tiacajinianio. Maninia rupaa pohuataquiaariiri Pueyaso secojojua tiacajiniaqueya, pueya

niishiniuria taa Pueyaso jiyanoonu paniya nojorini. Naa-juhuj, nojujaari queraatia tamaatia cusonu naatanijio-
quiaari puetunujuanaa, nootunejacanio.

³⁶ Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. ³⁷ Cunora, Jesuuri canaa na saquiriojosano pueya sequequiaari:

—¡Nia niquiri! Jiyanohua queraatia pueya. Cuno pojoriiri juhua puereetuuca sucohua. Saniniuujia, secjaari na senoonaa. ³⁸ Nocuaji nia sequeyanijia, na Camaru nia secojore, nojuaja cuara jiyarooro queraatia poonijionaa na senooriguiano nera.

10

Jesu saquiriojosacari doce pueya na jiyaramiquishocoriquiano

(Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojiniuria, canaa na jiyaramiquiyaquishacarijia. Jesuuri canaa niquitioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujuanaa canaa shaatanurajuhuj.

² Nioori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedro tarajanu Andrésri quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri Zebedeo niquiohua quiquiaari. ³ Felipeeri quiriquiaajuhuj, Bartolomé, Tomásnio. Quiriquiaajaariuhua janiya Mateoni. Janiyari tarijia quiquiaarini cumaneeca masejovia Romano jiyaniijia. Quiriquiaajaariuhua socua tamonu Santiago.

Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo.
⁴ Quiriquiaajaariuhua Simón. Nojuajaari Cananeo pueya maanujinijinio quiquiaari. Judas Iscarioteeri quiriquiaajuhuj. Nojuajaari Jesu quiateriquiano quiquiaari mosocoriquiano.

*Jesu rootasano na pueya na jiyaramiquiyaquishacarijia
 (Mr 6.7-13; Lc 9.1-6)*

⁵ Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa rootaquiaariiri, canaa na jiyaramiquiyaquishacarijia. Naa canaa sequequiaariiri:

—Majaari taucuacaacua nia quiojonu. Naajuhuj, majaari nia tiuquiniu Samaria pueya tiacajinia. ⁶ Saaja parta Israel pueyacua nia quiaare cutara. Nojoriiri juhua borregohua tashuquioonoo quiya. ⁷ Nojori niquiara nia pohuatare puetunu tiacajiniajanaa. Nojori nia sequere: “Pueyasoori quiarijia nia jiitianu paniya, niaa jaara na rupaa tojitiajacara quiri”. ⁸ Cusosuhua nia naatanijiore. Macunucua nia samiitianiore. Canapuate lepra cusonu jiitiaani, cuno cusonu nia shaajare pueya cuaqueyajiniji. Samaruhua nia tohuatanijiore pueyajiniji. Niaacuaajaari nio cumaaca maseree nareja. Naaratej, nareja nia naatanijiorejuhuaj. Majaari cua cumaaca nia jamuenu.

⁹ Majaari cumaneeca nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia miojotu. Nia naacutasano pueya cuaara niquitioora saniniuujia nia panishano.

¹¹ Nia rucuanesacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuaara cuniqiji

quiaarejaatijia. ¹² Niaa jaara tamonu tiajinia tiuquishi-iquia, pueya nia sequere naatej: “Pueyaso cuaara nioojia cajitiiria”. ¹³ Cuno tiajinia quiniaa jaara maninia pueya quiri, juhuajaniya quiniutianiyari taa nia sequerecua-jani. Nojori jaara Pueyaso tojiyashijiaca quiri saniniuujia, nojori jiuujiacaari cajitiyaquishaanutaniya. ¹⁴ Tamonu tia camaru jaara nia tiuquinitianu paniyaquiri na tiajinia, Pueyaso Rupaa ruuretajaca nojori quiniuucua, nojori niquiara nia niohuacaacuaji nia rapijiotare jiya jooqua. Naacuajitij, cuno pueyari niishiniutianiya Pueyasoori nojori jiyanoyaquiniutianiya, nojori maseyaquiniuucua na rupaa pohuatanaa. Naa nia miirijiuhuaj cuno tiaca pueya niquiara, cuno pojori jaara Pueyaso rupaa tojiniu paniyaquiri nia pohuatasacari. ¹⁵ Seetanujuanaa nia sequeyanijia, jiya puequesacari, cua nequesoreesacari pueya, cuno pueyari jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinjinio.

Pueyaso rupaa pohuatanaari naquiya miishaanutaniya

¹⁶ Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya niajaniya. Nocuaji jiyanohua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaaja nia cojuare tamasaca pueyacuaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. ¹⁸ Cua rupaa nia pohuatanuucua, niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niquitiosaanutaniyajuhuj.

Naajaa, naacuaajitij, niaari nojori niquiara pohuatanutaniya janiyajiniji, taucuaca jiyaniijianucua niquiaranio.

¹⁹ Naa jaara jiyaniijianucua tacoji nujuatesaare nequesoresocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacuaaja maninia nia riucuanura.

²⁰ Naacuaajitij, nia riucuasanoori maja tama niajanijajinijijiaaja quiniutianiya. Pueyaso Sohanu cutaraari nia pohuatenutaniya jiyaniijianucua niquiara.

²¹ Pueyari tama tarajanujuaaja niqutionutaniya mosocoriquiano, tarajanu tiuushacari cucua. Pueyanoori neyanu niqutionutaniya mosocoriquiano, cucua neyanu tiuuniuucua. Muerasapueeri tama na queya tacartanutaniyajaacujua na motenura, na queya tiuushacari cucua.

²² Puetunu pueyajanaari nia niquiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria.

²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanojuaja nia tucuataaquishacarijia pohuatanu Pueyaso rupaa puetunu Israel pueya tiacajiniajanaa, janiyari jiyocuaaanuji tacatenutaniuhuani.

²⁴ Nio nia niishirijihuaj. Pueyanoori maja socua tojishano na niishitiojonajiniji. Naajuhuaj, seruuri maja socua tojishano na camarnujiniji.

²⁵ Pueyano jaara maninia tojiriquia na niishitiojona, maniniacuajaari nojuaja jaara na nuhuaji juhua na niishitiojonara quirijihuaj. Maniniacuajaari, seru jaara juhua na camarnura quirijihuaj. Naaratej, nia Jiyaniijia jaara jiyaniquishiyacuaa “Sesacata”, ¿taariquitijia socua na muerasu sesacasaanutaniyatej?

Cante socua pa pueresanoni

(Lc 12.2-7)

²⁶ 'Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuj. ²⁷ Jiyasohuaja cua niishitiojosano nijaniyani, cuno nia pohuatare puetunu pueya niquiarajanaa. Cua sasacojosano nia numaa pajamani, cuno nia nacatare puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohuanu monu. Saaja nia puerere cutara nooj, cante cumaacaracacuajani mani quiqiojinia nia sohuanu na quejoonura, nia cuaqueyano.

²⁹ 'Pa naata saaja niquiriyatu cumaneeniyojuata caapiqui shiyojuanijoyua masenu pa miaqueso-coriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniaquishacari. ³⁰ Naajuhuj, Pueyasoori puetunu nia naca cajasu niishiyajanaa. Puetunujuanaari na serojosano quiya. ³¹ Naacuajitij, maja nia puerenu. Niaari jiyanohua socua Pueyaso panishano queraatia shuhujiniji.

Maja cumaati Jesucristojiniji pa caririquiniu

(Lc 12.8-9)

³² 'Niaa jaara tamasaca pueya niquiara sequere niaari cucua tiuujiaa cutara, janiyacua jiyocuaaanu quijia cua Que niquiara sequerejanihuaj, niaari cua muerasu. ³³ Cante saniniuujia cucuaji seetaja tamasaca niquiarani, janiyari cua Que niquiara na tamacanutaniyajaacuhuj.

Jesuucua tiuujia pueyari narta pueya juaashano

(Lc 12.51-53; 14.26-27)

³⁴ 'Majaari nia jiyaniniu janiya mijiria niquiaarini pueya quiniuria juhuajaniya. Maja. Mijiria cua nini-uucua, pueyari juayonuujutanutaniya. ³⁵ Niquiaari cutaranijia pueya tiuuniuria cucua. Naacujitij, pueya tiuushacari cucua, cucua tiuyashijiaca pueyari nojori niqiniu paniyaquiniutianiya. Naacujitij, pueyanoori na que paracaaniutianiya, cucua tiuujia na que quiniuu-cua. Maajiiri na nucua paracaaniutianiyajuhuaaj, na nucua tiuuniuucua cucua. Pueyano niquiocuaari na reyarucua paracaaniutianiyajuhuaaj, cucua tiuujia na reyarucua quiniuucua. ³⁶ Naacujitij, tama pueya panishano pueyajaajaari na paracara quiniutianiya, cucua nojori tiuuniuucua.

³⁷ 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuhuaj. ³⁸ Cante tama na cuaqueyajaaja panitiaaquijia na tojiniuria janiyani, cunoori maja maninia quiria. ³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyaracaanu taraatia na miitiasaanura. Saniniuujia, cante tama na cuaqueyajaaja panitiaa naquiya na miishaanura cua tojjia na quiniuucuan, nojuaja cutaraari rishijara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

*Pueyasoori maninia miijiaca niquitionutaniya na jiiti-
asanoiniji*

(Mr 9.41)

⁴⁰ 'Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuhaaj. Cuno, cante cua tojjiani, nojuajaari cua Jiyarona tojjiajuhuaj. ⁴¹ Naajuhaaj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana

na quiniuucuan, Pueyasoori cuno pueyano niqutionutaniya maninia na casaajiniji. Nojuajaari niqutiosaanutaniya mariyata taa Pueyaso rupaa pohuatana niqutiosaanutaniyacuaani, Pueyasojiniji na pohuatanu sami. Cante maninia miiija pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niqutiosaanutaniya mariyata taa maninia miiija pueyano niqutiosaanutaniyacuaani.
⁴² Naajuhuj, cante quenaaja shiniitiuniacu mohuaca raateya tamonuni, cua mueyaniyojua na quiniuucua, Pueyasoori seetanujuanaa na jiiiasanojiniji na niqutionutaniya na raatenu sami.

11

Tiuquinijiona Juanri na pueya jiyaroquiaari Jesu nequesotanura
(Lc 7.18-35)

¹ Jesu jaara canaa na doce saquiriojosano pueya rootanu tucuataquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

² Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesotanura:

³ —¿Quiaate seetanujuanaa Cristo, tariucuacaanu Pueyaso sequesano canacua niriqianotej? ¿Canaate tamonu sashiya soj?

⁴ Jesuuri nojori riucuaaree:

—Nia quiaarohua. Tiuquinijiona Juan nia pohuata-suhua puetunu cua miishanojuanaa nia niquishano, nia tojishanojuhuaj. ⁵ Naa nia pohuatasuhua: “Cariyojuarujuriiri tari niqutiarohua. Shipiiniquiuniuujiaaari maninia rucoorohua. Shu miaqueja cusonu jiiitajacaari tari jeequerohua. Numueejunucuaari tari tojitiarohua

maninia. Macunucuaari samiitiacorohua. Casamiiju-niucua pueyari Pueyaso rupaa pohuatasaree, Pueyaso muerasura nojori quiniuria”. ⁶ Shuquiriaatia quiija cutaraari noo pueyano, cante cucuaji taacanuyaquijiani.

⁷ Tiuquinijiona Juan pueya jaara quiojoquiaariuhua Juancia, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Casaa niqiniuucua nia quiojocanu cariiquia jiyajiniani? ¿Niaateeri paratu piyarojosano naajua niqiniuucua quiacanu? Maja. ¿Tiuquinijiona Juanteeri noojia niqijijoteja? Maja. ⁸ Cua sequeture, ¿casaa niqiniuucua nia quiojocanuni? ¿Niaateeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyani-ijianucua tiajinia quijiaca cutara, maja cariiquia jiyajinia. ⁹ ¿Taateerinitioj? ¿Casaacua nia quiojocanuurini? ¿Pueyaso sequenu panishano caminiujiunia niqiniuucuatee? Jaa. Seetanujuanaa nia sequeyanijia, Tiuquinijiona Juanri jiyanohua socua cutara pueyano tamasaqa Pueyaso sequesano caminiujiuniaajiniji. ¹⁰ Cuno Juanjinijicuaajaari tariucuaaanu Pueyaso Rupaajinia pohuatasaaquiaari. Naa naajiotasaaquiaari miriquiiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ 'Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, cunoori socua cutara pueyano Tiuquinijiona Juanjiniji.

¹² 'Tiuquinijiona Juan jaara coteequiaari Pueyaso rupaa pohuatanu, pueyari jiyanohua saniniujiuriquiaa

Pueyaso muerasu nojori quiniuria. Pueyari naa saniniujiya quiarijajuhuj. Cante jiyanoehua saniniujiya Pueyaso muerasu na quiniuriani, naa quiniutianiyari.

¹³ Supuetana Moisés, mariyata puetunu Pueyaso sequesano caminiujiuniaajanaari tariucuacaanu pohuataquiaari taa Pueyaso jiitianutaniya pueyani. Naa poojotasaquiaariiri Tiuquinijiona Juan jaara tiuquiaariijaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. ¹⁴ Naa jaara nio cua pohuatasanoocua tiuuniu paniri, nia tojiri nio: Tiuquinijiona Juancuajaari tariucuacaanu pueyara Pueyaso sequesano caminiujiunia Elíascuaja. Elíascuajaari sequesaaquiaari niriQUIANO. ¹⁵ Cante numaaracani, cuara tojiiria cua sequesano.

¹⁶ 'Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapuate carijiniacuma tacuarishijionu paniya juucuan. Nojoriiri narta naatujooricua naca, nojori tacuarishijionu panishacari juucua. ¹⁷ Naa nacaari: "Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu".

¹⁸ Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuj. Pueyari saaja na sequequiaari samaruraca pueyanota. ¹⁹ Na nuhuaji, janiyari tiuquiaariini. Janiya cutaraari sumatuucua miaquejani, mashaca ratujuajuhuj. Pueyari cua sequequiaa: "Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuraatiajuhuj". Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso

jiyaramiquishano cutarani.

*Jesu piriyojosacari tojiyashijianucua pueya
(Lc 10.13-15)*

²⁰ Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasa tiacajiniji. Jiyajeneta casaa miiquiaari tii Pueyaso cumaacataari. Pueyari saaja nocua tiuyaquiuaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

²¹ —¡Niaari taraatia saniitiosaanutaniya, nioojia nia tacatoyaquiniuucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajinianio, taa cua miiquiaari nia tiacajiniacuaani, cuno taucuaca maara Pueyasoocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naajuhuj, nojori maara juaca quejooquiaari na nacaacua, noojia nojori tacatosacari Pueyasoocua, sesa nojori miiniuucua. ²² Naaratej, janiyari nia numooteyani: jiya puequesacari, niaari socua jiyanohua saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. ²³ Capernaum tiacajinia quiniaanaa, ¿niaateeri jiyaniya niaari tamasa tiaca shocotanutaniya nia jyanishacari niaari socua maninia cutara? ¡Maja! Niaari mani quiquojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriqiaaj. ²⁴ Nocujia nia sequeya cutaranija: jiya puequesacari, niaari socua jyanohua saniitiosaanutaniya Sodoma tiaca pueyajiniji.

*Jesuucua tiuuniaari samaateriquiano cutara
(Lc 10.21-22)*

²⁵ Jiyacaritij, Jesuuri na Que Pueyaso sequequiaari:

—Quia shuquiritiaanijia cua Quenaa. Quiaari jiya camarnu, jiyocuacaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaji quia jamosanoni. Niishijiaca pueyari saaja tama nojori niishishanoocuaaja tiuujia. ²⁶ Naacuajitij cua Quenaa, quiaari maninia niishitirii niishiyashijiaca pueya, taa quia paniquiaaricujani.

²⁷ 'Cua tojitiare pueyanaa, cua Queeri cua niquitioquiaari puetunu casaajanaa cua jiiiasocoriquiano. Majaari seetanujuanaa tamasa niishiniu janiya. Saa cua Queja cutaraari cua niishiya. Naajuhuj, majaari seetanujuanaa tamasa niishiniu cua Que. Saaja janiya, Neyanuni, na niishiya cutaranijia, naajuhuj canapue cua niishitiniu paniya cua Quecujani. ²⁸ Cucua nia nijiore, puetunu niajanijajanaa, canapuate tacaquiuyan, canapuate puera niishiriojonuujuacani. Niaa jaara cucua nimia, janiyari nia samaraatanutaniyani. ²⁹ Cua niishitijosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojiaari maja na tacaaniu quiniutianiya nia rupuesacari janiya. ³⁰ Nia tojishacari janiya, nioojiaari juhuajaniya quiniutianiya. Cua poonitijosacari niajaniya, majaari jiyajeneta na quiniu quiniutianiya niaara, cua cumaquishacari niajaniya.

12

Jesu pueya carojotasacari trigo samaatenu juuca
(Mr 2.23-28; Lc 6.1-5)

¹ Jiyacaritij, Jesuuri canaa na saquirojosano puey-ata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani. ² Fariseocuaca

jaara canaa niqiquiaari naa miyanotej, Jesu seque-
tureeri:

—¡Quia niqiri! ¡Quia pueya trigo shuniitiaa! ¡Na shuquiquiojoniuyari! ¡Naa nojori miishacaritij, poonijioniuyari! Cuno maja panishano samaatenu juuca miini-
uria. ¡Pa supuetana Moisés cuajaari naa pa rootaquiaaritij!

³ Jesuuri cuno pojori riucuaaree:

—¿Majateeri nia serojonu quiquiaari Pueyaso Rupaa-
jinia taa pa supuetana David miiquiaari na miaajesacarini,
na pueyano? ⁴ Nojoriiri Pueyaso Secojojua tiajinia
tiuquitiaquiaari. Pueyasora niqitiojosano pan satureeri.
Cuno panri saaja pueyacuara secojonaa sasocoriquiano
quiquiaari, maja socua tamonu pueyano sasocoriquiano.
Naajaa, Davidri na saquiaari. Na miishanoori maninia
quiquiaari Pueyaso niqiara. ⁵ Naajuhuj, ¿majateeri
nia serojonu quiquiaari tariucuacaanu Moisés naajiosano-
jinia, taa pueyacuara secojonaa pueyaracaanu poonijio-
quiaa Pueyaso Secojojua tiajiniani? Nojoriiri naa pooni-
jionuuquiaa samaatenu juucajuhuj. Naa nojori pooni-
jiosacari Pueyaso Secojojua tiajinia samaatenu juucatej,
cunoori maja sesa. ⁶ Moisés cuajaari pa rootaquiaari
maja pa poonijionura samaatenu juuca. Naajaa, cuno
rootasanoori seetanujuanaa maja na quiniu Pueyaso
Niyamura, jaara Pueyaso Secojojua tiajinia poonijion-
aara quiaquirijuhuj. ⁷ Maja naasucuaari nia niishiniu
quiquiaari casaa nio tariucuacaanu naajiotasano niishi-
tiojiya niajaniya juucuan. Naa sequeyari: “Janiya cu-
taraari socua nia panitiaani niarta pueyacu nia taraa-
jenura, maja saaja nia niqitiojonura nia seya cucuara
catijasocoriquiano”. Naa jaara nio naajiotasano niishijia
quiriquia, naa maara sesa miyashijia pueyacuara tonu-
jiyaquiriquiaj. ⁸ Cua tojitiare quiarijia. Janiyacuajaari
Pueyaso Niyamani. Naacuajitij, mijiria cua quishacari cua
naata sequenu casaate samaatenu juuca miishiyani.

Jesu jeeecasacari pueyano juaashiquia cuseetucojuara joojequetano

(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniqijini. Canaari Pueyaso Secojua tiajinia tiuquishiini.

¹⁰ Pueyanoori tii quiriqiaa cuseetucojuara joojequetano na juaashiquia. Taa canaa Judiocuaca camarucua Jesuu-cuara saquiriojotanu paniriquiaa juucuacuajani, jiyacari-tij, na sapojonuta Jesu nequesotaturee naari.

—¿Maniniateeri samaatenu juuca cusosu naatanini-uria? Paacuajaruhua niishitiojosaaquiaarini maja pa poonijionura samaatenu juuca.

¹¹ Jesuuri cuno pojori riucuree:

—Niaa jaara niquiriyatujua borregoniyojua jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyojua? ¿Taaquiririnij! ¹² ¿Majateeri pueyano socua jiyanohua panishano borregonijini? Taaquiririnij. Naaratej, maja pa tarinitianu maninia pa miiniuria pueyaracaanu, samaatenu juucajuhuaj.

¹³ Na nuhuaji, sesarucujua sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴ Naa Fariseocuaca niquishacari Jesu miishanotej, tohuareetaqueeri. Tama nojorijaarijia roojotooquiaari nojori motenura Jesu.

Jesujiniji pahuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniqijii quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa naatanijioquiaari. ¹⁶ Jesuuri na naatanijosano pueya rootaquiaari maja tamasa niquiara nojori pahuatanura cante nojuajani. ¹⁷ Naacuajitij, tariucuacaanu Pueyaso

sequesano caminiujiunia Isafas pohuatasanoori tohua-teequiaari. Nojuajaari juhuacarijia naa pohuataquiaari Jesujiniji Pueyaso sequesano miriquitij:

¹⁸ “Niocujaari cua seru, cua saquiriojosano. Na timiti-aanijia. Nojuajaari jiyanohua cua panishano. Jani-yari cua Sohuanu jiyaronutaniya nocuani. Nojua-jaari tamasaca pueyapue pohuatanutaniya janiya-jiniji, nojori quiniuria cua muerasura pueyara-caanu. ¹⁹ Majaari pueyata juaajia na quiniu quiniutianiya. Majaari nacojojua na quiniu quiniutianiya. Majaari na rupaa tojishano quiniu-tianiya tiacaacaco. ²⁰ Majaari quenaaja shuniiti-asano naajua na shutianu quiniutianiya puetunu-juanaa. Naajuhuj, majaari na maquishajanu quiniutianiya jatarinitiaja nojiyano samaritiu. No-juajaari naa sesa miijiaca jiyanooniutianiya, no-juaja jaara tiuquiriohuajaatijaj, puetunu sesa mi-iniujianaa na puecanura, Jiyaniijiajanaa na quini-uhuara pueyaracaanu. ²¹ Puetunu tiqiyocua-cajinijinio quijiaca pueyajanaari nocua tiuuniu-tianiya”.

*Pueya sequesacari Jesu samaru cumaacaracana
(Mr 3.20-30; Lc 11.14-23; 12.10)*

²² Tiquiaari Jesuucua jaatucusaaquiaari. Cariyojuaru quiriqiaajaariuhuj. Naa quiquiaariiri samaruraca na quiniuucua. Jesuuri na jeecaree. Naacuajitij, tiquiaari pocujara quiquiaari, niquijiarajuhuj. ²³ Cunora, puetunu pueyajanaari nocuaji jiuujiatequiaari. Seqetureeri:

—¡Nio jiyoteeri pa supuetana David niquiohuacuajinio supueno pueyano, tariucuacaanu sequesano pa jiyani-ijiara quiriqianotej!

²⁴ Fariseocuaca jaara tojiqiaari naa pueya sequesacari Jesujinijitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. ²⁵ Jesuuri cuno pueya niishiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quiniaa jaara juayonuutare jiyareta tama nojorijiaaja, cuno pueyari maja na naata quiniu jatiqiu. Naajaariuhuj, pueyano jaara juayonuujutare tapueyocucata tama na tiajiniaaja, majaari nojori naata jatiqiu quiniu. ²⁶ Jaara naa quiriritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacuajitij, majaari na naata na cumaaca rishiniu. ²⁷ Janiya jaara samaruhua tohuatanijiya Satanás cumaacatani, taa nia sequeya janiyacuaajani, cua sequeretoj, ¿cante nia niishitiojosano pueya cumaquiya samaruhua nojori tohuataniniuriani? ¿Satanástee? Majaruhua. Nojoricuaajaari samaruhua tohuataniquiaa Pueyaso cumaacata. Naacuajitij, nojori tohuatanijosacari samaruhua Pueyaso cumaacata, niaari jiyanhua jiyajeneya nia sequesacari janiya samaruhua tohuatanijiya Sesaaca cumaacatani. ²⁸ Seetanujuanaa Pueyaso Sohuanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijosacari samaruhtej, niaacuajaari niishiya Pueyasoori tari poonijiya juhua Jiyaniijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiyaquiri. Jaara na morojore coteenu, na nuhuaji cutara na naata na casami panu. Naajuhuj, janiyari Pueyaso cumaacata jaariuutiaa Sesaaca jiiftiasano pueyani.

³⁰ Cante cua jiyano quiyaquiiani, cunoori cua paraca.

Cante cua naacutaaquiya pueya rerecojonura Pueyasarani, nojoriiri saaja pueya cocuataa Pueyasoo cuaji.

³¹ 'Naarate nia sequeyanijia: puetunu pueya miishano sesajanaari na naata jiyanooshaanu. Sesacojajua pueyanoori na naata jiyanooshaanujuhuj. Saniniuuja, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Niyanu sesacajani, nojuajaari na naata jiyanooshaanujuhuj. Saniniuuja, cante Pueyaso Sohuanu sesacajani, nojuaja cutaraari jiyanoyaquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuj.

*Naanaari niishishano na jajaujiniji
(Lc 6.43-45)*

³³ 'Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniji paari niishiyani taamueca naanatenojoni. ³⁴ Niaari juhua sacocua. ¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuaquiaani. ³⁵ Naacuajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuuja, sacuaratia casaa pocuaari. ³⁶ Nia sequeya cutaranijia, Pueyaso saniitionu juuca, pueyari puetunu najuhuana sesa na pocuasanoinijianaa nequesoreesaanutaniya. ³⁷ Cante maninia casaa pocuaja quiquiaarini, cunoori sequesaanutaniya “maninia pueyanota”. Naajuhuj, cante sesa casaa pocuaja quiquiaarini, nojoriiri saniitiosaanutaniya saniniuuja. Naaratej, majaari nia niti nia taquiriocuatenu sacuaratia casaa nia pocuanura.

Fariseocuaca niquiniu panishacari Jesu miishano Pueyaso cumaacata

(Mr 8.12; Lc 11.29-32)

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

³⁹ Jesuuri nojori riucuaaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujiunia quiquiaari. ⁴⁰ Nojuajaari puereetuuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. ⁴¹ Jonás pohuatasacari Pueyaso rupaa Nínive tiacajinia, cuno tariucuacaanu taucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatunutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijajanaa cutara Jonásjiniji. ⁴² Naajuhuj, tariucuacaanu jiyaniijia maajiiri niquiaari tucuacaanuji pa supuetanaa jiyaniijia Salomón tojiniuucua. Cunoori quiquiaari jiyanohua niishijia Salomón quiniuucua. Cuno maajiiri pananu shuucuaji niquiaari Salomón na tojiniuria, jiyanohua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotanutaniyari

nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua

(Lc 11.24-26)

⁴³ Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. ⁴⁴ Jaara riuriataaquiri na samaatejara, naa niishiriojiyari: “Tacateyarohuaraqui tariucua cua quiquiojiniohua”. Jaara tacatemohua, cuno na pueyano riuriatasuhuari juhua camaruuju tia, netoosano, maninia jeenucuasano. ⁴⁵ Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanohua sesa nojuajiniji. Puetunu nojorijianaa jaara tiuquitiare cuno pueyanoocua tii na quiniuria, cuno pueyanoori na nuhuaji socua jiyanohua sesa quijiara jiyacateja.

Naa quiniutianiyajaariuhua nio pa quishacari pueyara na tojitiaaquiniuucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricujani.

Cante seetanujuanaa Jesu nucuani, tapueyocuacajuhuj

(Mr 3.31-35; Lc 8.19-21)

⁴⁶ Jesu pohuatasacarijia pueya niquiara, na nucuuari tiuquijioquiaari Jesu tapueyocuacata Jesuucua. Carijiniacuma qutiuriquiaari. Jesuta pocoojonu paniriquiaa juucuaari. ⁴⁷ Tamonu pueyanoori Jesu sequeree:

—¡Niishitiojonanaa! Quia nucuaqui quia tapueyocuacata carijiniacuma quiya. Quiata pocoojonu paniyaquini-aari.

⁴⁸ Jesuuri saaja na numootena pueyano riucuaree:

—¿Cante cua nucuani? ¿Cante cua tapueyocuacani?

⁴⁹ Jiyacaritij, Jesuuri canaa na tojitianaa pueya shishirii. Tii quiniaa pueya sequereeri:

—Nio cua tojitianaani, nojori cutaraari juhua cua nua, juhua cua tapueyocuaca cutara. ⁵⁰ Naacujitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatsu, cua nucuano.

13

Natoojojua pueyanojiniji pohuatasano (Mr 4.1-9; Lc 8.4-8)

¹ Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani. ² Jiyanojua queraatia pueyari nocua rerequeejoquiaari. Puera pueya quiniuucua, Jesuuri botejinia tacaquiaari. Tii cajishiiri. Puetunujuanaa pueyari jaaquijinia jateequiaari, tiji na tojitianura Jesu canaata. ³ Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. ⁴ Na jacutasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacoji na natau miojoquiaariiri. ⁵ Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara tacaquiaari, cuno natauri ritia sorequiaari maja puera nujuacaraca na quishacari. ⁷ Tajaacaari totequiaarijiiuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu quiquiaari. ⁸ Maninia jiyajinia totequiaariiri tajaaca saniniuujia. Tii moritiaquiaari maninia cutaraari. Maninia muetuquiaari cutaraari. Puetunu cuno jiyoneejinijijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhuj. Socua tamonu jiyoneeri muetuquiaari treinta jajau. ⁹ Niaa jaara numaaraca quiri, nia tojitiare cua pohuatasano.

Casaara Jesu niishitiojiya miriquini

(Mr 4.10-12; Lc 8.9-10)

¹⁰ Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹ Jesuuri canaa riucuaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijiya pueya jiuujiajiniani, na muerasura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. ¹² Cante Pueyaso rupaa tojijia cutarani, nojuajaari socua niishitiojosaanutaniya, Pueyasojiniji jiyanohua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariuutiasaanutaniyajanaa nojorijiniji. ¹³ Cunora, janiyari miriqui pohuatariquiaa nojori niquiarani. Naacuajitij, nojoriiri najuhua niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. ¹⁴ Naa nojori quiniuucuatej, tari tohuateereeri juhuacarijia supuetana Isaías sequesano nojorijiniji. Pueyara Pueyaso sequesano caminiuujia na quiniuucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Niaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. ¹⁵ Nojoriiri cumajuujiaaca quiya. Nojoriiri juhua numueeju, tojiyashijiaa. Nojoriiri juhua

nimishitiu quiyajuhuaaj. Naa juhua nimishitiu qutiuyari nojori niqiyaquiniuucuaji. Nojori-iri naa juhua numueejunucujuhuaaj, nojori tojitiaaquiniuucuaji noojiata. Naa qutiuyari nojori niishiyaquiniuucuaji noojiata, cucua nojori tacatenuhuara cua jeeanura nojori jiuujia seque”.

¹⁶’Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhuaaj. ¹⁷ Seetanujuanaa nia sequeyanijia, queraatia tariucuacaanu pueyari quiarjia nia niqishano niqiniuucua jiaatiaquiaari juucua. Naa nio niqiniuucua jiaatiaquiaari tariucuacaanu Pueyaso sequesano caminiujiuniaa, queraatia maninia pueyano. Majaari nojori niqiniu quiquiaari saaja. Nojoriiri nia tojishano tojiniuucua jiaatiaquiaari juucujuhuaaj. Majaari nojori tojiniu quiquiaari saaja.

Jesu niishitiojosacari miriqui na pahuatasano natoojouajiniji

(Mr 4.13-20; Lc 8.11-15)

¹⁸’Nia pahuatareera nia niishiniuria cua pahuatasano natoojouajiniji. ¹⁹ Canapuete Pueyasojiniji cua pahuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. ²⁰ Noojiaqueya pueyari juhua sai tajinaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. ²¹ Nojoriiri juhua nujuacaaju. Majaari cumatia na nujuatunu. Naaratej, nojori jaara naquiya miishaare Pueyaso Rupaa tojijiaca nojori quiniuucua, nojoriiri ritia Pueyaso tojiniu tarinitiaquiaa. ²² Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhuaaj, nojoriiri

sapojosaaquiaa nojori jiyanihacari nojori jaara quer-
aatia casamiriaca quiriquia, nojori maara shuquiriaatia
quiriquiaj. Cunora, Pueyaso Rupaari maja na naata pooni-
jionu nojori jiuujiajania. Naacujatij, cuno pueyari juhua
natau muetuhuo quiquiaa. ²³ Saniniuujia, cante maninia
tojijia Pueyaso Rupaani, maninia na niishiyari. Cunoori
juhua jiya maniniujinia jacutasano jajau. Naacujatij,
cuno pueyari juhua maninia natau, maninia muetuna cu-
tara. Jiyanhua maninia pueyari quiquiaa na tojishacari
Pueyaso Rupaa. Naaratej, tamonuuri juhua cien jajau
muetujua. Tamonuuri juhua sesenta jajau muetujua.
Tamonuuri juhua treinta jajau muetujuajuhuj.

*Jesu pahuatasano miriqui trigo tajinia moritiaja sesa
jijasocujajini*

²⁴ Jesuuri tamonu miriqui pahuatasano pahuataquiaari
pueya niqiara, nojori na niishitiojonura taa Pueyaso toji-
tiaashijia pueya quiniutianiya Pueyaso muerasu tajini-
ani. Jesuuri naa pueya pahuataquiaari:

—Tamonu pueyanoori maninia jajau nataquiaari na
cuhariquajinia. ²⁵ Puetunu pueyajanaa jaara niu-
cua maqueturiquiaa, na paracaari jiyacari niqiari.
Sesa jijasocua jajau jaquerooquiaari trigo natasano
cuhariquajiniaari. Na natanu nuhuaji, tacateyaro-
huari. ²⁶ Trigo jajauri maashiquiaari. Na nuhuaji, na
jajau mueratuusacari shusha, sesa jijasocuaari mariyata
niquishaaquiaari maashiyano. ²⁷ Cuhariquia camaru
seyari quiaquiaari na camarujanaa nojori sequenura:
“Jiyaniijanaa, ¿majateeri maninia saquiriojosano jajau
quiquianucuaja quia natasano cuhariquajiniani? ¿Teje
cuno sesa jijasocua moritarucuaa quia natau tajini-
acuaraarini?” ²⁸ Cuhariquia camaruuri nojori riucuaree:
“Pa paracaari cunohuj, naa pa miiriucuaani”. Na seyari
na nequesotaree: “¿Quiaate paniya canaa quianura cuno

jiyasocua jayotanura trigo tajiniaqueyajiniji?” ²⁹ Na seya sequeree saajaari: “Maja. Maja nia jayotanu jiyasocua, nia mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiirijaara trigo jajau. Na nuhuaji cutara janiyari senoonaa jiyaronutaniyani, cuaara cofeenu jiyasocua namirioora, nojori jiunioconura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

Jesu pohuatasano miriqui mostaza jajaujiniji
(Mr 4.30-32; Lc 13.18-19)

³¹ Jesuuri socua miriqui pohuataquiaari pueya niquiara, na niishitiojonura taa Pueyaso poonijiya pueya jiuujajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia. ³² Seetanujuanaa mostaza jajauri socua jyanohua shiitaniyojua puetunu tamonu jajaujinijijianaa. Naajaa, cuno mostaza jaara maashiri, socua puereetuucara maashijaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujuaanaa maninia Pueyaso muerasura jatanishiyari.

Jesu pohuatasano miriqui pan poreetajajiniji
(Lc 13.20-21)

³³ Jesuuri nio miriqui pohuatasano pohuataro-huacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jyanohua cumaacaraca na poonijionura juhua pan poreetaja. Maaji jaara pan poreetaja cojitiri jiuujianaraca shiitaniyojua tohuatashi mishaja trigo cashojuata, puetunujuanaa na poreeteyari. Pueyaso rupaari naa cumaacaracajuhuj, pueya na jataniniuria quiariniora.

Casaara saaja miriqui sequesanoa pohuatasaaquiaa pueya niquiarani

(Mr 4.33-34)

³⁴ Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaaritij. ³⁵ Naacuajitij, maninia tohuateequiaariiri tariucuacaanu pueyara Pueyaso sequesano caminiuujunia sequesano, jaara nio naajio-taquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasanoa. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipinishaanujiniji’ ”.

Jesu niishitiojosacariuhua miriqui na pohuatasano sesa jiyasocujiniji

³⁶ Na nuhuaji, Jesuuri pueya maanu sequeree:

—Tariucuaja pueyanaa. Nia quiojorohua.

Na nuhuaji, nojuajaari na quijia tijania tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocujiniji.

³⁷ Jesuuri canaa sequeree:

—Janiyacujaari cunoni, maninia jajau natoobjuani.

³⁸ Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasanoni. Tamasacaari saniniuujia Sesaaca muerasu quiya. Nojoriiri juhua cuno sesa jiyasocua, cuhuariquiajinia natau tajinia maashinioni. ³⁹ Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senosacari quiniutianiya. Jiyocuaaanuji Pueyaso seyari juhua cuhuariquia senoonaa quiniutianiya. ⁴⁰ Naatej, taa sesa

jiyasocua namitiashiya catijasocoriquianocuaani, naa quiniutianiyajaariuhua nio jiya puequesacari. ⁴¹ Janiyari cua seya jiyaronutaniya jiyocuacaanujini. Nojoriiri sesa miijiaca quioonutaniya, mariyata canapueete tamasaca miitiquiaa sesani. ⁴² Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quiaca miaquenutaniyari. ⁴³ Na nuhuaji, Pueyaso tojitiajacaari jiyanoehua shacantuucara quiniutianiya juhua pananu, na Que Pueyaso jiiitiasacari nojori pueyaracaanu. Cante numaaracani, cuaara tojiti-aara cua sequesano.

Jesu pohuatasano miriqui jiyanoehua panishano casaajiniji

⁴⁴ Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyanoehua panishano. Nojuajaari naa sequequiaaritiij:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyanoehua panishano casaa. Tiijia na jamorohuari tee na quiriquiaacuajani. Jiyanoehua na shuquiritiasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyanoehua na panishano casaari tama na casaara quiquiaarijiaaja. Naajuhuaj, socua jiyanoehua panishano cutaraari, Pueyaso pueyanora nia quiniuria. Cunoori jiyanoehua socua panishano puetunu pa panishano casaajinijianaa.

⁴⁵ Socua nia tojiri nio pohuatasano. Casami niqutiojonaari pueyaracaanu rucuanajoriquiaa shanoehua cohua-jaaca tiujiau na pajenura. Cunoori noturu shipinijosano sai quiquiaari. ⁴⁶ Tamonu juuca, jiyanoehua shanoehua

noturu saajia niqutishaaquiaariiri. Jiyanohua na panishano. Naaratej, puetunu na jiitiasanojuanaa niqutiojoquiaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyanohua na panishanoni. Naajuhuj, nia tarinitiare puetunu nia panishano casaajanaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷ 'Pueyaso Rupaari juhua puereetuuca shiyaru na camaru jartasano caminiajinia. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajaari tii quiriquiaa. Pueyari jaaquiajinia cajitiuquiaari saaja maninia sapitiaaja nojori saquiriojonura. Canaasatujinia na niojotureeri racatasocoriquiano. Sesa sapitiaajaari saniniuujia jacutasaaquiaari. ⁴⁹ Naa quiniutianiyajaariuhuj jiya puequesacari. Naacuajitij, Pueyaso seyari rosetanutaniya, sesa miijiaca na saquiriojonura maninia pueya tajiniji. ⁵⁰ Na nuhuaji, sesa pueyari quejoosaanutaniya mani quiquiojinia, taa sesa sapitiaaja jacutasaaquiaaricuaani. Nojoriiri tii sapuenutaniya. Na quiaca miaquenutaniyajaariuhua naquiya na miiniutia.

Pueyaso Rupaari jiyanohua panishano: tariucuacaanu naajiotasano, quiari naataja naajiotasanonio

⁵¹ Jesu pohuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pohuatasanojuanaacuaja?

Canaari Jesu riucuaareni:

—Taaquiriirinij Jiyanijianaa.

⁵² Jesuuri canaa sequeree:

—Maniniacuajaqui. Tariucuacaanu Pueyaso Rupaajiniji niishitiojona jaara quiarinio cua niishitiojosano Pueyaso-jiniji niishirijiuhuj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuacaanu shanohua casamiriacacuajani, quiarinio casamiriacajuhuj, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani.

⁵⁴ Canaari na maashijia tiacajinia tiuquiquiaariuhuani. Canaa tiuquijiosacari, canaari Pueyaso secojojua tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajaarani? ¿Tejenotejaara na cumaacani, cusosuhua na naatanijionurani?

⁵⁵ Na shipininiocuajaari suruhuatuujiniji casaa shipinijiona quijia. Na nucuacuajaari María. Na tapueyocuacaari Santiago, José, Simón, Judasnio. ⁵⁶ Na rimiatuhuari mariyata niya pa tajinia quiya. ¿Taa na niishiya pueraarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojitiaaquishacari nojuajatej, Jesuuri nojori sequequiaari:

—Puetunu tiquiyocua pueyajanaari maninia tojitiaquiaa cutara Pueyaso sequenu panishano caminiuujunia. Saaja narta pueya tama na jiyajinijiniojuaariria na tojitianu paniyaquiya, tama na tiajinijiniojuaja pueyano.

⁵⁸ Naa nojori ruuretanuucua Jesutej, majaari puera na cumaacata na miiniu quiquiaari tii, nojori tiuyaquiniuucua nocua.

14

*Herodes motesacari Tiuquinijiona Juan**(Mr 6.14-29; Lc 9.7-9)*

¹ Cuno quishacari, Galilea jiya jiyaniijia Herodesri pohuatasaaquiaari Jesu miishanojiniji na cumaacata.

² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiarohuacuaaqui! Naacuajitij, jiyanohua cumaaca jiitiaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niquiocuata. ⁴ Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niquiocua!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari nishiquiaari cutara, Juanri seetanujuanaa Pueyaso sequenu panishano caminiujiumia quiquiaari. ⁶ Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niquiara. Jiyaniijia Herodesri jiyanohua na shuquiritiaquiaari. ⁷ Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa

quia sequeyanijia! Majaari cua rupaa cua jatanu quiniutianiya. ¿Casaa quia paniniutianiyani?

⁸ Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutaniyani. Naaratej, niyacoori jiyaniijia Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanjuanaa na sequenuucua na masuusano pueya niquiara. Naacuajitij, Herodesri na seya sequequiaari cuaara niquitiosaarianoj. ¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatanura. ¹¹ Na nuhuaji, Juan nacaari patasaaquiaari iuhua miacojuajinia. Niyacoo niquitiosaasuhuari. Niyacoori saniniuujia na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

Jesu mianuutesacari cinco mil pueya

(Mr 6.30-44; Lc 9.10-17; Jn 6.1-14)

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriuquioco. Cuno pueyari canaacuaji cutesee. ¹⁴ Naacuajitij, Jesu rosesacari botejiniji, jiyanohua queraatia pueya niquishii saajaari. Nojoricua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquirijosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhuacarjia pueya quia sequere nojori cuaara quiojohuara tiacajinia, na miaquesocoriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojiyarohuani? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jiitiano miaquesano. Niya quiya saajaari cinco pan, caapiqui sapitiaajanio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuaara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niqutiojoreeri puetunu pueyajanaa canaa niqutiojosocoriquiano. ²⁰ Puetunu pueyajanaari miaquenuquiaari. Maninia tooquioreeri. Nojori puecasacari miaquenu, canaari pan neeca reratequiaariuhuani, sapitiaaja raquiquiano. Doce canaasatururi mishinijiosaaquiaari na raacuata. ²¹ Jiyanohua queraatia pueyari miaquenuquiaari; cinco mil quiquiaari saacanuujua. Majaari maajipohua serojosaanu quiquiaari, naatujoorinio.

Jesu rucuanesacari mohuaca caco

(Mr 6.45-52; Jn 6.16-21)

²² Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhuara. ²³ Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari, Jesuuri tii quiriquiaa tamajaaja. ²⁴ Canaari saniniuujia caminia

jiuujiajinia tari jaaretariquiaacuaani. Mohuacaari saaja canaacuara cajiniuucuariquiaa, paratu piyarojosacari canaacuara. ²⁵ Juhuaquenu panishacari, Jesuuri canaa rupuesee mohuaca caco na rucuanenuta. ²⁶ ¡Canaa niquishacari casaa mohuaca caco rucuaneyano, canaari jiyanohua shiriiqutiuriini! Canaari sariyocuatireeni.

—¡Yae! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajaniija. Maja nia puerenu.

²⁸ Canaa tojishacari Jesu, Pedroori Jesu sequereeri:

—¡Jaara seetanujuanaa quiajaniya quiri Jiyaniijianaa, cua sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco rucuanenu coteequiaariiri Jesuucua na quianura. ³⁰ Na niquishacari paratu jiyanohua piyarojiyano, Pedroori puerequiaari. Na pueresacari, moo caríquimia tiuquiniu coteequiaariiri. Nacareeri:

—¡Jiyaniijianaa cua quiare!

³¹ Jesuuri ritia Pedro juaashiquiajiniji quiaree. Na sequereeri:

—Pedronaa, majaqui puera quia tiuuniu cucua. ¿Casaara cua sequesanoocuaji quia taacanuureeni?

³² ¡Nojori jaara botejinia tacataquiaariuhua, paratuuri jiyacari pueyajequee! ³³ Canaa niquishacari naa Jesu miishano na cumaacatej, canaari Jesuucua mojoquetacoquiaarini. Canaari na sequereeni:

—¡Quiaaqui seetanujuanaa Pueyaso Niyanu!

Jesu naatanijiosacari cusosuhua Genesaret jiyajinia

(Mr 6.53-56)

³⁴ Canaa jaara caminia taquijiria niuutiaquiaarini, canaari Genesaret jiyajinia shiitiaseeni. ³⁵ Genesaret

pueya jaara niishi quiaari Jesu tiuquirii, nojoriiri puetunu na jiyajiniajanaa pueya numootequiaari, cuaara patootasaaria cusosuhua Jesuucua. Naacuajitij, Jesuucua patootasaaquiaariiri puetunu cusosuhujanaa. ³⁶ Pueyari Jesu sequetuquiaari:

—Nareja quia shanacure cusosuhua quiocua, nojori cuaara quia tucuaque toque quiaara quenaaja, nojori naataconuhua.

Jesuuri naa miirii. Puetunu na toque quianaajanaari naatacoquiaariuhua na cusonujiniji.

15

Casaate sesa miitijia pueyanoni

(Mr 7.1-23)

¹ Na nuhuaji, Jerusalén tiacajinijinio pueyari canacua tiuquijioquiaari Jesuta pocojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

² —Quia pueyari shuquitioojua miaquenuuquiaa. ¿Casaara nojori tojtiaaquiquiaa canaa niishitiojosano pa supuetanaajinijini? ¡Nojori cuaara miiria taa pa supuetanaa miiquiaaricuaani!

³ Jesuuri nojori nequesotaree saniniuujia:

—¿Niajanियariuhujaj? ¿Casaara nia tojtiaaquiquiaa saniniuujia Pueyaso Rupaani, nia supuetanaa jiidishano miiniu nia miiniuriani? ⁴ Pueyasocujaari sequequiaari: “Quia que tojijia quia quiri, quia nucua tojijiano. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”.

⁵ Niaari saniniuujia sequequiaacujua, maniniacujaari pueyano jaara na queya sequere: “Cua quena, cua nucua-naa, janiyari Pueyasora niqitionutaniya cua casamini. Naacuajiti majaari cua naata nia naacunu cua jiidiasano

casamitia”. ⁶ Naa nia niishitiojosacari pueyatej, niaari pueya tarinitiya na queya nojori cartenura, naacuso nojori quiniuria. Naa nia tojishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷ ¡Sapuenu Pueyaso Rupaa tojitiajacanaa! Supuetana Isafasquiiri maninia naajiotaquiaaricuaja niajanijajiniji, na caminiujiushacari nio rupaa Pueyasojiniji:

⁸ “Nio pueyari saa na rupaataja cua maniniuhuaqueetaquiaa. Nojori jiuujiaari saniniuujia tucuaaanu quiya janiyajiniji. ⁹ Nojoriiri najuhuaana rerejoquiaa na maniniuhuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

¹⁰ Na nuhuaji, Jesuuri puetunu pueyajanaa sequeree:

—Miji, niya cua tojitiaseecuarajaj maninia nia niishiniuria. ¹¹ Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹² Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniiijanaa, ¿quiaate niishiya Fariseocuacaari juaaquioree naa quia sequesacaritij?

¹³ Jesuuri canaa riuquaree:

—Naajaa. Cuaara juaaquiioora. Cuno pojoriiri juhua sesa jiyasocua, Sesaaca natasano cua Que cuhuariquijania. Nojoriiri juhua sesa jiyasocua jayotasaanutaniya. ¹⁴ Seetanujuanaa Pueyaso niishiyashijaca nojori quishacari, nojoriiri juhua cariyojuaru quiya. Narta cariyojuaru jaatucuyari. Cariyojuaru jaara narta cariyojuaru jaatucure juucua, nojoriiri mariyata raama totenutaniya.

¹⁵ Pedroori Jesu sequeree:

—Jiyaniijanaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶ Pedro riucuaereeri:

—¿Niaateeri na niishiyaquiyajuhuaaj? ¹⁷ ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. ¹⁸ Saniniuujia, pa rupaata pa pocuasano sesani, cunoori poojiajiniji tohuataa cutara. Naacuajitij, pueyanoori sesa quiya Pueyaso niquiara, sesa casaa na pocuanuucua. ¹⁹ Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; saponjota saquiriojotanu paniniu; sacuaraatia coriaacojonu paniniu. ²⁰ Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitioojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹ Jesuuri Genesaret jiyajiniji quiaquiaari canaa na pueyata. Canaari quiojoquiaari tamonu taucuaca jiyajiniarani. Cuno jiyajinia quiquiaariiri Tiro tiaca, Sidón tiacajuhuaaj. ²² Canaa rucuanijosacari tii, cuno jiyajinijinio taatuuri Jesuucua niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—¿Jiyaniijanaa, cucua quia taraajere! ¡Pueyaso Jiyarosanonaa, cucua quia taraajere quenaaja! Quiyatu samaru jiitiaa. Jiyanohua taraatia na miiquiaari.

²³ Jesuuri maja na riucuanu quiquiaari. Sanaa canujuriquiaa saajaari. Naaratej, canaari Jesu catecanoquiaarini canaa sequenura nojuaja:

—¿Jiyaniijanaa, na panishano quia miiri cuaara quiohuara! ¡Taajeta nacao pa nuhuajini!

²⁴ Jesuuri canaa riucuaaree:

—Janiyari saaja Israel pueyacia jiyarosaaquiaarini. Nojoriiri juhua borregohua tashuquioono. Nojoriicua taraa-jeyanijia.

²⁵ Cuno maajiiri Jesu sequesano tojirii. Naajaa, Jesu cariquimiaaji mojuquetaseeri. Na sequereeri:

—¡Jiyaniijianaa, cua naacutare!

²⁶ Jesuuri na riucuaaree:

—Majaari maninia pa jaariutianura pa niqiuohua mi-aquesano, sare niqiuohua niqitiosocoriquiano saniniu-ujia.

²⁷ Maajiiri saaja na sequereeri:

—Maniniacuaja quia sequesano Jiyaniijianaa. Naajaa, sareyaniyojuacuajaari miaquesano shiriya miaquenu-quiaa, na camaru totinijosano na miaquejajiniji.

²⁸ Jesuuri maaji sequesereeri:

—Maniniacuaja quia sequesano maajiniaa. Quiaaqui jiyanoehua cucua tiuya. Cuaara quiiriqui taa quia paniy-acuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

²⁹ Canaari Jesuta cuniquiji quiaquiaariuhuani. Canaari Galilea caminia shuriuquioco tajimiaani. Canaari tuhuanuucua tacatamaani. Jesuuri tii cajishii. ³⁰ Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari quiquiaari shipiniquiujiunias pueya, cariyobarururinio, tiqianucua-juhuaj, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuaana. ³¹ Pueyari jiuujiatequiaari nojori niqishacari tiqianucua pocoyano, shipiniquiujiunias rucuaneyano maninia, cariyobarururini niqishacari maninijahuaj. Naajuhuj, sesarunecatohuari maninia numatucuaraca

quiquiaariuhua. Naa pueya niquishacari Jesu miishanotej, nojoriiri Pueyaso maniniuhuaqueetaree. Seque-tureeri:

—¡Jiyanohua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

³² Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyacua taraajeyanijia. Nojoriiri tari jiuujianaraca juuca camueenujiya niya pata. Majaari nojori jiitiatunu quenaaja casaa na miaquetusocoriquiano. Majaari cua jiyaronu paniniu miaqueyojua nojori, nojori mariqui na miaajenuta cusojoniuyarohua nucuacoori.

³³ Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiitiaani?

Canaari na riucuaareni:

—Canaa saaja siete pan jiitiaani, secaja sapitiaajaniyo-juanio.

³⁵ Jesuuri pueya sequeree na cajitiuniuria.

³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niquitiojonura pueya. ³⁷ ¡Puetunu pueyajanaari maninia miaquenuquiaari! Tooquioreeri. ¡Canaari miaquesano cureenota mishinijioquiaari siete canaasatuni! ³⁸ Queraatia pueyari na miaquenuquiaari. ¡Saaja canuuri serojosaaquiaari cuatro mil pueya! Majaari maajipohua serojosaanu quiquiaari, naatujoorinio.

³⁹ Na nuhuaji, Jesuuri pueya sequequiaari nojori

quiojonuhuaara. Na nuhuaji, Jesuuri canaa jiyataquiaari botejinia Magdala jiyajiniara.

16

Fariseocuaca, Saduceocuaca niqiniu panishacari Jesu miishano Pueyaso cumaacata

(Mr 8.11-13; Lc 12.54-56)

¹ Fariseocuacaari Saduceocuacata Jesuucua nijioquiaari nojori saniniujiuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

² Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”.

³ Naajuhuj, pananu jaara tariquiicujaji jama, niqutioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiQUIAA taamueca juucate quiniutianiyani jiya nia niquishacari. ¡Mosanucuaana! ¿Casaara saniniuujia nia niishiyaQUIYA casaa Pueyaso niishitiojiya juucua nijaniyani? Nojuacuajaari juucua na cumaacata na miishano miiQUIAA nia niQUIARA najuhuanaj.

⁴ Jesuuri nojori niQUIARA sequerejuhuaj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niqiniu paniya juucua. Majaari nojori niqitishaanu quiniutianiya socua. Nojoriiri saaja nio niQUIRIYATU Pueyaso cumaacata miishocoriquiano niqiniutianiya: janiyari miishaanutanianiyani taa supuetana Jonás miishaaQUIAARICUAANI.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitiojosanoocuaji

(Mr 8.14-21)

⁵ Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriqianoni.

⁶ Jiyacaritij, Jesuuri canaa sequeree:

—Niishijiaca nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

⁷ Cunora, canaari tama sequetooreejaanijia:

—¿Casa na sequeyani? Pan pa paaquiniuucua naa pa sequeya jiyoteeri.

⁸ Jesu niishishacari naa canaa sequesanotej, canaa sequereeri:

—¿Majateeri juhuanojuaja cucua nia tiuuniu maninia? ¿Casaara tama nia pocoojiyajaaja panjinijini? ⁹ ¿Majateeri juhuanojuaja nia niishiniu tari cua miishanojinijini? ¿Niaateeri tari niyajetarucuaa taa canaasatu mishajate curecanuni, cinco mil canuu jaara miaquenuucanu cinco panjinijitij? ¹⁰ Naa jiyoteeri niyajetarucuaajuhuaaj taa canaasatu mishajate curecanuni, cuatro mil canuu jaara miaquenuucanu siete panjinijitij. ¹¹ ¿Casaara nia jiyanirini janiya miaquesanojinijini sequeriquiaani? Maja cua sequenu panjinijini. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacuajinio.

¹² Naa na sequesacaritij, canaari jiyacari niishiquini majaari Jesu sequenu quiriquiaa pan poreetajajinijini. Canaari shusha niishiquini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

Pedro sequesacari Jesuuri seetanujuanaa Pueyaso Jiyarosano

(Mr 8.27-30; Lc 9.18-21)

¹³ Canaa tiuquiiijosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴ Canaari Jesu riuacuareeni:

—Noojiaqueya pueyari sequequiaa, quiaanaari Tiuquinijiona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuacaanu pueyara Pueyaso sequesano caminiujiunia. Tamasacaari saniniuujia quia sequequiaacujua, quiaanaari supuetana Jeremías, pueyara Pueyaso sequesano caminiujiuniajuhuaj, tamonu Pueyaso sequesano caminiujiunia soj.

¹⁵ Jesuuri canaa nequesotarohua socua:

¿Niajaniyarihuaj? ¿Taa nia sequeyanijia? ¿Cante janiyani?

¹⁶ Simón Pedroori na riuacuaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷ Jesuuri Simón Pedro sequerohua:

—Quiaacuajaari Pueyaso shuquiritasano pueyano, Jonás niyanunaa. Jiyocuacaanu Quijia cua Quecuajaari quia niishitirii cante janiyani. Janiyajiniji quia niishishanoori maja pueya niishishano quiajaniya.

¹⁸ Janiyari socua sequenu paniya quiajaniyani Pedronaa. Quia sesaari Pedro. Nioori pueyano rupaajinia sequeya “saajia”. Naatej, taa saajiacuaani jataniyaquishoo, quiaari cumaatia nujuataja quiniutianiya, seetanujuanaa cucua quia tiuushacari, quia niishishacari janiyari Pueyaso Niyanuni. Naajuhuj, puetunu pueyajanaa cante cucua tiuuriini taa cucua quia tiuyacuaani, janiyari nojori jiyatenutaniya cua muerasurani.

Puetunu cua saquiriojosano pueyajanaari cumaatia nujuatunutaniya, nojori niishishacari janiyari Pueyaso Niyani. Naacujitij, nojoriirijuhua puereetuuca saajiaacua tiasano quiniutianiya. Puetunu cua muerasujuanaari juhua cua tia quiniutianiya, cua quiquio nojori quishacari. Sesaacaari maja na naata cua tia pojoretanu quiniutianiya. Majaari na naata na tarinitiniu quenaaja janiya, cua tiasacari cua quiquiora. ¹⁹ Naajuhuj Pedronaa, quiaari juhua cua quiquio tiotiu riatataja jiiitiana quiniutianiya. Naacujitij, quiaari coteenu pohuatanutaniya pueya niqiuara janiyajini, nojori tiuuniuria cucua, juhua Pueyasoocua nojori tiuquiniuria na muerasura nojori quiniuria. Naajuhuj, quiaa jaara rootare taate Pueyaso muerasu naata miiniu maniniani, Pueyasoori sequenutaniya cuaara naa quiiiriatej. Naajuhuj, quiaa jaara casaa tenujure, maja naa pueya miiniuriatej, Pueyasoori naa sequenutaniyajuhuj.

²⁰ Na nuhuaji, Jesuuri canaa na pueya rootaree maja canaa pohuatanura tamasaca niqiuara nojuacuajaari Pueyaso Niyani.

*Jesu numootesacari na pueya, nojuajaari mosaanutaniya
(Mr 8.31-9.1; Lc 9.22-27)*

²¹ Jiyacaritij, Jesuuri canaa pohuatanu coteequiaari taa nojuaja miishaanutaniyani. Canaa sequereeri:

—Janiyari Jerusalén tiacajinia quiariquianoni. Parta Judocuaca jiyaniijianucuaari tii cua miiniutianiya naquiya jiyano. Pueyacuara secojona jiyaniijianucuaari nojori rupuenutaniya naa cua paracaashaanurajuhuj, mariyata tariucuacaanu Moisés Naajioneejiniji niishitiojonaanio. Naacujitij janiyari mosaanutaniyani. Jiuujinaraca juucajinia, janiyari samiitianutaniuhuani.

²² Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyano. Jesu sequereeri:

—¡Maja naa pocuanutej! ¡Pueyaso cuaara cojuaara quiajaniya maja naa quia miishaanuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaacaari naa quia pocuateree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacari-tij, quiaari cua Que sequesanoocuaji cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojjiara quiniu paniya, nojori cuaara carteera tama nojori panishanojuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanohua taraatia quiniutianiya. Saniniuujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyara-caanu shuquiriaatia quiniutianiya cutara. ²⁶ Naajuhuj, pueyano jaara masere puetunu nio jiya casamijanaa, na casamiiri najuhuana quiniutianiya nera, na camaru jaara jatasaare mani quiquiojinia na shaajesacari. Nojuajaari maja na naata Pueyaso jiyanoootiniú tama na cuaqueyajaaja, naajaa, nojuaja jaara puetunu na casamijanaa niqitiore Pueyaso, Pueyaso samiitianiniuhuara nojuaja.

²⁷ Janiyacuajaari jiyanohua shacantuuca quijiara quiniutianiyaní, cua Que jiyatesacari janiya Jiyaniijarajanaa. Na nuhuaji, janiyari mijiria niniutianiuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niqitiosaanutaniya maninia nojori miiniuucua. Pueyaso tojitiaashijiacaari saniniuujia naquiya miishaanutaniya, sesa nojori miiniuucua.

²⁸ Seetanujuanaa nia sequeyanijia, noojiaqueya

niajanijajinijinio niya cuata quiyani, majaari nia shaajenu quiniutianiya juhuanojuaja, niaa cuaara niquirijiaatijia Pueyaso cumaaca cucua tiuquiyano, cucua tiuujica jiitariquiano.

17

Jesu jatasacari shacantuucara

(Mr 9.2-13; Lc 9.28-36)

¹ Seis juuca nuhuaji, Jesuuri nio pojori jiyataquiaari jiy-
aconaja tuhuananuucua. Nojoriiri quiquiaari Pedro, Santi-
tiago, Santiago tarajanu Juannio. Jiyareta tama nojori-
jiaarjia quiaquiaari. ² Jesuuri tii tamaatiara jataquiaari
nojori niqiuara. Na jiquiocoori jiyanojua shacantu-
ucara jataquee, juhua pananu. Na toqueeri mariy-
ata jiyanojua cohuajara jataquiaarjihuaj, juhua cuhu-
atana. ³ Jiyacaritij, nojoriiri caapiqui supuetanaa niquirii,
Moisés, Elíasnio. Jesuta pocoojoriquiaari. ⁴ Cunora,
Pedroori Jesu sequeree:

—Jiyaniijanaa, canaaqui namitia niya quiyani! Quiaa
jaara paniri, canaa quiocuaji suhuoronutaniyani, Moisés-
rajuhuaj, Elíasranio.

⁵ Pedro pocuasacarjia, shacantuucara najacaari nojori
mishiquioma. Najacajiniji, rupaari tojishaaquiaari naa
sequereno:

—Nioori cua Niyanuniyojua, cua shuquiritiasano!
¡Saaja nojuaja nia tojitiare!

⁶ Naa nojori tojishacari Pueyaso pocuaanotej, nojoriiri
jacamatuquiaari jiyanojua na puerenuta. ⁷ Jesuuri no-
joriicua nimiaa. Nojori quiaseeri na juaashiquiata. Nojori
sequereeri:

—Nia saneecuaturuhua. Maja puerenu.

⁸ Nojori jaara niqiniijionuuquiaari, majaari tari na
niqitiuniu quiquiaari cuno supuetanaa. Saaja Jesuuri
quiriquiaa.

⁹ Nojori rosetasacariuhua tuhuananujiniji, Jesuuri naa nojori rootaquiaari:

—¡Majaari nia pohuatanu pueya niqiuara tuhuananujiniji nia niquishano! Niocua na pohuatarohua cutara janiya jaara samiitiarohuani.

¹⁰ Na pueyari Jesu nequesotaree:

—¿Casaara tariucuacaanu Pueyaso Rupaajiniji niishitiojona sequequiaacuararini, supuetana Elíasnaari quiocuaji mijiria niniutianihua coteenu, pueya na jiyanootioteenuhuara necohuata?

¹¹ Jesuuri riucuaaree:

—Elásri seetanujuanaa coteenu niriqiuano quiquiaari, puetunu pueya jiuujiaajanaa na jeenucuanura. ¹² Janiya cutaraari nia sequeyani, Eláscuajaari tari niqiuara. Majaari pueya niishiniu quiquiaari cante nojuajani. Naaratej, pueyari taraatia na miiquiaari taa nojori paniquiaaricua-jani. Nojoriiri naa cua miiniutianiya naquiyajuhuj.

¹³ Naa Jesu pohuatasacari Elásjinijitij, na pueyari niishiquii nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samijia

(Mr 9.14-29; Lc 9.37-43)

¹⁴ Jesu jaara tuhuananujiniji tiuquiiijioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucua mojoquetaseeri na sequenura neyanuucua. ¹⁵ Jesu sequereeri:

—¡Jiyaniijianaa, cua niyanuucua quia taraajere que-naaja! ¡Nojuajaari pueyaracaanu cusojoquiaa! Na jiiti-asano cusonuuri na taquiriocatequiaa. Na cusojosacari miiquiaa naquiyari. Naacujitij, sequeyarucua manijinia tiquiaari, moojiniano. ¹⁶ Janiyari quia pueyacua na tiuquitiasee na naataniniuria juucuani. Nojoriiri maja na naata na naataniniu.

¹⁷ Jesuuri cunora sequeree:

—¡Niaaqui Pueyasooocua tiuyashijiaca, na tojiyashiji-acanio! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaa-jaarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiquihua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriqiaani?

²⁰ Jesuuri canaa riucuaaree:

—Maja puera maninia nia tiuuniu juhuanojuaja Pueyasooocua. Seetanujuanaa nia sequeyanijia, nia tiuuniu Pueyasooocua jaara quiriqia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹ Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

*Jesu pacutesacari pohuatanu nojuajaari mosaanutaniya
(Mr 9.30-32; Lc 9.43-45)*

²² Tamonu juuca Jesu rucojosacari canaa na pueyata Galilea jiyajinia, Jesuuri canaa sequeree:

—Janiyari sapojonuta niqutiosaanutaniya taucuaani.

²³ Nojoriiri cua monutaniya. Jiuujianaraca juucajinia, janiyari samiitianutaniuhuani.

Naa Jesu sequesacari canaatej, canaari jiyanohua taraa-jequiaarini.

Cumaneeca niqutiosacari Pueyaso Secojoua tiaacuara

²⁴ Canaa jaara tiuquiiioquiaari Capernaum tiacajinia Jesutani, tamonu pueyanoori Pedroocua catecanoquiaari.

Nojuajaari cumaneeca masejona quiquiaari Pueyaso Secojojua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojojua tiaacuara, taa pa jiyaniijianucua sequequiaaricuajani?

²⁵ Pedroori na riucuaaree:

—Na niqutioquiaanocuaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuacajiniji soj?

²⁶ Pedroori Jesu riucuaaree:

—Taucuaca niqutiojoteshiyanocuaja nojori jiya jiitiana sequesano.

Jesuuri na sequeree:

—Naacuaaquiniatejaj. Naacuajitij, tama na pueyajaariija maja na niqutionu. Pueyaso Secojojua tiacuajaari cua Que tia. Naaratej, maja cumaati Neyanu sequesaanu na niqutionura na cumaneeca. ²⁷ Naajaa, pa niqutioire juhuari nojori sequesano, paa mariqui nojori juaatiriiri. Nocuaji quia rioosee caminiajinia. Quiocua cofeenu quia jatasano sapitiaaja rupaama niqiri. Quiaari tii cumanee riuriatanutaniya. Quiocua cuno cumanee niqitiosuhua nojori, quiria, quiarajuhuj.

18

Cante jiyaniijijanaa cutarani

(Mr 9.33-37; Lc 9.46-48)

¹Jiyacaritij, canaa, Jesu saquirojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijijanaa, canaa quia sequeretoj, puetunu quia pueyajinijiniojuanaani, ¿cante jiyaniijijanaa cutarani?

² Jesuuri naatujua piirii. Canaa tajinia na nujuatereeri.

³ Na nuhuaji, Jesuuri canaa sequeree:

—Nia niyajetare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴ Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari socua jiyaniijia-janaa quiniutianiya cutara narta Pueyaso muerasujinijinio. ⁵ Naajuhuj, cante naatujua maseja maninia na paniniuucua janiyani, nojuajaari cua maseyajuhuj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ 'Sesa cutaraari, sesa nia miitiniuria cucua tiuujia naatujua. Socua maninia cutaraari sesa miitiriquiano pueyanora, nojuaja jaara juhuacarijia caminia queronijinia jartasaare puereetujuajau saajia na riquiajiniji morotasano. ⁷ ¡Mijiria quiniaari jiyanojua cocuaatia miiquiaa sesa na miitishacari tamasaca! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ 'Nio miriqui cua niishitiojosano nia tojiri: nia juaashiquia, nia niohuaca jaara sesa miitiya nijaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojinia jataasaareeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojinia jiyocuacaanu. Niaari tii quiniutianiya shuquiriaatia pueyaracaanu. ⁹ Naajuhuj, nia namijia jaara nia miitiri sesa, nia jiatere. Tucuacaanu nia jatarenoj. Jiyanojua socua maninia cutaraari niaara,

jiyocuacaanu nia tiuquiniuria namijijiu, maja nia jatasaa-nura mani quiquojinia, saniitiosocoriquiano puetunu nia namijaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanohua canaa miiniu panishano, cuno jaara sesa miijiara jiyateriquia canaa.

Jesu pohuatasano miriqui borrego tashucuanojiniji

(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniu-ucuaaji tamonu muerasuniyojua, juhua nio mueyaja. Cua tojitiare. Pueyasocuaajaari na seya seerataquiaa nojori co-juanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuj, Pueyasocua-jaari na muerasuranooocua niishiriojoquiaa. ¹¹ Naaratej, janiyari mijiria niquiaarini tashucuaano pueya cua pa-jenura, nojori cua jaariuutianura Sesaaca.

¹² ¿Taa nia sequeyani pueyanaa? Tamonu pueyano jaara cien borregohua jiitiare, niquiriyatujua jaara tashu-cuare tapueyocuaajiniji, ¿majateeri na camaru na bor-regohua cureeno tiujianu rupaquijia, tashucuaano na pa-jenura? Taaquiririnij. ¹³ Jaara na riuriatare, seetanujua-naa socua jiyanohua cuno borrego tashucuaano shuquiri-tiaari tamasaca na borregohuajiniji. ¹⁴ Naajuhuj, jiy-ocuacaanu quijia nia Queeri maja na paniniu que-naaja niquiriyatujua nio muerasujinijinio tashucuanura puetunurajanaa.

Taa pa jiyanoya pa tarajanuni

(Lc 17.3)

¹⁵ 'Quiarta Pueyaso pueyano jaara sesa miiri quia-janiya, nocua quia quiaare na nacasunura tamajaaja

nia quishacari. Nojuaja jaara tojiri quiajaniya, manini-acuajaari. Niaari maninia rpuetoojuacara quiniutianihuacuahuaj. ¹⁶ Nojuaja jaara tojiyaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niquiara quia nacasure cuno sesa miinia. Niaa jaara naa miiritij, naa quiniutianiyari taa tariucuacaanu Pueyaso Rupaajinia niishitiojosaaquiaaricuajani: “Querajaa pueya jaara mariyata pohuatare na niquishano, na tojishanojuhuaj, cunoori maja sapojonu”. Naacuajitij, nojori saquiriojotasanoori seetanujuanaa quiniutianiya. ¹⁷ Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niquiarajanaa quia pohuatare sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuaara quiiria juhua Pueyaso niishiyashijia niaara. Naacuajitij, majaari socua nia rupuenunoj.

¹⁸ 'Seetanujuanaa nia sequeyanijia, cana nia jiyanoyaquirii mijiriani, na tojiniu paniyaquishacari niajaniya, cunoori jiyanoyaquishano quiniutianiya jiyocuacaanu cua Que Pueyasorajuhuaj. Naajuhuaj, cana nia jiyanoorii mijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyasorajuhuaj.

¹⁹ 'Naajuhuaj, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocuara nia secojonura Pueyaso, cua Queeri nia tojiniutianiya. Nojuajaari jiyocuacaanuji naa maninia miiniutianiya niaara, taa nia secojosacari nia sequereecuajanoj. ²⁰ Querajaa niajaniyajinijinio jaara rerejore, cucua tiuujiaca nia quishacari, janiyari tii niaata quiyajaaniuhuj. Naacuajitij, cua Queeri nia secojosano tojiniutianiya cutara.

²¹ Jiyacaritij, Pedroori Jesu nequesotasee:

—Jiyaniijjanaa, tamonu pueyano jaara sesa miiniu pacutejore janiya, ¿janiyatucua pueyaracaanu na

jiyanoorini? ¿Majateeri tariucuaja, janiya jaara na jiyanoori siete sesa na miishanojiniji janiyani?

²² Jesuuri Pedro riuquaree:

—Maja naatej Pedronaa. Maja quia tarinitianu na jiyanooniu. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

Jesu pohuatasano jiyanoashijia serujiniji

²³ Naaratej, cua tojiri pueyanaa. Nia pohuatareera nia niishiniuria taa Pueyaso paniya jiyanoootiojuaca na muerasu nia quiniuriani. Tamonu jiya jiyaniijiaari nera poonijionaa pueya sequequiaari nojori cuaara tari niqitiojora nojuaja na cumaneeca, nojori na niqitiojosanojiniji na casami. ²⁴ Noojiaqueya nera poonijionaa pueya jaara tari nojori pasano casamijiniji niqitiojoriquiacuaa tama nojori cumaneecajinijiaaja, jiyacaritij, tamonuuri tiuquinishaareejuhuj. Nojuajaari jiyanoohua queraatia casami masejoquiaari na jiyaniijiajiniji, queraatia millón cumaneeca. ²⁵ Nojuajaari maja na jiitianu quiquiaari na cumaneeca, na jiyaniijia na niqitionuhua. Na jiyaniijiaari cunora na pueya sequere: “Tamonu camarnu nia niqitiore nio cua seru, necocuataja, cua cumaneecara, necohujuhuj, puetunu na casamijianaanio. Naacujitij, na cuentaari puequenutaniya”. ²⁶ Cuno na seru tojishacari naa na jiyaniijia sequesantej, nocuara jacamaquiaariiri. Na jiyaniijia sequereeri: “¿Cua tarinitiare quenaaja cua jiyaniijianaa! ¿Rupaquiijara cua tarinitiarejaara! Janiyacuajaari quia cumaneeca niqitionutaniya puetunujuanaani”. ²⁷ Na jiyaniijiaari nocua taraajeree. ¿Na carterohua puetunujuanaari! Naa na jiyanooriiri, nocua na taraajenuucua.

²⁸ Cuno seru tohuatasacari jiyaniijia tiajiniji, narta seruta naacuneetooreeri. Cuno narta seruuri tarijia

masequiaari shiitianiyojua casami cuno jiyanooshano serujiniji. Secaja cumaneecaari quiquiaari na cuenta. Naajaa, cuno jiyanooshano seruuri narta seru quiaree. Cumaatia na riquiajinia na miniriiri. Na sequereeri: “¡Ritia cua niquitiore cumaneeca, tarjia quia masesano janiyajiniji!” ²⁹ Narta seruuri na riquiajinia mininia cariquimijaji mojuquetaree. Na sequereeri: “¡Cua tarini-tiarecuaraja quenaaja! ¡Janiyacuaari quia cumaneeca quia niquitionutaniyani!” ³⁰ Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niquitiorejaatijia. ³¹ Narta seya niquishacari naa cuno jiyanooshano seru miishanotej, nojoriiri jiyanoohua taraajequiaari. Nojoriiri jiyaniijaacua quiojoquiaari puetunu sesa narta seru miishanojuanaa nojori pohuatanura. ³² Naaratej, jiyaniijaari tamonu na seru jiyaroree cuno jiyanooshano seru riniuucua. Na tiuquishacari, jiyaniijaari na juaarii. Na sequereeri: “¡Quiaaqui jiyanoohua sesajuhuanajaj! Quia sequesacari janiya, janiyari quia jiyanooriicuaani, maja quia naata niquitionu quishacari quia cumaneeca. ³³ ¿Majateeri quia naata quiriquiaa taraajenu quiarta seruucua, taa cua taraajeree quiocuacuaani?” ³⁴ Jiyaniijaari jiyanoohua juaarii. Cunora, cuno sesa miijia seru jiyarotareeri nujuatejojuajinia na nujuatesaanura. Sequereejariuhuj cuaara naquiya miishaaria tii, cuaara puetunujuanaa na cumaneeca niquitiorejaatijia, casami na pasanoiniji.

³⁵ 'Nia Que Pueyasoori naa miiniutianiya nijaniyajuahuj, niaa jaara seetanujuanaa jiyanoyaquiri niarta Pueyaso muerasu.

19

*Jesu niishitiojosano maja pa niquiucua pa cartenura
(Mr 10.1-12; Lc 16.18)*

¹ Jesu jaara naa pohuatanu puecaquiaaritij, canaa na pueyata quiaquiaari Galilea jiyajiniijiiri. Canaari Judea jiya shuriucua tiuquishii Jordán moo taquijiriani. ² Jiyanhua queraatia pueyari Jesu nuhujaree. Quiniqui canaa quishacari, Jesuuri cusosuhua naatanijioree.

³ Jiyacaritij, noojiaqueya Fariseocuacajinijinoori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maniniate pa cartenura pa niquiocua, jaara pa juaatiri?

⁴ Jesuuri nojori riucuarree:

—¿Majate nia serojonu quiquiaacuaja Pueyaso Rupaa-jinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵ Naaratej, nojori shipininaari sequequiaari: “Caya cuaara tiujjaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiqui. Naacuajitij, majaari maninia Pueyaso rupuetootesano rupartanura.

⁷ Nojoriiri Jesu sequeree:

—Jaara naa qiritij, ¿casaara supuetana Moisés rootaquiaaricuaraarini caya cuaara naajionee niqutioora necocua, na cartenu panishacari?

⁸ Jesuuri nojori riucuarree:

—Moisés cuajaari niishiquiaari niaari puera cumajiuujiaaca. Naaratej Moisésri nia tarinitiaquiaari nia niqiuocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante necocua carteree najuhuanani, tamonu maajitia na caminiuria, coteenu necocua jaara tamonu cayata quiaquiri, neyacaari jiyanhua sesa miya

Pueyaso niquiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujuani. Naa-juhuaj, cante cartesano maaji camiyani, naa sesa miya-jaariuhuj.

¹⁰ Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹ Jesuuri canaa riucuaaree:

—Maja na naata puetunu pueyajanaa nio cua niishi-tiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuacaanuji cumaaca niqutiosaareeni na tojiniuria. ¹² Naajuhuj, noojiaqueya canuuri maja na naata caminiu, riyacaja-jaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuujia, jiatesosano nojori riyacajajau quishacari. Tamasacaari maja na caminiujuhuaj tama nojori paniyaquishacarijaa, saaja Pueyasora nojori poonijionu panishacari. Cante na naata naa miiniuni, cuara naa miiriatej.

Naatujooriicuaa Jesu secojosacari Pueyaso

(Mr 10.13-16; Lc 18.15-17)

¹³ Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴ Jesuuri saniniuujia canaa sequere:

—¡Maja nojori tenujunu! Nia tarinitiare naatujoori cuara cucua nijioora. Nia tojiri, canapuate seetanujua-naa juhua nio naatujoorini, nojoriiri Pueyaso muerasu quiriqiano.

¹⁵ Na nuhuaji, Jesuuri na juaashiquia niaquiaari naatujooriicua, nojoriicua na secojonura, Pueyaso miiniuria

maninia nojori. Na nuhuaji, Jesuuri quiniquiji quiaquiaar-
iuhua.

Jiyanohua casamiriaca mashaja pocoojosacari Jesuta
(Mr 10.17-31; Lc 18.18-30)

¹⁶ Tamonu mashajaari Jesuucua niquiaari. Na nequeso-
taseeri:

—Niishitiojonanaa. Quiaari maninia pueyano. Cua
sequere, ¿taa cua miiniutianiyani maninia cua quiniuria
Pueyaso niquiara, pueyaracaanu quijiara cua quiniuriani?

¹⁷ Jesuuri na riucuaaree:

—¿Casaara quia sequeya janiya maninia pueyanotani?
Saaja niquiriyatujuaari maninia quiija cutara. Nojuacua-
jaari Pueyaso. Naajaa, quiaa jaara maninia quiniucua
jiaatiaa Pueyaso pueyano quia quiniuria, quia tojiri tari-
ucuaaanu Moisés Rootasano Pueyasojiniji.

¹⁸ Jesu riucuaareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocua
quia numuetucunu. Maja quia nohuasenu. Maja quia
saquiriojotanu tamonuucua quia sapojonuta. ¹⁹ Quia
que, quia nucua tojijia quia quiriquia. Maja nojori quia
rerequetenu. Mariyata quiarta pueyano quia paniri taa
quia paniyacuaa tama quia cuaqueyajaajani.

²⁰ Mashajaari Jesu sequeree:

—Janiyacuaajaari puetunujuanaa nio tojijia quiquiaari
cua naatujuajinijini. ¿Casaa cua miiniutianiya socuani?

²¹ Jesuuri na sequeree:

—Quiaa jaara seetanujuanaa maninia quiniucua jiaa-
tiaa Pueyaso niquiara, quia quiaarohua quia tiajinia. Quia
niquitiojore puetunu quia casamijanaa cumaneecara. Na
nuhuaji, casamiijuniucua quia niquitiojore nareja quia
cumaneeca. Naacuajitij, quiaari queraatia casami ji-
itianutaniya jiyocuacaanu. Na nuhuaji, quiocua nimiohua
cutara, cua tojijia quia quiniuria.

²² Na tojishacari naa Jesu sequesantej, mashajaari taraatia quiaarohua jiyanoehua casamiriaca na quiniucua.

²³ Jiyacaritij, Jesuuri canaa sequere:

—Seetanujuanaa nia sequeyanijia, jiyanoehua jiyajenetaari pueyano tojiniuria Pueyaso, na pueyano na quiniuria, cuno pueyano jaara puera jiyanoehua casamiriaca quiri. ²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¿Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesantej, canaari jiyanoehua jiuujiatereeni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na panishanojuanaa na miiniuria.

²⁷ Pedroori Jesu sequere:

—¿Canaarijataj? Canaari puetunu canaa casamijanaa tiujiaquiaarini canaa rupuenura quiajaniya. ¿Casaa canaa masenutaniyariniija?

²⁸ Jesuuri canaa riucuree:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyani jiyaniijia cajitijinia puetunu cua Quejiniji shanoehua cua cumaacatajanaa. Jiyacaritij cua pueyanaa, niaari mariyata cajitijiosaanutaniya doce jiyaniijia cajitiucujinia. Niaari pa supuetana Israel doce niquiohuacuajinio caneno pueya nequesoreena quiniutianiya. ²⁹ Cua pueya tojiniuria

janiya, noojiaqueya nojorijininiioori na tia tiujianu-taniya, tapueyocuaca, na rimiatuhua, na que, na nu-cua, necohua, na cuhuariquiano. Canapuete naa tiu-jiaquiaa na tojiniuria janiyani, cuno pojoriiri Pueyaso-jiniji socua jiyanoehua queraatia masenutaniya nojori tiu-jiasanojiniji. Nojoriiri pueyaracaanu shuquiriaatia quiija-ca quiniutianiyajuhua, shaajeyashijiaca. ³⁰ Saniniuujia, queraatia tojishano pueyari Pueyaso shocotasano quiniu-tianiya na tojitiaashijiaca nojori quiniuucua. Naajuhua, mijiria, queraatia pueyari juhua shocotasano pueya quiya Pueyaso niishiyashijiaca pueyara. Cuno pojori jiyani-shano najuhua quijiacani, nojoriiri Pueyaso shuquiriti-asano pueya quiniutianiya cutara.

20

Jesu pohuatasano cuhuariquiajinia poonitijosano pueya-jiniji

¹ 'Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuani. Cuno cuhuariquia camaruuri quiaquiaari tariquicuaji pueya na pajenura na uva cuhuariquiajinia nojori poonijionura. ² Cuhuariquia camaruuri pueyata pocoojoquiaari taa cumaneeca na niquitionutaniya cuno juuca nojori poonijosanojinijini. Poonijionaa pueyari na sequeree: "Maniniacuajaari taa quia sequereecuajani". Na nuhaji, cuno pueya jiyaroreeri uva cuhuariquiajinia nojori poonijionura. ³ Pananu tacasacari, cuhuariquia camaruuri tohuataquiaariuhua na tiajiniji. Jiyacaritij, socua tamasaca pueya niqushiiiri juhujaniya quiyano tiaca jiuujiajinia curotasano cajitiucujinia. ⁴ Cuhuariquia camaruuri nojori sequeese: "Nia quiaarejuhuj, cua uva cuhuariquiajinia nia poonijionura. Janiyacua cumaneeca nia niquitiorohua nia poonijionu samini". ⁵ Naacuajitij, nojoriiri

quiojoquiaari cuno cuhuariquiajinia poonijionurajuhuj. Na camaruuri socua tohuataquiaariuhua panacari. Socua tamasaca pueya niquishiiri juhuajaniya quiyano tiaca jiuujiajinia curotasano cajitiucujinia. Nojori sequereejariuhuj nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucujariuhuj. ⁶ Tariucua pananu piriushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajinia curotasano cajitiucujinia najuhua quiyano. Nojori sequereeri: “¿Casaara nia quiojiaquiyaree poonijionuucuan? ¿Casaa nia miya niyani? Niaa mariqui poonijiore”. ⁷ Nojoriiri na riuucaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequere: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niquitiorohuani”. ⁸ Pananu tiuquishacari, cuhuariquia camaruuri na casami cojuana sequere: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niquitiojore puetunu nojorijianaa taa cua sequere coteenujuanaa quiria poonijionaacujani. Majaari rimiajata nojori niquitiojonu. Coteenu quia niquitiojore tariucua pananu piriushacari cua jiyaramiquishano. Naa quia niquitiojore puetunujuanaa. Quiocua naa tucuatere niquitiojonu noo pojorijuhuj, canapuate tariquicuaji coteere poonijionucujani”.

⁹ Jiyacaritij, tariucua pananu piriushacari poonitijosano pueyari nijiomaa. Puetunu nojorijianaari cumaneeca niquitiosaaree taa cuhuariquia camaru coteenujuanaa tariquicuaji poonijiona pueya sequequiaaricujani. Majaari rimiajata nojori niquitiosaanu quiquiaari cumaneeca, nojori poonijionu sami. ¹⁰ Na nuhuaji, coteenujuanaa poonijiona pueyari sequesaaquiaari na cumaneeca nojori masenura. Nojoriiri jiyaniquiaari nojori naasu-

cuaari socua cumaneeca niqutiosaanutaniya rupaquijia poonitijosano pueyajiniji. Nojoriiri saaja niqutiosaree taa cuhuariquia camaru sequeree nojori cuno juucacujani. ¹¹ Nojori masescari na cumaneeca, nojoriiri cuhuariquia camaruta juaaquioree. ¹² Na sequetureeri: “Cuno pueyari saaja rupaquijia poonijioree. Quiaari nojori niqutioree taa quia niqutioree canaacuaani. Canaari pananucari cateree cutarani, pueyaracaanu canaa poonijosacari”. ¹³ Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miniu quirii quiajaniya. ¿Majateeri quia niishiniu, paa jaara tariquicuaji pocoojoriquiaatej, janiyari juhuacarijia quia sequereeni janiyari naa cumaneeca quia niqutionutaniyani? Quiaari cua riuquaree: ‘Maniniacuaja’. ¹⁴ Naaratej, quia jiyataarohua quia cumaneeca quia tianinihua. Janiyacuajaari naa niqutionu paniriquiaa tariucua pananu piriushacari cua poonitijosano pueyani, taa cua niqutioree quiajaniyacuaani. ¹⁵ ¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecaacua jiaatijara quiquii, capora cua quiniuucua?”

¹⁶ Na nuhuaji, Jesuuri naa sequequiaarijihuaj, na pohuatasanojiniji na niishitiojonura:

—Naa quiniutianiyari taa cua sequeriquiaacuajani: canapute nuhuajishanaani, nojoriiri coteetanaa quiniutianiya. Naajuhuaj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijinio.

*Jesu camishacariuhua pohuatanu taa na mosaanutaniyani
(Mr 10.32-34; Lc 18.31-34)*

¹⁷ Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora

nuu shuriuquiocora, tamajaaja canaata na pocoojonura. Canaa sequereeri:

¹⁸—Cua tojiri. Niaacuajaari niquiyya paa tari Jerusalén tiacajiniara tacataani. Janiyari tii niqutiosaanutaniya pueyacuara secojonaa jiyaniijianucuaani, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura.

¹⁹Nojoriiri cua niqutitionutaniya taucuaca. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitianutaniuhuani.

Santiago, Juan nucua sequesacari Jesu, maninia na miiniuria necohua

(Mr 10.35-45)

²⁰Jiyacaritij, Zebedeo niquiocuaari Jesuucua catecanoquiaari necohuata. Jesuucua mojoquetaseeri Jesu na sequenura nera na miiniuria na panishano. ²¹Jesuuri na sequereeri:

—¿Casaa quia paniyani?

Jesu riucuaareeri:

—Quiaa jaara Jiyaniijia jiyatesaare, quiocua cua niquiohua cajitijiore quia shuriucua, Santiago, Juannio. Tamonu cuara cajiiria quia miaquetajara, tamonu quia muenecara, quia naacunaa nojori quiniuria, juhua jiyaniijianucujahuaj.

²²Jesuuri Santiago sequereeri, Juannio:

—Majaari nia niishiniu casaa nia maseyani. ¿Nia naata-teeri rejeretanu naquiya miiniu taa cua miishaanutaniyacuaani?

Nojoriiri saaja Jesu riucuaareeri:

—Taaquiriinij. Canaa naatacuuaquiniatejaj.

²³Jesuuri nojori sequereeri:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua

naata sequenu nijaniya, cante cua miaquetajara cajiniutianiya, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiuniuria, teyano pojoriicuaaji na jeenucuaquiaaricuaajani.

²⁴ Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. ²⁵ Jesuuri saniniuujia canaa sequeree:

—Miji pueyanaa. Niya cua tojitiasee. Niaacuaajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶ Nijaniya saniniuujia, majaari naa nia quiniu quiniutianiya. Naacujitij, cante tojishano pueyano quiniu paniya nijaniyajiniijini, cuno cuaara quiiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuaara quiiria juhua nia seru, maninia na miiniuria nijaniya, naatej, taa cua miiquiaa nijaniyacuaani. ²⁸ Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaatia cua quiniuria tamaajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeeacasacari caapiqui cariojuaru namijiaa

(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jyanohua queraatia pueyari Jesu nuhuajiriquiaa. ³⁰ Jiyacaritij, caapiqui cariojuaruuri nuu shuucuaaji cajitiuriquiaa. Nojori niishishacari Jesuuri nojori tajiriquiaa, nojoriiri nakanu coteequiaari:

—¡Jiyaniijianaa! ¡Canaacua quia taraajere! Quiaacuaajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanonaa!

³² Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria nijaniyarani?

³³ Jesu riucuatereeri:

—¡Jiyaniijianaa, canaa namijiaa quia jecare!

³⁴ Jesuuri nojoriicua taraajeree. Nojori namijiaa quia-reeri. ¡Nojoriiri niquijiacara quiquii! Na nuhuaji, Jesuucua sacuaaree canaataari.

21

Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquiiiose Betfagé tiacajiniani, Olivo nacuhua tuhuananu shuriucua. Cuniquiji, majaari puera tucuaaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequequiaari:

² —Cuno tiacajinia nia quiaare, nooj pocuaji niquishiyatej. Niaari tii riuritanutaniya niquiojuaraca burro motasano. Niocua na samaacartasee. Niocua miji na jaatucuyarohuanoj, necojuataja. ³ Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutaniuhuacujaja”.

⁴ Naa tohuateequiaariiri tariucuacaanu Pueyaso sequesano caminiujiunia sequesano, nojuaja jaara naa naajio-taquiaari Jerusalén tiacajinia quiniaa pueyara:

⁵ “Sión tiacajinia quiniaa pueya nia sequere: ‘¡Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, necojuaacuanio’”.

⁶ Jiyacaritij, cuarta Jesu pueyari quiaquiaari. Nojori-iri naa miiquiaari taa Jesu sequequiaari nojoricujani.

⁷ Nocua jaatucutuquiaariuhua burroori, necojuataja. Na nuhuaji, Jesu cajijiara, canaari canaa tucuaque toqueya niojoquiaari burro nijiniani, necojua nijinianio. Na nuhuaji, Jesuuri na nijinia cajirii. ⁸ Jiyanoehua queraatia pueyari tii quiriqiaa. Nojoriiri na tucuaque toqueya muevojoquiaari nucuaco Jesuucujaji. Tamasacaari jaamasucua piyotaquiaari Jesuucujaji niojotasocoriquiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹ Jesu puetanaa, mariyata na nuhuaji nijionaajuhuj, nojoriiri naa coteequiaari nacojonura: “¡Pueyanaa, nioori pocujaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiiria shuquiriaatia pa Pueyaso jiyarosano! ¡Jiyanoehua maniniaari pa Pueyaso! ¡Cuaara shuquiritasano quiiria!”

¹⁰ Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

¹¹ Jesuta tiuquijionaari nojori riucuaree:

—Nojuacuajaari Jesu, Pueyaso sequenu panishano caminiujiunia, Nazaret tiacajinijinio pueyano, Galilea jiyajinijinio.

Jesu jaacasacari seya niqutiojonaa Pueyaso Secojojua tiacariji

(Mr 11.15-19; Lc 19.45-48; Jn 2.13-22)

¹² Na nuhuaji, Jesuuri Pueyaso Secojojua tiacari matacajinia tiuquiquiaari. Tii pueya niquishiiri seya niqutiojiyano. Jesuuri puetunu nojorijianaa tohuatanijioree. Cumaneece tacatojojuaca juhuacutucua caponeetareeri, tee pueya niqutiojoriqiaa taucuaa cumaneece, Pueyaso Secojojua tijinia niqutiojosocoriquiano cumaneecearacuajani. Mococoonu niqutiojonaa cajitiucua caponeetareejaariuhuj, tee

mococoonu niqutiojosaariquiaacuajani Pueyasooacara catijasocoriquiano. ¹³ Jesuuri nojori sequeree:

—Pueyaso sequesano cuajaari naa naajiotasaaquiaari tarijia:

“Cua quiquoori sesojosaanutaniya Pueyaso Secojoua tia”.

¡Niaari saniniuujia na jiyatecanu nohuasenuujuaca quiquiora!

¹⁴ Secojoua tiajinia na quishacarijia, cariyoujuarujuri pueya, mariyata shipiiniquiujiuniaa pueyari nocua nijioquiaari. Jesuuri nojori naatanijioree. ¹⁵ Pueyacuara secोजनाa jiyaniijianucuaari Moisés Naajioneejiniji niishitiojonaata Jesu shootiariquiaa cusosuhua naatanijiyano. Jiyacaritij, naatujooriiri Secojoua tiajinia naa nacooriaquia Jesujiniji: “¡Pa supuetanaa jiyaniijia David niqiuohuacujinio supueno pueyano! ¡Nojuajaari pa Jiyaniijia!” Canaa Judiocuaca jiyaniijianucua niquishacari naa Jesu miishanotej, mariyata nojori tojishacari naatujoori, nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojoriiri jiyaniya quiaari Pueyaso Jiyarosano!

Jesuuri nojori riucaaree:

—¡Taaquiriirinij! Na tojiyacujajinijia. Maniniacuajaari nojori sequesano. ¿Majateeri nia serojonu quiquiaacuaja tariucuaaanu Pueyaso Rupaajinia naa sequesano teje:

“Quiaari naatujoori niishitirii conaajanio, seetanujuanaa nojori maniniuhuaqueetanura quia Jiyarosano?”

¹⁷ Naa nojori na sequenu nuhuajitij, Jesuuri nojori tiujiaquee. Jerusalén tiacajiniji quiaqueeri canaata Betania tiacajinia. Canaari tii maqueseeni.

*Jesu sesacasacari higo naana, muetuhuo na quiniuucua
(Mr 11.12-14, 20-26)*

¹⁸ Tariquicuajia, Jesuuri Jerusalén tiacajiniara taca-teriquiohua canaa na saquiriojosano pueyata. Jesuuri

miaajeriquiaa. ¹⁹ Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucuaja. Cunora, Jesuuri naana sequeree:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riuquaree:

—Seetanujuanaa nia sequeyanijia, niaa jaara Pueya-soocua tiuujiaca quiri nioojia nia niqijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacuajitij, niaa maara nia sequesano niquiri niaa jaara nio tuhuananu sequere: “Quia jaataare shoniacu caminiajina”. ²² Puetunujuanaa nia masesano nia secojosacari Pueyaso, niaa jaara seetanujuanaa nocua tiuuri, niaari nia masesano masenutaniya.

Judiocuaca jiyaniijianucua nequesoreesacari Jesu, cante na jiyaronani

(Mr 11.27-33; Lc 20.1-8)

²³ Jesuuri Pueyaso Secojoua tiajina tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴ Jesuuri nojori sequeree saniniuujia:

—Janiyari nia nequesotanutaniya saniniunijia. Niaa jaara cua riuquare, janiyacua nia sequerohua saniniunijia cante cua jiyaroquiaari naa cua miiniuriani. ²⁵ Naacuajitij, cua riuquature coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojorijiaarjia juayonuutanu coteequiaari jiyasohuaja. Tama sequetooreejaarjia:

—Paa jaara na riucuaereni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaarini?”

²⁶ Saniniuujia, paa jaara sequereni: “Nojuajaari nareja pueya jiyarosano quiquiaari”, jpuereeta quiniutianiyari pajaniyara! Paacuajaari niishiyani puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiujiunia quiquiaari.

²⁷ Naaratej canaa Judiocuaca jiyaniijianucuaari Jesu riucuaeree:

—Maja canaa niishiniu canariquitijia na jiyaroquiaaritijaj.

Jesuuri nojori sequeree:

—Janiyajuhuj, majaari cua sequenu quiniutianiya nianianiya cante cua Jiyaronani, naa cua miiniuriatej.

Jesu pohuatasano pueyano niqiuohujiniji

²⁸ Jesuuri naa nojori sequerohuacuahuaj:

—¿Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquijinia quiarjia”. ²⁹ Neyanuuri saaja na riucuaeree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰ Na queeri naa na nuhuajishana sequereejuhuj. Neyanuuri na riucuaeree: “Maniniacuaja, cua quenaa. Janiya quianutaniyani”. Na nuhuaji, majaari na quianu quiquiaari saaja. ³¹ ¿Taa nia sequeyani pueyanaa? ¿Teyano cuno caapiqui necohujinijiniote na que tojjia quiquiaarini?

Nojoriiri Jesu riucuaeree:

—Na jiyapueranucuaaja.

Naaratej, Jesuuri nojori sequeree:

—Seetanujuanaa nia sequeyanijia. Cumaneece masejona pa pueyajiniji Roma tiacajinia quijia jiyaniijarani,

mariyata paanatujurinio, cuno nia soosano pueyari nia shocotanutaniya Pueyaso muerasura nojori quiniuria. ³² Cua tojitiare casaara naa cua sequeree nijaniyani. Tiuquinijiona Juanri niquiaari na niishitiojonura juucua nijaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiquianu. Cumaneece masejonaa nia soosano pueya cutaraari nocua tiuquianu, paanatujurinio. Nojoriiri na tojitiajara quiquianu. Niaacuajaari na niquiquianu taa cuno sesa miijiaca pueya maninia pueyara jatacanuni. ¡Nijaniyarijiataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijiaca quiquianu.

Jesu niishitiojosano cuhuariquia cojuanaa sesa miijiaca-jiniji

(Mr 12.1-12; Lc 20.9-19)

³³ 'Socua tamonu cua pohuatasano nia tojiri. Tamonu pueyanoori cuhuariquiajinia uva natoouquiaari. Maninia matacoquiaari puetunu na shuriuquicojuanaari maja casaa tiuquitianura nocua. Saajia quejaquiaarijaari-uhuj uva rapijiojuara, na caaca reratesaanura. Jiyaconajara tiaquiaarijaariuhuj, cojuana niquijiaara tiji nohuasejojuacuaji. Na nuhuaji, na camaruuri tamasaca pueya niqutioquiaari na cuhuariquia, nera nojori cojuasocoriquiano. Na nuhuaji, na camaruuri tucuacaanu quiaquiaari pueyaracaanu camueenujunura. ³⁴ Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacia. Nojori jiyaramiquiquiaariiri nojori masenura cuhuariquia cojuanaa carojotasanoiniji, taa nojori pocoojoquiaari taricuajani. ³⁵ Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. ³⁶ Na nuhuaji, na

camaruuri socua queraatia seya jiyaramiquiquiaariuhuj. Nojoriiri naquiya miishaaquiaarijiuhuj.

³⁷ Na nuhuaji, na camarujuanaari tama sequereejaja: “Jiyaroreera cua niyanu. Maja cutara nojori rerequetenu quiniutianiya cua niyanu”. ³⁸ Cuhuariquia cojuanaa jaara niquiquiaari camarnujuanaa niyanu nojoriicua niyano, nojoriiri tama sequetooreejaja: “¡Cunocuaqui cuhuariquia camaru quiriquiano na que niti, na que jaara shaajequee! ¡Pa morej! Naacuajitij, pocua nio cuhuariquia camaruhuara quiquiini”. ³⁹ Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojujaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojtianaari na riucaturee:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasaca pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasanojiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricua nio, tariucuacaanu Pueyaso Rupaajiniani?:

“Pueyari saitia tiariquiaa. Nojoriiri tamonu saajia jiyaniquiaari saajia sesarujajau naasucua. Cuno saajiacuaari socua panishano saajia quiquiaari.

Jiyaniijajanaari naa na jiyatequiaari. Cuno saaji-ata tiare maninia cutaraari. Pueya niquishacari, jiuujiatecoreeri”.

Naa naajiotasano quiyacuajaari.

⁴³ 'Camarucuaanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jiitianaa. Tamasaca pueyari nia niti jiyatesaanutaniya cutara, nojori jiitianura maninia Pueyaso muerasurano. Nojoriiri maninia Pueyaso tojitianaa quiniutianiya cutara, Pueyaso muerasu canenura jiyanohera nera, juhua cuhuariquiajiniji senoosano queraatia. ⁴⁴ Cuno saajiajiniji saniniuujia, pueyano jaara cuno saajiaacua tiyare, nojuajaari juhua rashiquijiniutianiya. Cuno saajia jaara tiyare pueyanoocua, jacanaura na miiniutianiyari.

⁴⁵ Pueyacuara secojonaa jiyaniijianucua, mariyata Fariseocuaca tojitiasacari naa Jesu pohuatasantej, nojoriiri niishiquii Jesuuri nojorijiniji pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujuanaa Pueyaso sequenu panishano caminiujiunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

22

*Jesu pohuatasano miriqui camishacari queranacunujiniji
(Lc 14.15-24)*

¹ Na nuhuaji, Jesuuri socua niishitiojoquiaari miriqui pohuatasanta. Naa pohuataquiaaritij:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia mi-iquiaari mijiriacaani. Cuno jiyaniijiaari shuquiriaatia quiniu paniriquiaa queraatia pueyata, neyanu

camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³ Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴ Jiyaniijiaari socua tamasaca na seya sequeree: “Cua masuusano pueya nia numootejocoo. Nia sequesee: ‘Jiyaniijia nia sashiya. Puetunujuanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitij, jiyaniijiaari nojori jiyaramiquirii. ⁵ Masuusano pueyari saaja tojitiaaquirii. Puetunujuanaari tama na panishanojuaaja miiriquiaa saaja. Tamonuuri na cuhuariquiajinia quiaaree. Tamonuuri na casami niquitiojosaqui quiaareecujua. ⁶ Tamasacaari saniniuujia jiyaniijia seya quiooree. Jiyanohua naquiya nojori miiriiri. Na nuhuaji, nojori puecootureeri. ⁷ Jiyaniijia niishishacari, jiyanohua juaariiri. Nocuaji na soldadohua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhuj. ⁸ Na nuhuaji, jiyaniijiaari na seya sequeree: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiaa, saaja cua rerequetejaca nojori quiniuucua. ⁹ Quiarijia cutara, nia quiaare nuu tuneequetajajinia, tee queraatia pueya tajiniuucutaquiaacuajani. Nia masuure puetunu nia niquishano pueyajanaa”.

¹⁰ 'Na seyari quiojoquiaari tiaca nucuaco. Nojoriiri puetunu na riuriasano pueyajanaa rerejoteree, maninia pueya, sesa pueyano. Queranacunuusaquiriiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitiasacari tiaco quer-

anacunura.

¹¹ 'Na nuhuaji, jiyaniijiajanaari tiuquiquiaari masuusanano pueya na niquiniuria. Tamonu pueyano niquishiiri camishacari cushiyosano toqueeju. ¹² Jiyaniijiaari na sequeree: "Pueyanonaa, ¿taa quia tiuquimiaa camishacari cushishano toqueejuni?" Pueyanoori sanaa na tojiriquiaa. Majaari na riucuanu quirii. ¹³ Cunora, jiyaniijiaari na seya sequeree: "¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaa miaquenu-taniyajaariuhua na noonuta, naquiya na miishacari".

¹⁴ 'Naajuhuj pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajaari saquiriojosaanutaniya nojorijinijinio seetanujuanaa na muerasura nojori quiniuria.

Jiya jiyaniijia cuaara niquitiojosaaria na sequesano cumaneeca

(Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuriucujia tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijiaa pueyata. Herodesri jiyaniijia César jiyatesano quiquiaari Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujuanaa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. ¹⁷ Naaratej,

canaa quia sequere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijiajanaa Césarra, taa cuno tahue César sequequiaaricuajani. Quiajaniyariuhuj, ¿taa quia sequeya saniniunijia?

¹⁸ Jesuuri ritia niishiquii, nojoriiri naa na nequesotariquiaa na sapojonuta. Nocuají nojori sequereeri:

—Sapuenu maninia quijiacanaa, ¿casaara nia saniniujiya naa janiyani? ¹⁹ Cua niqitiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqitirii cumanee. ²⁰ Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajiotasanojaniuhuj?

²¹ Nojoriiri na riucuaaree:

—Jiyaniijia César naaquicuaaja, na sesajuhuj.

Jesuuri nojori sequeree:

—Jaara naa quiritij, César nia niqutiojore tama na casaajaaja. Nojuacuajaari na camaru. Saniniuuja, Pueyaso nia niqutiojore nerano tama na casaajaaja. Nojuaja cutaraari pa camarnu.

²² Nojori tojishacari naa Jesu sequesantej, jiuujiatecoreeri. Na tarinitiatoreeri. Quiojiyarohuari.

¿Macunucuate samiitiaconutaniuhua?

(Mr 12.18-27; Lc 20.27-40)

²³ Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴ —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuaara camiriia mashiquio, mueya na mueratenura tarajanu niti.

²⁵ Tariija, tamonu pueyanoori niya quiquiaari. Siete niqiohwaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri

muetuhuojuua. Naaratej, na mashiquioori camitishaaquiaari neyaca tarajanuta. ²⁶ Nojuajaari muetuhuojuua shaajequiaarjihuuj. Naaratej, neyaca tarajanuuri mashiquio camiquiaarjihuuj. Nojuajaari mueyaju cusoquiaarjihuuj. Naa cusunuuquiaariiri puetunu cuno siete canuujuanaa. ²⁷ Na nuhuaji, mashiquioori cusoquiaarjihuuj. ²⁸ Saniniuujia, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁹ Jesuuri nojori riucuaaree:

—¡Niaari jiyanohua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! ³⁰ Macunucua samiitiacosacariuhua, majaari canuu camiyonu quiniutianiya maaji. Naajuhuuj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaca quiniutianiya juhua jiyocuacaanu quijiaca Pueyaso seya, maja camiyosano. ³¹ Socua cua tojitiare. Macunucuaari seetanujuanaa samiitiacoriquianohua. ¿Majateeri nia serojonu quiquiaacuaja taa Pueyaso sequequiaari niajaniyacuajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijiajuhuuj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecooni, nojoriiri maja macunucua na quiniu. Canapue teetanujuanaa Pueyaso muerasuni, nojori cutaraari pueyaracaanu quijiaca.

³³ Pueya tojishacari naa Jesu niishitiojosanotej, nojoriiri jiyanohua jiuujiateree.

Puetunu Pueyaso rootasanojinijianaani, teyanote socua

na pueya tojishocoriquianoni

(Mr 12.28-34)

³⁴ Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori sanini-
ujiuniuria nojuaja, nojori nequesoreenuta. ³⁵ Nojoriiri
jaarajaaja Jesu pocuatenu paniriquiaa sesa juucua. Ta-
monu nojorijinijinioori Moisés Rootasanojiniji niishitio-
jona quiquiaari. Na saniniujiuniuria, nojuajaari Jesu
nequesotaree:

³⁶ —Niishitiojonanaa, ¿Pueyaso rootasanojinijini,
teyanote socua pa tojishocoriquianoni?

³⁷ Jesuuri na riucuaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quiooji-
atajanaa, puetunu quia sohuanutajanaa, puetunu
quia niishitiajatajanaanio”.

³⁸ Niocuajaari socua na pueya tojishocoriquiano Pueyaso
rootasano. ³⁹ Tamonu na sequesanoori quera juhua nio-
juhuaj. Naa sequeyari:

“Quiarta pueyano quia paniri taa quia panyacuaa tama
quia cuaqueyajaajani”.

⁴⁰ Puetunu Moisés rootasanojuanaa, mariyata puetunu
tariucuaaanu Pueyaso sequesano caminiujiuniaa
rootasanojuanaari nio caapiqui rootasanojinijicuaaja.

¿Cante Cristo supuetanani?

(Mr 12.35-37; Lc 20.41-44)

⁴¹ Fariseocuaca quishacarijia cuniqui, Jesuuri nojori
nequesotaree:

⁴² —¿Taa nia niishiriojiya Cristojinijini? ¿Cante na
supuetanani?

Nojoriiri Jesu riucuaaree:

—Pa jiyaniijiarano Cristoni, nojuajaari pa supuetana
David niquiohuacuajinio supuenutaniya.

⁴³ Jesuuri nojori sequerohuacuahuaj:

—Taaquiriirinij. Jaara naa quiritij, ¿niaateeri ni-
ishiyacuaja casaara David sequequiaari “cua Jiyaniijata”
Cristocuaraarini, Pueyaso Sohuanu jaara na pocuate-
quiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari:
‘Cua miaquetajara quia cajirijiaara, janiya cuaara
quia paraa shocojotare quiocujijiaatijia’ ”.

⁴⁵ ¿Cristotucua taa David niquihuacuaji supuereni, David
jaara Cristo jiyaniquia na jiyaniijata?

⁴⁶ Nojoriiri Jesu niquitiaree sanaa. Nojoriiri maja na
naata na riucuanu quiquiaari. Cuno nuhuaji, pueyari maja
socua na nequesoreenu paniniu quiquiaari Jesu.

23

*Jesu juaashacari Fariseocuaca, Moisés Rootasano niishitio-
jonaanio*

(Mr 12.38-40; Lc 11.37-54; 20.45-47)

¹ Na nuhuaji, Jesuuri tii quiniaa pueya sequeree, canaa
na saquiriojosano pueyano:

² —Moisés Rootasanojiniji niishitiojona, mariyata
Fariseocuacaari supuetana Moisés niti quiya, tariucua-
caanu Pueyaso Rupaa nojori niishitiojonura. ³ Naaratej,
nia tojitiare puetunu nojori sequesanojuanaa nijaniya.
Saniniuujia, maja cutaraari nia miiniu taa nojori mi-
iquiaacuaani. Nojoriiri najuhuana niishitiojoquiaa taa
pueya miiniutianiyani. Majaari saniniuujia nojori miiniu
tama nojori niishitiojosanojuaaja. ⁴ Nojoriiri tama nojori
niishishanojuaaja rootaquiaa, maja saaja tariucuaaanu
Pueyaso niishitiojosano pa supuetanaa. Nojori rootasano
pueya miishocoriquianoni, cunoori juhua jiyanohua ni-
iquia casaa pueya nitiasocoriquiano. Nojoriiri maja que-
naaja na naacutanu quiquiaa na juaashiquia sacasaruta.
⁵ Nojoriiri puetunu na miishanojuanaa miiquiaa saaja
pueya niquishocoriquiano, pueya shuquiritianura nojori.

Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuana socua puereetucara na quiquiora cusupuequiaa pueya shootiasocoriquiano. Naajuhuj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojitiajaca miiquiaaricuaani. Saniniuujia, nojoriiri puera tucuacujuara na tunujutaquiaa saaja pueya niqishocoriquiano, pueya shootianura nojori. ⁶Nojori jaara masuusaare tamonu tiajinia queranacunura, nojoriiri secoquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucujinia pueya shootianura nojori. ⁷Nojori rucuanijosacari tiacajinia, nojoriiri paniquiaa pueya saruhuanura nojori. Panitiquiaajaaruuhua pueya jiyaniquiniuria nojori “niishitiojonaata”.

⁸Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria niajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu niajaniyajanaari niarta Pueyaso pueya tapueyocuaca. ⁹Naajuhuj, majaari tamonu pueyano mijiria nia jiyaniquiniu “cua queta”. Niacuajaari niquiriyatu Queraca. Nojuajaari jiyocuacaanu Quinia. ¹⁰Naajuhuj, majaari pueya nia shanacunu niaacua, nojori jiyaniquiniuria niajaniya “cua jiyaniijata”. Niaari niquiriyatujua Jiyaniijiaracacujaja. Nojuacuajaari Pueyaso jiyarosano nia Jiyaniijiaranoni. ¹¹Cante jiyaniijiajanaa cutara niajaniyajinijnioni, cuno cuaara jiyateera tama na cuaqueyajaaja nia cumaquinia na quiniuria. ¹²Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuj, jiyano pueyano cutaraari cararosaanuntaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijia jiyate-

saanutaniya cutara.

¹³ ¡Cua tojitiare, Moisés Rootasanojiniji niishitiojonaanaa, niajaniya Fariseocuacajuhuaaj, niaari cocuaatia mi-iquiaa! ¡Niaari sapuenu juhua maninia quijiaca niquishano! Niaari pueya tarinitiaaquiquiaa nojori rupuenura Pueyaso. Niaari maja nia tiuuniu Pueyasooocua. Naa-juhuaaj, majaari pueya nia tarinitianu nojori tiuuniuria Pueyasooocua, na muerasura nojori quiniuria.

¹⁴ ¡Niaari taraatia miishaanutaniya, Moisés Rootasanojiniji niishitiojonaanaa, niajaniya Fariseocuacajuhuaaj! Niaari sapuenu juhua maninia miijiaca niquishano. Niaari mashiopue tiaca masequiaa secaja nia cumaneecata, nia sapojonuta nojori. Naacuajitij, niaari nojori tiaca masequiaa tama niajanijarajaaja. Naa nia miiniu nuhuajitij, niaari shitiarayocua secojoquiaa najuhuana Pueyaso, pueya niquiara, maninia pueya nia jyanishaanura. Naaratej, niaari socua jyanohua saniitiosaanutaniya tamasa pueyajiniji.

¹⁵ ¡Niaari puereeta miishaanutaniya Moisés Rootasanojiniji niishitiojonaanaa, niajanijajuhuaaj Fariseocuaanaa! Niaari sapuenu juhua maninia miijiaca niquishano. Niaari tucuacaanu rucuanajoquiaa jiyacaco, shoniniacu caminia taquijiriano, tamonu nia niishitiojonura najuhuana Pueyaso tojijara na quiniuria juucua, juhua tama niajanijajaaja. Nia niishitiojosano pueyano jaara nia tojijara quiri, nojuajaari socua jyanohua saniitiosocoriquiano quiya niajanijajiniji, sesa nia rootasano tojijia na quiniuucua.

¹⁶ ¡Niaari taraatia miishaanutaniya mosanucuaanaa! Nijaniyari juhua cariojuaru, cante tamonu pueyano jaatucuya juucuanu, nuu nia niishiyaquishacari. Naacuajitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: “Taa oro Pueyaso Secojoua tiajinia

pueyaracaanu quiyacuaani, naajuhuj, cua sequesano quiajanitari seetanujuaanaa tohuateenutaniya quiara”. Saniniuujia, niaari sequequiaa, Pueyaso Secojojua tiajinia oro jaara sequeyaquishaare, majaari na sequesanoocua tiuushaanu. Naacuajitij, niaari sequequiaa, pueyano sequesanoori nareja sequesano, nojuaja jaara sequere: “Taa Pueyaso Secojojua tia pueyaracaanu quiyacuaani, naajuhuj, cua sequesano quiajanitari seetanujuaanaa tohuateenutaniya quiara”. Niaari sequequiaa cuno sequesanoocuaari maja tiuushaanu. ¹⁷ ¡Mosanucuaanaa, niaari juhua cariojuaru! ¿Teyanote socua pueresanoni, cuno orotee, Pueyaso Secojojua tia soj? Cuno oroori naa puersanora jiyatesaaquiaari saaja Pueyaso Secojojua tiajinia na quiniuucua. ¹⁸ Niaari rootaquiaajuhuj, pa sequesacari parta pueyano, casaa pa miiniutianiya nerani, pocua na tiuuniuria paa cuara sequeera naatej: “Seetanujuaana quia sequeyanijia. Naatej, taa casaa Pueyasooacara catijiaja juhuacutuucua niasano jiyanohua maninia quiyacuaa Pueyasanoni, naajuhuj, cua sequesanoori saaja maniniajuhuj. Majaari cua sapojonu”. Naacuajitij, niaari sequequiaa, paa jaara naa sequereni, paa cuara miiria pa sequesano. Saniniuujia, niaari sequequiaa: “Pa sequesanoori najuhuaana sequesano, paa jaara saaja Pueyasooacara catijiaja juhuacutu sequereni. Majaari nocua tiuushaanu”. ¹⁹ ¡Cariojuarujurinia! ¿Maja-teeri nia niishiniu? ¿Teyanote socua maniniani, Pueyasooacara catijasocoriquiano casaatee, Pueyasooacara catijiaja juhuacutu soj? Catijasocoriquiano casaari narejajuhuanajaj, jaara Pueyasooacara catijiajaacua niasoo quiyaquiri. ²⁰ Naaratej, cante Pueyasooacara catijiaja sequeree seetanujuaanaani, nojuajaari maja saaja Pueyasooacara catijiaja na sequenu quirii. Nojuaja cutaraari na caco niasano sequereejuhuj. ²¹ Naajuhuj, cante Pueyaso Secojojua tia sequeree najuhuanani, cunoori maja saaja Pueyaso Secojojua tia na sequenu quirii. No-

juajaari Pueyaso sequereecuaja, Pueyaso Secojojua tia na sequesacari. ¡Pueyasocuaajaari na Secojojua tiajinia quijia! ²² Naajuhuj, pueyano jaara sequere na sequesano seetanujuanaa juhua jiya cajiniocua, nocua tiuushaanura, cunoori maja saaja jiya cajiniocua na sequenu quirii. ¡Pueyaso cajishaqui sequerejaariuhuj, Pueyasojuanaa sequerejaariuhuj, jiyocuacaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitiojonaanaa, niajaniyajuhuj Fariseocuacanaa! Niaari sapuenu juhua maninia miijiaca niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, mi-aquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricujani. ¡Niaari sanini-uujia socua pa tojishocoriquiano Moisés rootasano tojitiaaquiquiaa! ¡Naacuajitij, majaari maninia pueyano nia quiniu taa Moisés rootaquiaaricujani! ¡Majaari nia taraajenu quiquiaa niarta pueyanoocua! ¡Majaari nia tiuuniu Pueyasocua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, ¡naa nia tojitiarejuhua socua pa tojishocoriquiano rootasano Moisés Naajiotasanojiniji!

²⁴ Pueya nia niishitiosacari Moisés Rootasanojiniji juucua, niaari juhua cariojuaru cante narta cariojuaru jaatucuya juucuan. Niaari juhua tamonu pueyanojuhuj. Na ratusacari, nujujua taquirii na mashacajiniiri. Socua na ratusacariuhua, ¡saaja cuartia miataaree juhuajaniyari!

²⁵ ¡Niaari cocuaatia miiquiaa, Moisés Rootasanojiniji niishitiojonaanaa, niajaniyajuhuj Fariseocuacanaa! Niaari sapuenu juhua maninia miijiaca niquishano. Niaari juhua noo pueyajuhuj, cante nareja na ratujua cuaqueya jeequejoquiaani, na miacojua cuaqueyano. Na

jiniacumaari saniniuujia jiyanoehua curuutuuca quiyajaa. Nio miriqui cua sequesano nia niishiri. Nioojaari naa quiyajuhuj. Niaari nohuasenuujuaca, jamuejacadiao.
²⁶ ¡Cariyojuaru Fariseocuacanaa, nia ratujua jiniacuma nia jeequere coteenu, nia miacojua jiniacumano! Naacuajitij, na cuaqueyari maninia jeequesano quiniutianiyajuhuj.

²⁷ ¡Niaari taraatia miishaanutaniya, Moisés Rootasano-jiniji niishitiojonaanaa, niajanijuhuj Fariseocuacanaa! Puetunu niajanijajanaari sapuenu juhua maninia miijiaca niquishano, juhua macunucua quiquio shanohua niquishano, cohujata noshijosano. Saniniuujia na jiniacuma quiyari sacuaraatia jaanujua pueya nucuhua mocuaca.
²⁸ Niaari naajuhuj. Niaari sapuenu juhua maninia pueya niquishano. Saniniuujia nioojaari jiyanoehua sesa, jiyanoehua sapojonu niishijia.

²⁹ ¡Niaari taraatia miishaanutaniya, Moisés Rootasanojiniji niishitiojonaanaa, niajanijuhuj Fariseocuacanaa! Niaari sapuenu juhua maninia miijiaca niquishano. Niaari macunucua niojotajara shanohua niquishano shipinijioquiaa, tariucuacaanu pueyara Pueyaso sequesano caminiujiunias nucuhuacuaji. Naajuhuj, niaari tariucuacaanu Pueyaso tojitiajaca puecoosano quiquio maniniushitijia.
³⁰ Naa nia miishacaritij, niaari juhua sequequiaruhua: “Paa jaara shipinijosaaquiaari pa supuetanaa quishacarijia tariucuacaanuni, paa maara nojori cojiyaquiquiaari cutarani, nojori puecoosacari Pueyaso sequesano caminiujiunias”.
³¹ Saniniuujia, naa nia sequesacaritij, niaari tama niaacuara toreejacujua. Naaquiri cuno tariucuacaanu Pueyaso sequesano caminiujiunias puecoonaacuajinio supuenocujua.
³² Naa Pueyaso sequesano caminiujiunias puecoonaacuajinio supueno nia quishacaritij, Pueyaso Jiyarosano nia morejuhuj, nia tucatanura nia supuetanaa cotelesano.

³³ '¡Sesa miijiaca pueyanaa, niaari noonacuraca, juhua sacocua! ¿Niaateeri jiyaniya niaari saniitioyaquishaanutaniya mani quiquojinia nia supuetanaata? ³⁴ ¡Cua tojitiare! Janiyari Pueyaso rupaa caminiujiunaa jiyaramiquiniutianiya niaacuani, Pueyaso Rupaa niishijiacajuhuj, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijianaa, naquiya nia miiniuria nojori. ³⁵ Niaacuajaari niishiya, coteenujuanaa mosaaquiaariiri Abel, maninia miijia pueyano. Naa puecoosaaquiaariiri queraatia Pueyaso tojitiajaca pueya. Na nuhuaji, socua jaatesaaquiaari monuuri Zacarías, Berequías niyanu. Cuno maninia pueyanoori mosaaquiaari Pueyaso Secojojua tiajinia, Pueyasooacara catijiasaqui shuriucua. Monu porocua nia quiniuucua taa nia supuetanaa quiquiaaricuaani, niaari saniniuujia nocua namishaanutaniyacujua puetunu tariucuaaanu Pueyaso tojitianaa puecoosaanuucujanaa. ³⁶ Seetanujuanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

*Jesu nujuquesacari Jerusalén tiacajinia quiniaa pueyacua
(Lc 13.34-35)*

³⁷ '¡Jerusalén tiacajinia quiniaa pueyanaa, jiyanohua taraajeya niaacuanijia! Niaari Pueyaso sequesano caminiujiunaa pueya puecojuaca. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niqiuara juucua. Janiyari cucua nia nijionura panijia juucuanii taraatia nia miyaquishaanuucujaji cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja

cua paniyaquijia cua cojuanura nijaniya. ³⁸ Cua tojitiare. ¡Niaari nia quiquojiniji sanaajasaanutaniya niiquiji! ³⁹ Seetanujuanaa nia sequeyanijia, majaari socua nia niqiniu quiniutianiya janiya, niaa cuaara cua tiuquishacariuhua sequerejaatijia: “Pueyaso cuaara shuquiritiiria pa Jiyaniijia quiriquiano na jiyarosano.”

24

Jesu pohuatasacari, Pueyaso Secojoua tia niyartasaanutaniya

(Mr 13.1-2; Lc 21.5-6)

¹ Jesuuri Pueyaso Secojoua tiajiniji tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu niqitiriquiaa Pueyaso Secojoua tiani, shanohua niquishano tia. ² Jesuuri saa canaa riuquarejaa:

—Jaa, na niqiyacuajanijia. Niaa cumaati maninia na niqiyacujua. ¡Seetanujuanaa nia sequeyanijia, cuno tia niaa na niqiyani, cunoori niyartasaanutaniya puetunujuanaa! ¡Majaari quenaaja tamonu saajia manu quiniutianiya tamonu caco!

Taa pa niishiniutianiyani quera jiya puequesacari

(Mr 13.3-23; Lc 21.7-24; 17.22-24)

³ Na nuhuaji, canaari Olivo cuhuariquia tuhuananuu-cua quiojoquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacarijiaaja, canaari na nequesotareeni:

—Canaa quia sequere ¿taacari Pueyaso Secojoua tia niyartasaanutaniyani? Naajuhuj, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhaj, ¿taacari jiya puequenutaniyani?

⁴ Jesuuri canaa riuquaree:

—Tama nia cuaqueyajaaja nia cojuare tamasaca mariqui nia sapojoreeri. ⁵ Queraatia sapojonuujuaacari supuenutaniya. Nojoriiri tama na cuaqueyajaaja sequenutaniya: “Janiyacujaja Cristoni, Pueyaso Jiyarosano”. Naa nojori sequesacaritij, queraatia pueya sapojonutaniyari. ⁶ Naajuhuj, niaari pueyapue miaquetoojonujiniji tojiniuuniutianiya, niya, tamonu jiyacajiniano. Niaari miaquetoojonura miananajotoonujiniji tojiniuuniutianiyajuhuj. Niaa jaara naa tojiniuuritij, majaari puerenu. Naa quiniutianiyari mijiria. Naajaa, juhuanajuajaari maja jiya puequesacari quiniutianiya. ⁷ Tamonu pueyari tamasaca pueyata miaquetoojonutaniya. Tamonu jiyajiniji jiyaniijaari tamonu jiyaniijaata miaquetoojonutaniyajuhuj. Jiyacaritij, jiyanohua miaajenuuri quiniutianiya queraatia jiyacajinia, cusunuunujuhuj. Rijiaari queraatia jiyacajinia jiuuquiujutianutaniya. ⁸ Naa naquiya miishacari mijiriatej, cunoori juhua manajaraca coteesacari noonu. Na nuhuaji, socua jiyacatenutaniyari naquiya miishacari, mijiria cua tiuquiyaquishacarijia.

⁹ Jiyacaritij, niaari jiya camarucua niquitiojosaanutaniya cua muerasu nia quiniuucua, naquiya nojori mitianura nijaniya. Niaari puecoosanutaniya. Puetunu jiyacajinijinio pueyajanaari nia niquiniu paniyaquiniutianiya, cua muerasu nia quiniuucua. ¹⁰ Jiyacaritij, queraatia cucua tiuunaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacartanutaniya. Majaari nojori niquiniu paniniu quiniutianiya tarijia narta Pueyaso muerasu. ¹¹ Queraatia sapojonuujuaacari Pueyaso rupaa pohuatanaari supuenutaniya. Nojoriiri queraatia pueya sapojonutaniya. ¹² Jiyacaritij, sesa miiniuuri socua jiyanohua jiyacatenutaniya mijiria. Cunora, queraatia pueyari narta pueya paniniu tarinitianutaniya.

¹³ Saniniuujia, cucua tiuujia jaara rejeretare pueyaraanu cuno naquiya miishacari jiya cuaara puequerejaatijia, nojuaja cutaraari shacantuuca quiijara jatanishaanutaniya, pueyaracaanu na rishiniuria. ¹⁴ Pueyaso rupaa jaara pahuatasaare janiyajiniji pueyapue niquiara puetunu jiyacajiniajanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ 'Pueyaso sequesano caminiujiunia Danielri tariucuacaanu pahuataquiaari sacuaraatia casaanaari supuenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuaara niishiiria casaa na sequeyani.) Niaa jaara cuno sacuaraatia casaa niquiri Pueyaso Secojojua tiajinia nujuatesano, niocua mashiri. ¹⁶ Jiyacaritij, canapuate Judea jiyajinia quiyani, nojori cuaara mashiiria tuhuananuhuacua. ¹⁷ Canapuate na tia cacojiria quiyani, nojori cuaara tiuquiyaquiiria na tiajiniaaco maja na tarishiniuria na casamiicua. ¹⁸ Canapuate cuhuariquiajinia quiyani, cuaara tacateyaquiuhuara na tiajiniohua na toqueyacua. ¹⁹ Jiyacaritij, jiyanohua taraatia quiniutianiyari maajipohuara, canapuate manajaatohua quiyani, mariyata canapuate supuejaca muerasu jiitiaani. ²⁰ Juhuacarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. ²¹ Cuno quishacari, jiyanohua naquiya miiniuuri quiniutianiya seetanujuanaa. Jiya coteenujiniji, jiyano naquiya miiniuuri maja na niquishaanu quiquiaari tari. Naajuhuj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. ²² Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na

taraajesacari.

²³ Jiyacaritij, majaari nia tojiniu, tamonu jaara sequere niajaniya: “¡Cua tarajanunaa, Cristoqui tari tiuquirohual! Niya quiyano”. Naajuhuj, majaari nia tojiniu tamonu jaara nia sequere: “Nooj, jati quiyatej”. ²⁴ Queraatia sapojonuujuacaari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosadora. Tamasacaari sequenutaniyacujua: “Janiyari Pueyaso sequenu panishano caminiujiuniani”. Nojoriiri pueya sapojonutaniya jiyajeneta nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaariuhuj. ²⁵ Pueyanaa, naa cua sequesacari niajanijatej, janiyacujajaari juhuacarijia nia numootereeni. ²⁶ Naaratej, majaari nia quianu cua pajenucua, pueya jaara sequere niajaniya: “Cristo jati cariquia jiyajinia quiya”. Naajuhuj, majaari pueya nia tojiniu nojori jaara sequere niajaniya: “Miji, Cristo sohuacamara cajija. Nia niqishijia”. Majaari nia shanacunu naa nia sapojosaanuratej. ²⁷ Mijiria cua tiuquishacariuhua, majaari jiyasohua cua tiuquiniu quiniutianihua. Naatej, taa pueya niqiquiaa miacana nunujiano pananu muestasamajicuaani, pananu tiuquishocorano, pueyari naa cua niqiniutianiya cua tiuquishacariuhua. ²⁸ Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

*Taa na quiniutianiya Cristo tiuquishacariuhua
(Mr 13.24-37; Lc 21.25-33; 17.26-30, 34-36)*

²⁹ Jesuuri naa canaa pohuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na

cuhuatanu quiniutianiya. Riyari totenutaniya. Jiya cajiniocua cumaaca jiitiajacaari tetecatunutaniya. ³⁰ Jiyacaritij, puereeta casaari jiya cajiniocua niqishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanoehua nojori taraajenuta. Na nuhuaji, cua niqitiuniutianiyari cohuaja najacajinia roseyano, jiyanoehua cua cumaacata, jiyanoehua shacantuuca. ³¹ Janiyari jiyocuacaanuji cua seyata tiuquiniutianiuhuani, cua jiyaramiquiniuria nojori puetunu cua saquiriojosano pueyacuajanaa. Nojori tojitiasacari trompeta jonenenu jiyanoehua, nojoriiri cua saquiriojosano pueya rerejotenutaniya cucua, puetunu nio jiyajinijijianaa.

³² 'Nia pohuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niqishacaritij, niaari niishiya taca-reejonuqui quera quiniutianiya. ³³ Naajuhuj, niaa jaara puetunu cua sequesanojuanaa niquiri tari tohuateyano, niocua niishiri janiyari quera tiuquiuhuani. Tari jiya puequesacari quera. ³⁴ Seetanujuanaa nia sequeyanijia, nio pa quishacari pueyani, majaari nojori shaajenu quiniutianiya juhuanojuaja, nojori cuara puetunujuaanaa cua pohuatasano niquirijiaatijia. ³⁵ Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyara-caanu seetanu rupaajanaa quiniutianiya.

³⁶ 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianiuhuani. Jiyocuacaanu quiniaa Pueyaso seyari maja na niishiniujuhuaj. Majaari quenaaja cua niishiniu-jiuhuaj. Saaja cua Queeri tamajaaja na niishiya cutara.

³⁷ 'Quera cua tiuquiniu panishacariuhua, mijiria

pueyari juhuajaniya quiniutianiya taa Noé quishacari mijiria tariucuacaanu pueya quiquiaaricuaani. ³⁸ Jiyacaritij, nio jiya pajaashitiaaquishacarijia, supuetanaari juhuajaniya miaquenuujua quiquiaari. Juhuajaniya queranacunuuriquiaajaariuhuj. Juhuajaniya necohua camiyoteriquiaajaariuhuj Noé jaara tiuquitiaquiaarijiaatijia na puereetuuca buquejiniacuma. ³⁹ Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniuujia. ⁴¹ Naajuhuj, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. ⁴³ Nio nia niishiri. Tia camaru jaara niishiriquia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemohuarini.

Jesu pahuatasano maninia serujiniji, sesoriquia serujinijinio

(Lc 12.41-48)

⁴⁵ 'Socua cua pahuatasano nia tojitiare pueyanaa. Jiyanohua casamiriaca pueyanoori queraatia seyaraca quiquiaari. Cuno jiyaniijiaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura

maninia, puetunu juucajanaa. Cuno seruuri niishijia quiquiaari, na camarnu tojijiajuhuaj. ⁴⁶ Cuno seruuri shuquiriaatia quiniutianiya na camarnu jaara na riuriasuhua maninia poonijiyano taa na camarnu sequequiaari na nuhujiriacuajani. ⁴⁷ Naaratej, seetanujuanaa nia sequeyanijia, na camarnuuri na jiyatenutaniya puetunu na jiiiasanojuanaa cojuanara. ⁴⁸ Saniniuujia, cuno seru jaara sesa miijia quiri, nojuajaari tama sequenutaniyajaacujua: “Cua jiyaniijiaari jiyanohua tarishiniutianiya”. ⁴⁹ Jaara naa niishiriojore, nojuajaari narta seya piquiniu coteenutaniya. Mashaasequenuujuaca cojiniutaniyajaariuhua queranacunuunura. ⁵⁰ Naa juhuajaniya na quishacaritij, na jiyaniijiaari jiyacari na jiyajenetenutaniya. ⁵¹ Naa sesa na quiniuucatej, na jiyaniijiaari jiyanohua na saniitionutaniya. Na nuhuaji, na jatanutaniyari na cojiritiasocoriquiano saniitionu sapuenu juhua maninia niquishano miijiacu pueyata. Nojoriiri tii nujuquetunutaniya. Na quiaca miaquenuunutaniyari, naquiya na miiquiosacari.

25

Jesu pohuatasano diez niyacoojorijini

¹ Nia pohuatareera taa Pueyaso shuriucua tiuquitianu panijiacu quiniutianiya cua tiuquishacariuhuanu. Nojoriiri juhua diez niyacoojori quiniutianiya, canapute camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijiniiri mosanucua quiquiaari. Tamasacaari saniniuujia niishijiacu quiquiaari cutara. ³ Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiacu

cutaraari socua samaritiu pooquiaari, nojori samaritiu puequesacari na noshitishocoriquiano. ⁵ Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuuriiri. Nocuaji niishijaca niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeree: “Canaara nia rashiquiojoreja nia samaritiujiniji. Canaa samaritiu tari pueetaareeni”. ⁹ Cuno cinco niishijaca niyacoojoriiri nojori riucuaree: “Maja. Maja maninia canaa niqutionura nijaniya, puetunu pa samaritiujianaacua senota pueetama. Ritia nia quiaare juhuari na masesosaqui, socua nia masenura tiji”. ¹⁰ Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaquiaari camishaqui tiaco queranacunura. Tia tiootiuuri mishiquiosaaree. ¹¹ Na nuhuaji, mosanucua niyacoojoriiri tiuquiiioquiaariuhua. Tia tohuateyaji jiiquioonuusuhuari. Sequetureeri: “¡Jiyaniijanaa, jiyaniijanaa, canaacuaji quia riatareja tiootiu!” ¹² Jiyaniijiaari saa sequereejaa: “Seetanujanaa nia sequeyanijia, maja cua niishiniu nijaniya”.

¹³ Naa na pohuatanu nuhuajitij, Jesuuri canaa na saquiriojosano pueya sequeree:

—Pueyanaa, nia quiri juhua sutejaca, nia niishiyaquishacari taacari cua tiuquiniutianihuani, casaa juucatej.

*Miriqui Jesu pohuatasano cumaneeca poonitijionaaajiniji
(Lc 19.11-27)*

¹⁴ Na nuhuaji, Jesuuri socua miriqui pohuataquiaari canaa na niishitiojonura taa Pueyaso muerasu miishaanutaninya jiya puequesacarini. Jesuuri naa canaa pohuataquiaaritij:

—Tamonu jiyaniijiaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuara poonitijioora cuno cumaneeca na canijasocoriquiano. ¹⁵ Naacuajitij, coteenu seru niqutioree cinco mil cumaneecaari. Tamonuuri niqutiosaa-ree mil cumaneeca. Na jiyaniijiaari naa nojori niqutiojoquiaari na niishishacari nojoriiri rimiajata niishi-jiaca quiquiaari, socua cuno cumaneeca nojori canijianura. Na nuhuaji, nojori jiyaniijiaari quiaquiaari. ¹⁶ Cinco mil cumaneeca jitianaaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijiaara. Naacuajitij, cuno seruuri socua cinco mil cumaneeca reratequiaari coteenu na jitiisanoiniji. ¹⁷ Naajuhuj, dos mil cumaneeca jitianaaari socua dos mil cumaneeca reratequiaari na jitiisanoiniji. ¹⁸ Mil cumaneeca masenaari saniniuujia maja na poonitijionu quiquiaari na jiyaniijia niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca. ¹⁹ Seya jiyaniijiaari camueenujuquiaari jyanohua. Socua tiuquiquiaari iuhuari na cumaneeca na masejonuhua na seyajiniji. ²⁰ Coteenu nocua tiuquiquiaariiri cante cinco mil cumaneeca niqutiosaaquiaaricujani. Nojuajaari na jiyaniijia sequeree: “Jiyaniijianaa, quiaari cua niqutiocanu cinco mil cumaneeca. Niya quiyari socua cinco mil cumaneeca quiaara, cua poonijosanoiniji cua reratesano”. ²¹ Na jiyaniijiaari na sequeree: “Maniacuaja. Quiaacuajaari maninia cua seru. Majaqui najuhuaana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiy-

atenutaniya queraatia jitianarani. Miji quia tiuquimia. Niya cuata quia quishii shuquiriaatia”.²² Na nuhuaji, tamonu seruuri na jiyaniijiaacua tiuquishiijuhuaj, nooj, cante dos mil cumaneeca niquitiosaaquiaaricuajani. Na jiyaniijia sequereeri: “Jiyaniijianaa, quiaari cua niqutiocanu dos mil cumaneeca. Niya quiyari socua dos mil cumaneeca quiara, cua reratesano cua poonijosanojiniji”.²³ Na jiyaniijiaari na sequeree: “Maniniacuaja. Quiaacuajaari maninia cua seru. Majaqui najuhuana cua tiuuniu quiquianu quiocua. Quiaacuajaqui maninia miiquianu secaja cua niquitiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Shuquiriaatia niya quia quishii cuata”.²⁴ Na nuhuaji, tamonu seruuri tiuquishiijuhuaj cante mil cumaneeca niquitiosaaquiaaricuajani. Na jiyaniijia sequereeri: “Jiyaniijianaa, janiyari niishiyani quiaacuajaari quiarta pueyacua taraajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuaj.”²⁵ Naaratej, janiyari quia cumaneeca pueretacanu nohuasenuujuacani. Cunora janiyari quia cumaneeca jamocanu raamani. Quia niquiri. Niya quiyacuaja quia cumaneeca puetunujuanaa”.²⁶ Na jiyaniijiaari na juaarii: “¡Quiaaqui sesoriquia pueyano! ¡Taa-jeca seque! ¿Quiaateeri niishiquianu janiyari tamasaca natoosanojiniji senoojuani, tamasaca poonijosanojiniji miajajuhuaj? ²⁷ Quiaa jaara cua jiyaniquianu naa quiijatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijotecanu, nojori maara socua na canijiacanu quiria”.²⁸ Jiyacaritij, jiyaniijiaari tamasaca na seya sequeree: “Nio sesa cua serujiniji nia jaariuutiare cua mil cumaneeca. Nia niqutiore cutara cua maninia seru, cante diez mil jiiitaa tariucuajani.”²⁹ Naacuajitij, cante casaa jiiitaaacuani, nojuajaari socua niquitiosaanutaniya, queraatia jiiitaja

na quiniuria. Saniniuujia, cante secaja jiitiaa najuhuanani, nojujaari secaja na jiitiasano jaariutiasaanutaniya puetunujuanaa. ³⁰ Nio najuhuana quijia seru saniniuujia, nia jatare carijiniacuma ninishiqui. Tii sapuenutaniyari. Na quiacaa miaquenutaniyari na noonuta, naquiya na miishacari”.

Jiya puequesacari, puetunu pueyapuejanaari nequesoreesaanutaniya saniitiosocoriquiano

³¹ Puetunu cua seyajanaari jiyocuacaanuji cua cōjiniutianiya janiya jaara tiuquiriohuani Pueyaso shacantuuca cumaacata, Jiyaniijajanaa cua quiniuria mijiria. Janiyari shanohua puereeta jiyaniijia cajitiujinia cajiniutianiyan, pueya cua nequesoreesacari. ³² Puetunu pueyapuejanaari cucua rerejotesaanutaniya puetunu nio jiya-jinijiniojuanaa. Janiyari maninia pueya saquirojonutaniya sesoriquia pueya tajinijini, taa borrego cojuana na borregohua saquirojoquiaa cabraacuaca tajinijicuaani. ³³ Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. ³⁴ Na nuhuaji, janiyari cua miaquetajara nujuatiuyano sequenutaniyani: “Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. ³⁵ Cunoori nijaniyara, maninia miijiacaa nia quiniuucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuacaanu cua rucuanijosacari, niaari nia tiaco cua tiuquinijia. ³⁶ Toqueeju cua quishacari, niaari cua niqitioquiaari. Cusosu cua quishacari, niaari cua niquiniuucua quiaja. Nujuatejojuajinia cua quishacari taraatia, niaari cucua quiojojua cua cumanjianuucua”. ³⁷ Na nuhuaji, maninia pueyari cua nequesotanutaniya: “Jiyaniijianaa, ¿taacari canaa niqiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari

canaa niquiquiaari quiajaniya jiyamueyanoni? ¿Canaateeri quia raatequiaarini? ³⁸ ¿Taacari canaa niquiquiaari quiajaniya canaa jiyajinia rucuaneyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhuj, taacari canaa niquiquiaari quiajaniya toqueejuni? ¿Canaateeri quia niquitioquiaari toqueni? Maja. ³⁹ ¿Taacari canaa niquiquiaari quiajaniya cusosuni, nujuatejojuajiniano? ¿Canaateeri quiocua quiojoquiaari canaa niquinuria quiajaniyani? Maja”.

⁴⁰ 'Janiyari cuno maninia pueya riucuanutaniyani: “Seetanujuanaa nia sequeyanijia. Niaa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijiuhuj”.

⁴¹ 'Na nuhuaji, janiyari cua muenecara nujuatiuyano sequenutaniyani: “¿Cua shuriucujaji niiquiji nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴² Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucuanijosacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijiuhuj, majaari toque nia niquitionu quijia janiya. Nujuatejojuajinia cua quishacari, cusosu cua quishacarijiuhuj, majaari nia quianu quijia cua niquiniuucua quenaaja”.

⁴⁴ 'Jiyacaritij, cuno pueyari cua nequesotanutaniya: “Jiyaniijianaa, ¿taacari canaa niquiquiaari quiajaniya miaajeyanoni, jiyamueyanujuhuaj? Majaari canaa niquiniu quijia quiajaniya canaa jiyajinia rucuaneyanoni”.

tiaaju, toqueeju quiyano, cusosu quiyano, nujuatejo-juajinia quiyanojuhuj. Canaa jaara naa quiyano quia niqiuquiaarini, canaa maara quiocua taraajequiaarini”.⁴⁵ Janiyari nojori riucuanutaniyani: “Seetanujuanaa nia sequeyanijia, nia taraajeyaquiniuucua tamonu cua muerasuniyojuaacua, niaari seetanujuanaa cucua taraajeyaquiuaari”.⁴⁶ Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shuriucua quianutaniya, pueyaracaanu shuquiriaatia nojori quiniuria.

26

*Judiocuaca camarucua rojotoosacari Jesu nojori quianura
(Mr 14.1-2; Lc 22.1-2; Jn 11.45-53)*

¹ Jesu jaara puetunu nio pohuatasanujuanaa pohuatanu puecaquiaari, canaa na saquiriojosano pueya sequereeri:

² —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niq-uitiosaanutaniyani, mosocoriquiano niyacutesanojinia teetesano.

³ Jiyacarijiuhuj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. ⁴ Nojoriiri cuno tiajinia pocoojoquiaari taa nojori sajonnutaniya Jesu na quiatusocoriquianoni, nojori mosocoriquiano. ⁵ Nojoriiri tama sequetooquiaariiaaja: “Maja pa monu Pascuara queranacusacari, paa mariqui pueya juaatiriiri”.

*Tamonu maaji totasacari na shanohua jaanutaja Jesuucua
(Mr 14.3-9; Jn 12.1-8)*

⁶ Tamonu juuca, Jesuta canaa quishacari Betania tiacajinia, canaari Simón tiajinia miaquenuuriquiaani.

Cuno Simónri tarijia lepra cusonujiniji Jesu naatanishano quiquiaari. ⁷ Miaquejajinia Jesu cajishacari, tamonu maa-jiiri nocua catecanoquiaari. Shiitaniyoyua shucuariquiaja pataconiyoyua cacatariquiaari, cohuaja saajajiniji quejasano. Tii quiriquiaari shanohua jaanutaja. Cuno jaanutajaari jiyanoehua queraatia cumaneecata masesano quiquiaari. Cuno maajiiri Jesu nacaacua na totaree puetunujuanaa. ⁸ Canaa jaara niquiquiaari naa cuno maaji miishanotej, canaari juaaquioreeni. Noojiaqueya canaajinijinioori naa sequeturee:

—¿Casaara cuno maaji niitiaree najuhua shanohua jaanutajani? ⁹ ¡Cuno jaanutaja maara queraatia cumaneecara niqitiosaare, casamijiuniucua niqitiosocoriquiano!

¹⁰ Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¡Na miishano janiyani, cunoori jiyanoehua maninia quiria! ¹¹ Casamijiuniucuaari niaata quiriqiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. ¹² Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. ¹³ Seetanujuanaa nia sequeyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuataaanutaniyajuhua puetunu jiyacajiniajanaa. Naa na miishano janiyani, majaari na niyajetasaanu quiniutianiya pueyaracaanu.

Judas tacartasacari Jesu, na quiatenura
(Mr 14.10-11; Lc 22.3-6)

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajinijinio Jesu doce saquiriojosano pueyano quiquiaari. Na

sesaari quiquiaari Judas Iscariote. ¹⁵ Secojonaa jiyani-
ijianucua sequeeseri:

—¿Taa cumaneeca nia niqutionutaniya janiyani, janiya
jaara nia quiatere Jesuni?

Nojoriiri ritia treinta cumaneeca niqutioquiaari Judas.

¹⁶ Na nuhuaji, Judasri pueyaracaanu niishiriojoriquiaa
maatucua taacari quiatere Jesuni.

Jesu miaquesacari na nuhuajiria na pueyata

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Puetunu marijijarajanaa, canaa Judiocuacani, canaari
poretessoo pan miaquenuuquiaari puetunu siete juuca-
janaani. Coteenu juucaari sesojosaaquiaari Pascua ju-
uca. Naaratej, Pascua juuca, canaa, Jesu saquiriojosano
pueyani, canaari nocua catecanoquiaarini naa canaa
nequesotanura nojuaja:

—Jiyaniijianaa, ¿tee quia paniya canaa majeetenura
quiocuaji borregoni, pa miaquesocoriquiano quiarijia
Pascuarani?

¹⁸ Jesuuri canaa riucuaaree:

—Paacuajaari miaquenutaniyani tari cua sequesano
pueyano tiajinia Jerusalén tiacajinia. Tii nia quiaare. Tia
camaru nia sequeese: “Canaa niishitiojonaari naa quia
sequeya: ‘Quera cua cusosacari. Janiyari cua nuhuajiria
cua pueyata miaquenutaniya Pascua borrego quia tiajini-
ani’ ”.

¹⁹ Canaari naa miiquiaarini taa Jesu sequequiaari
canaacuajani. Canaari tii majeetequiaari borregoni, Pas-
cua juuca miaquesocoriquiano.

²⁰ Jaara niniquiaari, Jesuuri canaa na doce pueyata
miaquejajinia cajitiuriquiaa. ²¹ Canaa miaquenuusacari,
Jesuuri canaa sequeeree:

—Seetanujuanaa nia sequeyanijia, tamonu niajaniya-
jinijiniori cua tacartanutaniya, cua paraa na quiatenura
janiya, nojori monura janiya.

²² Canaari jiyano hua taraajequeeni naa Jesu seque-sacaritij. Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³ Jesuuri canaa riu cuaree:

—Cante cuata tureneetaa pa miacojuajinjini, nojuacuajaari cua quiatenutaniya mosocoriquiano.

²⁴ Janiyacuajaari mosaanutaniyani taa janiyajinjini naajiotasaaquiaaricuajani tariucuacaanu Pueyaso Rupaajinia. Saniniuujia, jiyano hua taraatia miishaanutaniyani cua quiateriquiano pueyano. Maara socua maninia quiquiaari cuno pueyanora jaara raaquishaaquiaari.

²⁵ Na quiateriquiano Judasri socua Jesu nequesotaree-juhuaj:

—¿Janiya jiyoteeri Niishitiojonanaa?

Judas riu cuareeri:

—Taaquiririnj. Quiajanicyacuaaquinatejaj.

²⁶ Canaa miaquesacari, Jesuuri pan ririi. Na Que Pueyaso secojoree nocuaraari.

Na nuhuaji, na neecasereeri puetunu canaarajanaa, canaa miaquesocoriquiano. Canaa sequereeri:

—Jajaa, nia masere. Nia miaquere. Nio panri cua cuaqueya.

²⁷ Na nuhuaji, Jesuuri raatonuque pataree. Pueyaso na secojonu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu niajanijajanaa.

²⁸ Nioori cua nanaca, Pueyaso jiyanooniuria niajaniya. Cua nanacaari queraatia pueyacuara shoonutaniya, nojori jiyanooshaanura sesa nojori miishanojiniji.

²⁹ Seetanujuanaa, majaari socua cua ratunu quiniutianiya niaata mijiria nio uva caacajinjini. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijajanaa cua quiniuria. Jiyacaritij, jiyano hua maninia quiniutianiyanari cuno quishacari.

Paari mariyata jiyano hua shuquiriaatia quiniutianiya pueyaracaanuni.

*Jesu sequesacari Pedro, nojuaja nocuaji seetanutaniya
(Mr 14.26-31; Lc 22.31-34; Jn 13.36-38)*

³⁰ Canaa jaara jaaquequejoquiaari supuetana David naajioneeginijini, na nuhuaji canaari quiojoquiaarini Olivo cuhuariquia tuhuananuucua. ³¹ Jesuuri jiyacari canaa sequeree:

—Puetunu nijaniyajanaari cucua tiuuniu tarinitianutaniya quiari niucujaja. Naa naajiotasano quiyacujajari Pueyaso sequesano tarijia: “Janiyari borrego cojuana monutaniyani. Na borregohuari niyaquejonutaniya tamajaaja”. ³² Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocujaji.

³⁴ Jesuuri Pedro sequeree saaja:

—Seetanujuanaa nio niucujajani, caacaraja niunijiyaquishacarijia, quiaari naa pacutejonutaniya seetanu cucujaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cu meta moora janiyaqui, naajaa, majaari cua seetanu quiniutianiya quiocujaji!

Puetunu canaa Jesu pueyajanaari mariyata naa sequesacari, taa Pedro sequesacariaacuaani.

*Jesu secojosacari Getsemani cuhuariquiajiniya
(Mr 14.32-42; Lc 22.39-46)*

³⁶ Na nuhuaji, Jesuuri tamonu cuhuariquiajiniya tiuquijioquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequeree:

—Niyaja nia cajitiuri cua secojosacari cua Que jati socua nia tacoji.

³⁷ Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanhua tacaariquiaaariuhuj. ³⁸ Jiyacaritij, Jesuuri nojori sequeree:

—¡Coojia quera jiaqueya jiyanhua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quenaa, jaara na naata quiri, maja quenaaja cua cartenu naquiya cua miishaanura! Naajaa, janiya cuara miishaariaqui taa quia paniyacuajani, maja juhua cua panishano.

⁴⁰ Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja rupaquijia? ⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujuanaa, poojiaari maninia miiniu panijia. Pa cuaqueyari saniniujia sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quenaa, janiya jaara naquiya miishaareni, janiya cuara miishaariaqui taa quia paniyacuajani.

⁴³ Jesuuri na pueyacuata tacateyarohuacuahuaj. Maquetiuyano nojori riuriatasuhuariuhuj. Nojori namiijaari saaja seecutayariquiaa jiyanhua nojori maquenu paniniutia. ⁴⁴ Jesuuri nojori tarinitiaquiaari socua.

Quiaquiaariuhuari na Que secojonuhuara. Secojonu pacutequiaariiri taa na secojoriquiaa coteenucujani. ⁴⁵ Na nuhuaji, na pueyacua nimiohuariuhuj. Nojori seque-suhuari:

—Quiarijia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniutianiya taa na panitiuyacuajani. ⁴⁶ ¡Nia saneecua-ture! Pa quiaare. Cumaji tari cua quiateriquiano.

Moronucua na paraa jaatucutasacari Jesu
(Mr 14.43-50; Lc 22.47-53; Jn 18.2-11)

⁴⁷ Jesu pocusacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquiri-
ojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca camarucua jiyaramiquishano pueyajuhuj. Nojoriiri nijiniaquetucujaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocujajaari nojuaja. Niocua na quiaseeritia”. ⁴⁹ Naacujatij, Judas tiuquishacari Jesuucua, na sequeseeri:

—Quiocua tiuquiyanjia Niishitiojonanaa.

Jiyacarijia na nujuureeri. ⁵⁰ Jesuuri na sequeree:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijiniaquetucujaja mueruu na shuucujaji. Nata jaateree secojonaa jiyaniijia seru numocoori. ⁵² Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuj? ⁵³ ¿Quiaate niishiyaquiyajuhuj, janiya jaara cua Que sequereni cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? ⁵⁴ Naajuhuj, janiya jaara naa cua Que sequere na cojuatenura janiyani, ¿fariucuacaanu Pueyaso Rupaajinia janiyajiniji naajiotasanotucua taa tohuateereni?

⁵⁵ Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitianura cua quianura mueruuta, macacatanio? Niaacuajaari juucua cua niqijia puetunu juucajanaa Pueyaso Secojoua tiajinia cajiyano, pueya cua niishitiojosacari. ¿Casaara tii nia quiaaquiquianu janiyani? ⁵⁶ Naajaa, naacuajitij puetunu nia miishanojuanaari tohuateenutaniya, taa tariucuacaanu Pueyaso Rupaajinia naajiotasaaquiaari janiyajinijicujani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiyocuatureeni.

Judiocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucuquiaari jiyaniijia Caifás-cua. Caifásri pueyacuara secojonaa jiyaniijia quiquiaari. Judiocuaca camarucuaari tari Jesuucujaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuacaanuji secojonaa jiyaniijia tiajiniara. Cuno puereetuuca tia shocuaari mataca quiquiaari. Pedroori tii carijiniacuma tiuquiquiaarijihuuj. Jiyaniijia Caifás seya tajinia cajishiiri, na niqiniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucuatjanaa pajeriquiaa pueya, nojori saquiriojotanura na sapojonuta Jesuucuaara, na mosaanura. ⁶⁰ Queraatia pueyari najuhuana Jesuucuaara saquiriojotaree juucua. Nojori sequesanoori rimiajata quiquiaari tamasaca sequesanojiniji. Na nuhuaji, socua caapiqui pueyari mariyata sesa saquiriojotaree Jesuucuaara. ⁶¹ Nojoriiri na sequere:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tucutanutaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocuaji, secojonaa jiyaniijaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

⁶³ Jesuuri saaja sanaa na tojiriquiaa. Nocuaji secojonaa jiyaniijaari Jesu sequere:

—¡Cua tojiri! Paa niya quia Pueyaso niquiarani. ¡Cua riucuaare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaare:

—Jaa. Nojuacuajanijia taa quia sequereecuajani. Cua tojitiare. Na nuhuaji, niaari cua niquiniutianiya Pueyaso miaquetajara cajiyo. Niaari cua niquiniutianiyajuhua jiyocuacaanuji tacateyanohua cohuajajinia.

⁶⁵ Pueyacuara secojonaa jiyaniijia jaara tojiquiaari naa Jesu sequesanotej, tama na toque sutareejaarijia na juaniutia. Nata quiniaa sequereeri:

—¡Juhuej! ¡Nia tojishuriucuaara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanohua sacuaratiaari na sequesano Pueyaso niquiara! ¿Paatucua casaara sashiri socua tamonu saquiriojotanura nocuaraarini? Niaacuaja shusha tojitiaree tama na sequesanojuaaja sacuaratia Pueyaso

niquiara. ⁶⁶ ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riucaaree:

—¡Cuaara mosaaria!

⁶⁷ Jiyacaritij, tamasaacari Jesu jiquioco riocojoree. Na jiquioco na masetejotureejaariuhuj. Tamasaca saniniuujia, Jesu namijia na morotunu nuhuaji, na mocoritia na piquitiuriiri. ⁶⁸ Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia niishiritioj, ¿cante quia piriini?

Pedro seetasacari Jesuucuaji

(Mr 14.66-72; Lc 22.56-62; Jn 18.15-18, 25-27)

⁶⁹ Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niquishii. Nojuajaari niyacoo quiquiaari. Pedro sequereeri:

—¡Jaj, quiaacuaja cuno Jesuta rucuanajojua, cuno Galilea jiyajinijinio pueyanotani!

⁷⁰ Pedroori jiyacari seetaree puetunu pueya niquiara-janaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohuateyajiria canujiyaree. Jati, tamonu niyacoori na niquirijiuhuj. Cuno seruuri jiyacari tii quiniaa sequereeri:

—¡Nio pueyanoori cuno Jesuta quijiajuhuaj, cuno Jesu, Nazaret tiacajinijinio pueyanoni!

⁷² Pedroori Jesujiniji socua seetanu camiriohuacuahuaj:

—¡Maja cua niishiniu cuno pueyano! ¡Pueyasocuaajaari niishiya, seetanujuanaa nia sequeyanijia!

⁷³ Pasaja na tarishiniu nuhuaji, quiniqui quiniaari Pedro sequetusee:

—¡Quiaaqui seetanujuanaa cuno Jesu pueyajinijinio! ¡Quiaari juhua nojori pocuaajuhuj!

⁷⁴ Jiyacaritij, Pedroori socua jiyacaterree sapojonura. Naa cuno pueya sequereeri:

—¡Pueyasocuaajaari niishiya maja cua niishiniu cuno pueyano, niaa na sequeyani! ¡Pueyasocuaajaari cua sequesano tojiya! ¡Majaari cua sapojonu niajaniya!

Caacarajaari canashiyaquiji niunijioquee. ⁷⁵ Jiyacaritij, Pedroori naa cuno niucuaja Jesu sequesano niishiquii: “Pedronaa, caacaraja niunijiyaquishacarijia, quiaari tari janiyajiniji seetanu pacutejonutaniya”. Pedroori tia shocua matacadiniji tohuataquiaari ritia. ¡Jiyanohua nujuquequeeri na taraajenuta!

27

Judiocuaca camarucua niqitiosacari Jesu jiyaniijia Pilato (Mr 15.1; Lc 23.1-2; Jn 18.28-32)

¹ Tariquicuaji, puetunu pueyacuara secojonaa jiyaniijianucujanaari rerejoree narta Judiocuaca camarucua. Nojoriiri roojotooree taa na miituniutianiya Jesu na motenurani. ² Na nuhuaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyanoohua macuhuaajequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojonaa jiyaniijianucuaacua, canaa Judiocuaca camarucuaacuanio, nojori na niqutionuhuaa cuno treinta cumaneeca. ⁴ Judasri nojori seqesee:

—¡Janiyaqui sesa miiriucuaani, najuhuana cua quiatenuucua maninia pueyano niajaniya!

Nojoriiri saa na riucaareejaa:

—Naajaa. Maja canaa miishano. Cunocujaari tama quia miishanojuaaja.

⁵ Judasri nojori cari cuno treinta cumaneece jataree Pueyaso Secojoua tiajinia. Tiji quiacuahuari. Na riquiajiniji morotaquiaari sohaneyocuaari. Naa cusoquiaariiri. Sohaneyocuaacuaji jaasutaari. ⁶ Secojonaa jiyaniijianucuaari Judas jatasano cumaneece reratequiaari. Nojoriiri tama sequetooquiaarijiaaja:

—Nio cumaneeceari maja na naata Pueyasora racatajinia niasocoriquiano. Nio cumaneeceari pueyano monu sami.

⁷ Puetunu nojorijianaa jaara niishiriojoquiaari taa na miitiuniutianiya cuno cumaneeceani, nojoriiri marau paniyoru pueyano cuhuariquia masequiaari cuno cumaneeceata. Cuno cuhuariquiaari jiyatesaaquiaari rucoonaa jamojuara, nojori jaara cusoyare Jerusalén tiacajinia nojori quishacari. ⁸ Pueyano monu samitia cuno cuhuariquia masesaanuucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰ Naacuajitij, Pueyaso sequenu panishano caminiujiunia supuetana Jeremías sequesanoori maninia tohuateequiaari. Nojuajaari naa sequequiaaritij:

“Nojoriiri na treinta cumaneece pataquiaari cuhuariquia masenura marau paniyoru pueyanojiniji, taa cua jiyaniijia Pueyaso sequequiaari janiyacujani. Tariija, cuno treinta cumaneeceata, maninia pueyanoori nata masesaaquiaari. Israel pueyari naa sequequiaaritij: ‘Cuaara treinta cumaneeceata masesaaria cuno pueyano’ ”.

Pilato nequesoreesacari Jesu

(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquiniatejaj, taa quia sequereecuajani.

¹²Secojonaa jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori. ¹³Naaratej, jiyaniijia Pilatoori Jesu sequeree:

—¿Majate quia tojiniu nojori, quiocuara tonujiyano queraatia?

¹⁴Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquiya quenaajani.

Pilato sequesacari Jesuuri mosaanutaniya

(Mr 15.6-20; Lc 23.13-25; Jn 18.38-19.16)

¹⁵Puetunu Pascua juucarajanaa, Pilatoori nujuatejojuajinia nujuatesano pueyano cartenu jiitiquiaari. Judiocuaca panishano pueyanoori cartesaaquiaari pueyacaanu. ¹⁶Cuno quishacari, tamonu pueyanoori nujuatejojuajinia nujuatesano quiriquiaa, Barrabás jiyaniishano. Puetunu pueyajanaari na niishijia sesa na miiniucua. ¹⁷Pueya rerejosacari Jesu na nacojotasacari Pilato niquiara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

¹⁸Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaaquiriquiaa, nojori tojitianura Jesu. Cunora, camarucuaari Jesu monu paniriquiaa.

¹⁹Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereta cuno pueyanoocuajini!”

²⁰ Jiyacaritij, secojonaa jiyaniijianucuaari, canaa Judiocuaca camarucuata pueya niishitiojoriquiaa nojori sequenura, Barrabás cuaara cartesaaria, Jesu cuaara mosaaria saniniuujia. ²¹ Naacuajitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosaroni?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

²³ Pilatoori nojori nequesotarohuacuhuaq:

—¿Casaarateni? ¿Sesa miiritijiaara?

Pueyari saaja socua jiyanhua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniujiushacari Jesu juucua, pueyari saaja socua jiyanhua nacooriquiaa. ¡Socua jiyanhua juaaquioriquiaari! Pilato niishishacari maja na naata quiniutianiya Jesu cartenu, taa na paniriquiaa juucucua-jani, nojuajaari mohuaca maseree. Pueya niquiara shuquitiareeri. Na shuquitiyacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishanojuaja!

²⁵ Puetunu pueyajanaari na riucuaaree:

—Naajaa. ¡Jaara mosaare, cuaara tiutiasaaria canaacua, canaa niquiohuacuanio!

²⁶ Na nuhuaji, Pilatoori Barrabás tohuateree nujuate-jojuajiniji. Saniniuujia Jesu majacutereeri. Na nuhuaji, na soldadohua na niquitioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na macaatiniuria. ²⁹ Nojoriiri juhuacontucua maaturee na nacaquerajuhuj. Na nuhuaji, na cushititirii Jesuuri. Naajua niquitiosaareejaariuhuj, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucara mojuquetacoquiaari. Nojoriiri naa na macatirii:

—¡Jejee, Judiocuaca jiyaniijianaa!

³⁰ Nojoriiri Jesu riocojoree. Na naajua na jaariutiatuereeri. Nataja na naca piquitiuriiri. ³¹ Naa nojori macaatinuu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³² Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. ³³ Nojoriiri tiuquiijiosee sesa miijiaca puecoosaqui. Pueya puecoosaquini, na sesa quiquiaari “Gólgota”. Niiori pueyano rupaajinia sequeya “Pueyano nacaco”. ³⁴ Quiniqui, soldadohuari Jesu raateree vino juucua, casaa piyajata cojitishano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaaquiaari tari, soldadohuari saitia tacuarishijioree nojori niishiniuria cante Jesu toque poonutaniya nerani. Naacujitij, tama nojoriijaarijia Jesu toque seraatiaquiaari. Naa tohuateequiaariiri

tariucuacaanu Pueyaso sequesano caminiujiunia sequesano, nojuaja jaara naa naajiotaquiaari:

“Pueyari saitia tacuarishijioree cua toque nojori seraatianura”.

³⁶ Na nuhuaji, cuno soldadohuari cajitiuquiaari Jesu na cojuanura.

³⁷ Jesu nacaacuma, naajioneeri rupotasaaquiaari. Tii naajiosano quiriquiaari casaara na teetesareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenuujuacaari Jesu shuriucua teetesaaquiaarijuhuaj, socua tamonu caapiqui niyacutesanojinia; tamonu na miaquetajara, tamonu na muenecara.

³⁹ Tamasaca pueya tajishacari nucuaco Jesu shuriuquioco, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatiijia! Quiaacujaari sequeja quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecuarajaj, quiaa jaara Pueyaso Niyanu quiri seetanujuanaa!

⁴¹ Secojonaa jiyaniijanucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macatiriquiaajuhuj. Tama sequetooriquiaajaarijia:

⁴² —Saaja tamasa naatanijiojuaquiiri. Maja cutaraari na naata tama nocuajijiaaja tacunu. Jaara seetanujuanaa pa Israel pueya jiyaniijia quiri, cuaara roseera quiaritia pa niquiara niyacutesanojiniji, nocua pa tiuuniuria.

⁴³ ¡Pueyasocua tiuujia naatiijia! Jaara naa quiriritij, Pueyaso cuaara na roshiniiria, nojuaja jaara seetanujuaanaa Pueyaso panishano quiri. Nojuacujaari pa sequeja: “Janiyari Pueyaso Niyanuni”.

⁴⁴ Cuno caapiqui nohuasenuujuaca Jesu shuriucua teetejosano quiriquiaani, nojoriiri Jesu macaatiriquiaa-juhuaj.

Jesu cusosacari

(*Mr 15.33-41; Lc 23.44-49; Jn 19.28-30*)

⁴⁵ ¡Panacari, mijiriaari ninishiquiria quiquii! Pananu mueecosacari cuhuatemohuari. ⁴⁶ Jiyacaritij, Jesuuri jiyanohua nacaquiaari naatej:

—¡Elí, Eliinaa! ¿lama sabactani?

Nioori pueyano rupaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?”

⁴⁷ Tamasaca na shuriucua nujuatunaari na tojitiariquiaa. Nojoriiri sequeree:

—¡Nia tojiri! ¡Supuetana Elías jiiquioonuyano! Noo Elías, tariucuacaanu pueyara Pueyaso sequesano camini-ujunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura.

⁴⁹ Tamasacaari sequeree:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji!

⁵⁰ ¡Jiyacaritij, Jesuuri jiyanohua nacarohua! ¡Na nuhuaji na sohanu tohuataniriiri! ¡Cusoqueeri! ⁵¹ Pueyaso Secojojua tiajinia, shiquiaruque toquejiniji sohuacaari quiquiaari Pueyaso Quishaqui mishiquiotaja. ¡Jesu cusosacari, cuno toqueeri sutequee jiyocuacaanuji jiyocuara puetunujuanaa! ¡Rijiaari jiya jiuuquiutiaquiaari jiyanohua! ¡Sairi jiaquetacoquiaari noojiaacoji!

⁵² ¡Macunucua raacaari riatequequiaari! ¡Queraatia tariucuacaanu Pueyasoocua tiuuniaari samiitiacoquee na raacajinia! ⁵³ Jesu jaara samiitiaquiaarihua, cuno samiitiaconohua pueyari tohuareetaquiaari na raacajiniji.

Nojoriiri Jerusalén tiacajinia tiuquitiaquiaari. Nojoriiri queraatia pueyacia muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuaara cusoyarejaatijia nojori niqiuara. Nojori jaara jiya niqituuquiaari jiuuquiutiaano, socua puetunu nojori niquishanojuanaano, nojoriiri jiyanhua puereturee. Sequetureeri:

—¡Nio pueyanoqui seetanujuanaa Pueyaso Niyanu quiqianu!

⁵⁵ Queraatia maajipohuari tii quiriquiaajuhuj. Nojoriiri tucuaaanuji shootiatuquiciaa Jesu. Nojoriiri Jesu nuhuajiquiaari Galilea jiyajiniji, Jesura pueraque-nuuriqiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhuj, José nucua Maríano, mariyata Zebedeo niqiuohua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷ Tamonu pueyanoori quiqiaari Arimatea tiacajinijinio. Jiyanhua casamiriaca quiqiaari. Na sesa quiqiaari José. Nojuajaari tarijia Jesu tojjijara quiqiaari. Joseeri Jesu cusonu juucaja tiuquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niqitiosarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiuniooreeri quenaaruque cohuajaque toquejinia. ⁶⁰ Na nuhuaji na niaquiaari tama na raacojaarijia. Quiarinio raa quiqiaariiri, José jiuutianishano saajiajinia. Na nuhuaji, Joseeri puereetuuca saajia saquitiniquiaari raa tiotiuria. Quiacuhuari. ⁶¹ María Magdalenaari na sesaanucuaata cajitiuriquiaa raa caneja taquijiria.

Soldadohua cojuasacari Jesu raa

⁶² Pascuara jeenucuanu juuca nuhuaji, secojonaa jiyaniijianucuaari Pilatoocua quiojoquiaari Fariseocuacata. ⁶³ Naa na sequetuseeri:

—Jiyaniijianaa, canaari cuno sapojoua pueyano sequesano niishiquiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samiitianutaniuhuani”. ⁶⁴ Nocuaji na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosanoni”.

⁶⁵ Pilatoori nojori sequeree:

—Niya quiyacuaja cua soldadohua. Nojori nia cojuatere maninia cuno raa, taa nia paniyacuajani.

⁶⁶ Nojoriiri soldadohua nujuatejoquiaari raa nojori cojuanura. Raa tiotiuuri rupanacusaaquiaarijiuhuj jiyaniijia Pilato sesa naajiotajata.

28

Jesu samiitiasacariuhua

(Mr 16.1-8; Lc 24.1-12; Jn 20.1-10)

¹ Samaanajinijinio juhuaquesacari, shusha cuhuatesacari, María Magdalenaari raa niquiniucua quiariquiaa na sesaanucuata. ² ¡Canashiyaquiji, rijiaari jiyanohua jiuuquiutiaree! Cunoori quiquiaari Pueyaso seru rosenuucua jiyocuacaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³ ¡Pueyaso seruuri niquishaaquiaari shacantuuca juhua miacana! Na toqueeri jiyanohua cohuajaque quiquiaari, juhua sohanatuu. ⁴ Raa cojuatunaari jiyanohua shiriiquitiuquiaari nojori niquishacari Pueyaso seru. Jiyanohua

tetecatureeri. Na puerenuta socua cusojonuureeri.
⁵Maajipohua jaara tiuquiquiaari raajinia, Pueyaso seruuri nojori sequereer:

—Maja nia shiriiquiniu. Janiyacuajaari niishiyani niaari Jesu pajeya, niyacutesanojinia mosanotej. ⁶Maja niya na quiniu. Tari samiitiarohuano, taa nojuaja sequequiaari niajaniyacuajani. Miji. Nia niquishushiiria na masaqui. Shaaqui. ⁷Ritia nia quiaarohua. Na saquirojosano pueya nia sequesuhua: “Jesu tari samiitiarohua. Nojuajaari nia puetanutaniya Galilea jiyajinia. Niaari jati na niquiniutianiya”. Janiyacuajaari tari nia sequereeni. Naa nia pohuatasuhua na pueya.

⁸Maajipohuari masaacujutanuuriquiohua raajiniji na puerenuta, na shuquiriniutiajuhuaj. Nojoriiri socua netecuatiuyarohuaquij, canaa na pohuatanuhua Pueyaso seru sequesano nojori. ⁹Jiyacaritij, Jesujuanaari canashiyaquiji nojoriicua muetaquee nuujinia! Nojori saruhuatareeri. Maajipohuari nocua catecanoree. Na cariquimiaji mojuquetacoreeri. Jesu niohuaca quiatureeri. Jesu shootiatureeri na jiuujiatenuta.
¹⁰Jesuuri nojori sequereer:

—Maja nia puerenu. Nia quiaarohua. Cua pueya nia sequesuhua nojori cuaara quiojoora Galilea jiyajinia. Nojoriiri seetanjuanaa cua tapueyocuaca. Nojoriiri jati cua niquitiuniutianiya.

Raa cojuanaa pohuatasano

¹¹Maajipohua quiojosacariuhua, noojiaqueya raa cojuanaajininijioori tiacajinia quiojoquiaariuhua pueyacuara secojonaa jiyaniijianucua nojori pohuatanura nojori niquishano. ¹²Pueyacuara secojonaa jiyaniijianucuaari canaa Judiocuaca camarucata rerejoree na roojotoonura taa na miitiuniutianiya. Na nuhuaji, nojoriiri queraatia cumaneeca niquitioquiaari

raa cojuanaa, pueya niquiara nojori pohuatanura tamaatia nojori niquishanojiniji. ¹³ Soldadohuari naa rootasaaquiaaritij:

—Niocua naa sequere pueyatej: “Canaa maquesacari, Jesu pueyaquiiri niucua nohuasequee Jesu quete raa-jiniji”. Niocua naa sequeretej. ¹⁴ Jiyaniijia Pilato jaara niishiri naa nia pohuatasacaritij, majaari nia puerenu. Canaacuajaari na shiniajanutaniyani jaara juaari. Naacua-jitij, majaari na juaaniu quiniutianiya nijaniya.

¹⁵ Jiyacaritij, soldadohuari cumaneeca maseree. No-joriiri naa pohuatanu coteequiaari taa nojori rootasaa-reecuajani. Nojori cuaracashishanoori ritia caminiu-jiushaaquiaari canaa Judiocuacara. Naacua-jitij, canaa Judiocuacaari naa sequeyajaa quiarijia.

Jesu rootasacari na pueya na jiyaramiquiyaquishacarijia nojori

(Mr 16.14-18; Lc 24.36-49; Jn 20.19-23)

¹⁶ Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhuananuucuanu. Jesuuri canaa sequequiaari canaa quiojonura tiriara, tii canaa coquetonura nata. ¹⁷ Canaa niquishacari Jesu quiyano tii, canaari nocuara mojuquetacoquiaari canaa shuquiritianura nojuajani. Tamasaca canaajinijinioori jiyaniriquiaa maja naasucuaari Jesu. ¹⁸ Jesuuri canaacua catecanoree. Canaa sequereeri:

—Janiyari puetunu cumaacajanaa niqitiosaareni, Jiyaniijiajanaa cua quiniuria jiyocuacaanu, mijiriano. ¹⁹ ¡Naaratej, nia quiojore! ¡Puetunu pueyapuejanaa nia pohuatare cua rupaa, cua tojitiajacara nojori quiniuria! Moojinia nia tiuquinijiore cua tojitiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰ Nojori nia niishitiojore puetunu cua rootasanojuanaa nijaniya, nojori tojishocoriquiano.

MATEO 28:20

152

MATEO 28:20

Nia niishiri nio: jjanuacuajaari niaata quiniutianiya
pueyaracaanuni, jiya cuara puequerejaatijia!

Quiarinio pueyaso rupaa pa jiyaniijia Jesucristojiniji
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 14 Jun 2022 from source files dated 30 Nov 2021

90034700-94c6-5f48-ae9c-2383843fed68